



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Lc 38  
422

M. Tullii Ciceronis · Academicorum · 1863


Lc 38. 422

**HARVARD COLLEGE  
LIBRARY**



**THE GIFT OF  
RALPH BARTON PERRY**

**Edgar Pierce Professor  
of Philosophy**



M. TULLII CICERONIS  
OPERA QUAE SUPERSUNT OMNIA  
EDIDERUNT  
J. G. BAITER C. L. KAYSER.

No. 19.

M. TULLII CICERONIS  
ACADEMICORUM  
QUAE SUPERSUNT.

RECENSUIT  
J. G. BAITER.

*EDITIO STEREOTYPA.*

EX OFFICINA BERNHARDI TAUCHNITZ.  
LIPSIAE MDCCCLXIII.

BERNHARD TAUCHNITZ.

# GRIECHISCHE UND RÖMISCHE CLASSIKER

OCTAV-(SCHUL-)AUSGABEN, TASCHENAUSGABEN  
UND PRACHTAUSGABEN.

OCTOBER 1886.

ARISTOPHANIS comoediae. Ed.

AUGUSTUS MEINEKE.

Octavausgabe. 2 Voll. *M* 3,00.

Vol. 1. *M* 1,50. — Vol. 2. *M* 1,50.

Jede Comoedia einzeln *M* 0,45.

Taschenausgabe. 2 Voll. *M* 2,70.

Vol. 1. *M* 1,20. — Vol. 2. *M* 1,50.

Jede Comoedia einzeln *M* 0,50.

Prachtausgabe. 2 Voll. *M* 7,50.

Vol. 1. *M* 3,75. — Vol. 2. *M* 3,75.

DEMOSTHENIS orationes. Edidit

IMM. BEKKER.

Octavausgabe. 3 Voll. *M* 4,50.

Vol. 1. Pars 1. *M* 0,75. Pars 2. *M* 0,75.

Vol. 2. Pars 1. *M* 0,75. Pars 2. *M* 0,75.

Vol. 3. Pars 1. *M* 0,75. Pars 2. *M* 0,75.

Taschenausgabe. 3 Voll. *M* 4,20.

Vol. 1. Pars 1. *M* 0,60. Pars 2. *M* 0,60.

Vol. 2. Pars 1. *M* 0,75. Pars 2. *M* 0,75.

Vol. 3. Pars 1. *M* 0,75. Pars 2. *M* 0,75.

Prachtausgabe. 3 Voll. *M* 11,25.

Vol. 1. *M* 3,75. — Vol. 2. *M* 3,75.

Vol. 3. *M* 3,75.

EURIPIDIS tragoediae. Ed. Aug.

WITZSCHEL.

Octavausgabe. 3 Voll. *M* 3,00.

Vol. 1. *M* 1,00. — Vol. 2. *M* 1,00.

Vol. 3. *M* 1,00.

Jede Tragoedia einzeln *M* 0,50.

Taschenausgabe. 3 Voll. *M* 2,70.

Vol. 1. *M* 0,90. — Vol. 2. *M* 0,90.

Vol. 3. *M* 0,90.

Jede Tragoedia einzeln *M* 0,50.

Prachtausgabe. 3 Voll. *M* 11,25.

Vol. 1. *M* 3,75. — Vol. 2. *M* 3,75.

Vol. 3. *M* 3,75.

HERODOTI historiar. Ed. ARICHT.

Octavausgabe. 2 Voll. *M* 2,70.

Vol. 1. *M* 1,35. — Vol. 2. *M* 1,35.

Prachtausgabe. 2 Voll. *M* 6,00.

Vol. 1. *M* 3,00. — Vol. 2. *M* 3,00.

HOMERI Ilias. Edidit GUILIELMUS

BAEUMLEIN.

Octavausgabe. 2 Partes. *M* 1,50.

Pars 1. *M* 0,75. — Pars 2. *M* 0,75.

Taschenausgabe. 2 Partes. *M* 1,50.

Pars 1. *M* 0,75. — Pars 2. *M* 0,75.

Prachtausgabe. *M* 5,25.

HOMERI Odyssea. Ed. BAEUMLEIN.

Octavausgabe. 2 Partes. *M* 1,50.

Pars 1. *M* 0,75. — Pars 2. *M* 0,75.

Taschenausgabe. 2 Partes. *M* 1,20.

Pars 1. *M* 0,60. — Pars 2. *M* 0,60.

Prachtausgabe. *M* 3,75.

LUCIANI Samosatensis opera. Ed.

GUILIELMUS DINDORF.

Octavausgabe. 3 Voll. *M* 6,30.

Vol. 1. Pars 1. *M* 1,05. Pars 2. *M* 1,05.

Vol. 2. Pars 1. *M* 1,05. Pars 2. *M* 1,05.

Vol. 3. Pars 1. *M* 1,05. Pars 2. *M* 1,05.

Prachtausgabe. 3 Voll. *M* 13,50.

Vol. 1. *M* 4,50. — Vol. 2. *M* 4,50.

Vol. 3. *M* 4,50.

LYSIAE orationes. Ed. ANTONIUS

WESTERMANN.

Octavausgabe. *M* 1,20.

Taschenausgabe. *M* 0,90.

Prachtausgabe. *M* 3,00.

PLATONIS opera. Ed. M. SCHANZ.

Octavausgabe.

No. 1. Euthyphro, Apologia,

Crito, Phaedo. *M* 0,60.

No. 2. Cratylus, Theaetetus. *M* 0,75.

No. 5. Symposium, Phaedrus. *M* 0,45.

No. 6. Alcibiades I. et II., Hipparchus, Amatores, Theages. *M* 0,45.

No. 7. Charmides, Laches, Lysis. *M* 0,45.

No. 8. Euthydemus, Protagoras. *M* 0,45.

No. 9. Gorgias, Meno. *M* 0,60.

No. 10. Hippias maior, Hippias minor, Io, Menexenus, Clitopho. *M* 0,45.

No. 13. Leges I—VI. *M* 0,75.

Kritische Ausgabe.

Vol. 1. Euthyphro, Apologia,

Crito, Phaedo. *M* 6,00.

Vol. 2. Fasciculus I.: Cratylus. *M* 3,00.

Vol. 2. Fasciculus II.: Theaetetus. *M* 3,00.

Vol. 5. Fasciculus I.: Symposium. *M* 2,00.

Vol. 6. Fasciculus II.: Phaedrus. *M* 2,00.

Vol. 6. Fasciculus I.: Alcibiades I. et II., Hipparchus, Amatores, Theages. *M* 3,00.

Vol. 6. Fasciculus II.: Charmides, Laches, Lysis. *M* 2,00.

Vol. 7. Euthydemus, Protagoras. *M* 4,50.

Vol. 8. Gorgias, Meno. *M* 5,00.

Vol. 9. Hippias maior, Hippias minor, Io, Menexenus, Clitopho. *M* 3,00.

Vol. 12. Leges I—VI. *M* 6,00.

*Fortsetzung auf der dritten Seite dieses Umschlages.*

M. TULLII CICERONIS

ACADEMICORUM

QUAE SUPERSUNT.

RECENSUIT


J. G. BAITER.

*EDITIO STEREOTYPA.*

EX OFFICINA BERNHARDI TAUCHNITZ.

LIPSIAE MDCCCLXIII.

Lc 38.422



Prof. R. B. Perry

## M. TULLII CICERONIS ACADEMICORUM QUAE SUPERSUNT.

### PROOEMIUM.

Cicero, qui ab ineunte aetate philosophiae operam dederat, cum ceteras philosophorum scholas earumque decreta cognovit, tum inprimis ad Academicorum rationem disciplinamque se applicavit, non solum propterea quod eorum praecepta proxime ad veritatem accedere videbantur, sed etiam quod eorum consuetudine de omnibus rebus in utramque partem disputandi maxime oratorem aliadiuvantique sibi persuaserat. Cum igitur defensionum laboribus senatoriisque muneribus aut omnino aut magna ex parte esset liberatus, et post bellum civile Pompeio devicto et occiso is esset rei publicae status, ut eam unius consilio atque cura gubernari necesse esset, primum ipsius rei publicae causa philosophiam Romanis explicandam putavit, magni existimans interesse ad decus et ad laudem civitatis, res tam graves tamque praeclaras Latinis etiam litteris contineri, deinde etiam ad animi aegritudinem leniendam, fortunae magna et gravi commotam iniuria, melius nihil facere posse sibi visus est quam si se non modo ad legendos libros, sed etiam ad totam philosophiam pertractandam dedisset.

Postquam igitur in libro, quem Hortensium inscripserat, universam philosophiam collaudaverat ad eiusque studium cohortatus erat, contulit se ad Academicorum doctrinam explicandam, quod eorum genus philosophandi minime arrogans maximeque et constans et elegans arbitrabatur. Haec Academica initio duobus libris comprehenderat in iisque Catulum, Lucillum, Hortensium disputantes induxerat, quorum librorum ipse priorem Catulum, alterum Lucillum nominavit. Quos cum Attico describendos misisset, postea nova prooemia addidit (Cic. ad Att. XIII, 32.), quorum alterum, in Luculli laudem, exstat, alterum, quod Catulum laudibus extulit, cum ipso libro, cui praemissum erat, periit. Sed cum Academica sua in Catuli, Luculli, Hortensii personas minus cadere videret, quod erat hominibus nota non illorum quidem ἀπαρδευσία, sed in iis rebus ἀτριψία, eosdem illos sermones ad Catonem Brutumque transtulit. (Cic. ad Att. XIII, 16.) Monitus vero ab Attico, M. Terentium Varronem, qui Ciceroni magnam et gravem προσφάνησιν denuntiaverat, moleste ferre, quod ipsi in libris Tullianis locus nondum datus esset, totam illam Ἀκαδημικὴν σύνταξιν ab hominibus nobilissimis abstulit transtulitque in Varronem et ex duobus libris contulit in quattuor, ita ut totum opus quamvis multis detractis grandius efficeretur, multa vero splendidiōra, breviora,



meliora fierent. (Cic. ad Att. XIII, 12. 13. 16. cf. Quintil. III, 6, 64.) In his quattuor libris, quibus Academicam omnem quaestionem ita accurate absolvit, ut nihil posset supra, quae erant contra ἀναταληπταν praeclare collecta ab Antiocho Varroni dedit et ad ea ipse respondit Philonis partibus sibi adsumptis; tertius in illo sermone erat Atticus. (Cic. ad Att. XIII, 19.) Diu tamen dubitavit atque cum Attico deliberavit, utrum re vera hi libri ad Varronem mittendi essent an ad Brutum transeundum, qui ipse quoque erat Antiochius. (Cic. ad Att. XIII, 14. 19. 22. 23. 25.) Tandem omni dubitatione sublata quattuor illae διφθέραι ad Varronem missae sunt adiuncta epistula, quam inter epistulas ad familiares servatam (IX, 8.) cum aliis nos quoque libro primo praemisimus. Etsi vero priorem editionem Academicorum duobus libris comprehensam Cicero ipse noluit in manus hominum pervenire, divulgata tamen sunt ex apographo ad Atticum misso quaedam exempla, quo factum est ut alter liber, qui Lucullus inscriptus est, ad nostram usque aetatem perveniret. Posterioris autem editionis ad Varronem missae fragmentum tantum superest libri primi; reliqua praeter locos non nullos a grammaticis, praesertim Nonio, item a Lactantio et Augustino servatos perierunt. Ceterum in Academicorum posteriorum libro primo et secundo ea potissimum Ciceronem retractasse, quae in Catulo, in tertio et quarto ea, quae in Lucullo exposita erant, et per se veri simile est et ex parte confirmatur eo, quod Nonius quattuordecim locos, qui in Lucullo leguntur, ad Academicorum libros tertium et quartum rettulit, ad tertium quidem tres (Luc. §§. 27. 51. 57.), ad quartum undecim (Luc. §§. 67—137.), ut liber tertius in Luculli §. 63 finem, quartus a §. 64 initium cepisse videatur. Unde etiam id sequitur, aptius posteriorum Academicorum librum primum Lucullo praeponi, cum alii, quos Orellius secutus est, Lucullo priorem locum adsignaverint. Totum autem corpus Academica nominavit ipse Cicero de offic. II. §. 8. Tim. c. 1. ad Att. XIII, 13. 19; Academicam quaestionem ad Att. XIII, 19; Ἀκαδημικὴν σύνταξιν ad Att. XIII, 16; Ἀκαδημικὴν ad Att. XIII, 12; Academiam XIII, 13; Academicos libros ad Att. XVI, 6, 4. Tusc. disp. II. 54. de deorum nat. I. §. 11. de divinat. II. §. 1.

## CICERO VARRONI.

Etsi munus flagitare, quamvis quis ostenderit, ne <sup>1</sup> populus quidem solet nisi concitatus, tamen ego exspectatione promissi tui moveor, ut admoneam te, non ut flagitem. misi autem ad te quattuor admonitores non nimis verecundos; nosti enim profecto os [eius] adulescentioris Academiae: ex ea igitur media excitatos misi, qui metuo ne te forte flagitent; ego autem mandavi, ut rogarent. exspectabam omnino iam diu meque sustinebam, ne ad te prius ipse quid scriberem quam aliquid accepissem, ut possem te remunerari quam simillimo munere. sed cum tu tardius faceres, id est, ut ego interpretor, diligentius, teneri non potui quin coniunctionem studiorum amorisque nostri quo possem litterarum genere declararem. feci igitur sermonem inter nos habitum in Cumano, cum esset una Pomponius: tibi dedi partis Antiochinas, quas a te probari intellexisse mihi videbar; mihi sumpsi Philonis. puto fore ut, cum legeris, mirere nos id locutos esse inter nos, quod numquam locuti sumus; sed nosti morem dialogorum. post haec autem, mi <sup>2</sup> Varro, quam plurima, si videbitur, et de nobis inter nos; sero fortasse, sed superiorum temporum fortuna rei publicae causam sustineat, haec ipsi praestare debemus. atque utinam quietis temporibus atque aliquo si non bono, at saltem certo statu civitatis haec inter nos studia exercere possemus! quamquam tum quidem vel aliae quaequam rationes honestas nobis et curas et actiones darent: nunc autem quid est sine his cur vivere velimus? mihi vero cum his ipsis vix, his autem detractis ne vix quidem. sed haec coram et saepius. migrationem et emptionem feliciter evenire volo tuumque in ea re consilium probo. cura ut valeas.

M. TULLII CICERONIS  
ACADEMICORUM POSTERIORUM  
AD M. VARRONEM

LIBER PRIMUS.

In hoc Academicorum posteriorum fragmento post exordium, quo Cicero de instituto philosophiae Latinis litteris illustrandae agit et sermonis instituendi occasionem demonstrat c. 1—3, Varro primum, inde a Socrate repetens usque ad Arcesilam, philosophiae rationem exponit, c. 4—13; deinde Cicero ab Arcesila incipit et in Carneade desinit. Summa sermonis Varroniani haec est: Socratem primum coepisse de moribus magis quam de rerum natura disputare, in qua sola superiores philosophi versati erant, atque in omnibus sermonibus usum esse illa *σιγωρεια*, qua nihil se scire diceret nisi id ipsum, quod nihil sciret. Huius discipuli, Platonis, auctoritate unam et consentientem duobus vocabulis philosophiae formam institutam esse, Academicorum et Peripateticorum, qui certam et completam philosophiae formulam composuerint, sed Socraticam dubitationem et de omnibus rebus sine adsensione disputandi consuetudinem reliquerint, atque ita artem philosophiae effecerint, c. 4. Triplicem autem fuisse philosophandi rationem, unam, de vita et moribus, quae a natura peteretur, cui parendum, in qua summum bonum quaerendum dicerent, c. 5. 6; de natura alteram, quae contineretur effectione et materia, quam fingeret et formaret effectio, c. 7 coll. c. 2; tertiam, quae in ratione et disserendo versaretur, ductam illam quidem a sensibus, sed ita, ut iudicium veritatis non tribueretur sensibus fallentibus, sed menti, quae sola cerneret quod semper esset, simplex et unius modi et tale, quale esset, quam *ιδεαν* appellavisset Plato. Omnem a sensibus ductam cognitionem opinabilem tantum esse, scientiam tantum in animi motionibus et rationibus inesse, c. 8. Aristotelem deinde primum *ιδεας* labefactasse, Theophrastum vitam beatam in sola virtute esse positam negasse, Stratonem totum se ad naturae obscuritatem contulisse, c. 9; Zenonem autem, disciplinam corrigere conatum, plurima in triplici illa ratione novasse, c. 10. 11. Tum vero Zenoni se opposuisse Arcesilam, rerum obscuritate commotum, et revocasse veterem illam omnibus de rebus dubitandi consuetudinem nihilque dixisse sciri posse, ne id ipsum quidem, quod Socrates excepisset, cf. lib. II. c. 24. Hanc esse Academiam novam appellatam et ad Carneadem perductam, c. 12.

---

In Cumano nuper cum mecum Atticus noster esset, <sup>1</sup>  
nuntiatum est nobis a M. Varrone, venisse eum Roma  
pridie vesperi et, nisi de via fessus esset, continuo ad nos  
venturum fuisse: quod cum audissemus, nullam moram  
interponendam putavimus quin videremus hominem no-  
biscum et studiis eisdem et vetustate amicitiae coniun-  
ctum; itaque confestim ad eum ire perreximus, paulum-  
que cum ab eius villa abessemus, ipsum ad nos venientem  
vidimus, atque illum complexi, ut mos amicorum est,  
satis tum longo intervallo, ad suam villam reduximus.  
hic pauca primo, atque [ea] percontantibus nobis, ecquid <sup>2</sup>  
forte Roma novi, Atticus ‘omitte ista, quae nec percon-  
tari nec audire sine molestia possumus, quaeso,’ inquit ‘et  
quaere potius, ecquid ipse novi; silent enim diutius Mu-  
sae Varronis quam solebant, nec tamen istum cessare,  
sed celare quae scribat existimo.’ ‘minime vero;’ inquit  
ille ‘intemperantis enim arbitror esse scribere quod oc-  
cultari velis; sed habeo opus magnum in manibus idque  
iam pridem; ad hunc enim ipsum’ — me autem dicebat  
— ‘quaedam institui, quae et sunt magna sane et liman-  
tur a me politius.’ et ego ‘ista quidem,’ inquam ‘Varro, <sup>3</sup>  
iam diu exspectans non audeo tamen flagitare; audi-  
vi enim e Libone nostro, cuius nosti studium — nihil enim  
eum eius modi celare possumus —, non te ea intermittere,  
sed accuratius tractare nec de manibus umquam depo-  
nere. illud autem mihi ante hoc tempus numquam in  
mentem venit a te requirere; sed nunc, postea quam sum  
ingressus res eas, quas tecum simul didici, mandare mo-  
nimentis philosophiamque veterem illam a Socrate ortam  
Latinis litteris inlustrare, quaero quid sit cur, cum multa  
scribas, hoc genus praetermittas, praesertim cum et ipse  
in eo excellas et id studium totaque ea ars longe ceteris  
et studiis et artibus antecedit.’

Tum ille ‘rem a me saepe deliberatam et multum <sup>2</sup>  
agitata requiris; itaque non haesitans respondebo, sed <sup>4</sup>  
ea dicam, quae mihi sunt in promptu, quod ista ipsa de  
re multum, ut dixi, et diu cogitavi. nam cum philoso-  
phiam viderem diligentissime Graecis litteris explicatam,  
existimavi, si qui de nostris eius studio tenerentur, si  
essent Graecis doctrinis eruditi, Graeca potius quam

nostra lecturos, sin a Graecorum artibus et disciplinis abhorrent, ne haec quidem curaturos, quae sine eruditione Graeca intellegi non possunt; itaque ea nolui scribere, quae nec indocti intellegere possent nec docti legere  
5 curarent. vides autem — eadem enim ipse didicisti — non posse nos Amafinii aut Rabirii similis esse, qui nulla arte adhibita de rebus ante oculos positis vulgari sermone disputant; nihil definiunt, nihil partiuntur, nihil apta interrogatione concludunt, nullam denique artem esse nec dicendi nec disserendi putant. nos autem praeceptis dialecticorum et oratorum etiam, quoniam utramque vim unam esse nostri putant, sic parentes, ut legibus, verbis quoque novis cogimur uti, quae docti, ut dixi, a Graecis petere malent, indocti ne a nobis quidem accipiant,  
6 ut frustra omnis suscipiatur *labor*. iam vero physica, si Epicurum, id est, si Democritum probarem, possem scribere ita plane, ut Amafinius. quid est enim magnum, cum causas rerum efficientis sustuleris, de corpusculorum — ita enim appellat atomos — concursione fortuita loqui? nostra tu physica nosti: quae cum contineantur ex effectione et ex materia ea, quam fingit et format effectio, adhibenda etiam geometria est, quam quibusnam quisquam enuntiare verbis aut quem ad intellegendum poterit adducere? haec ipsa de vita et moribus et de expetendis fugiendisque rebus \*\*. illi enim simpliciter pecudis et hominis idem bonum esse censeant: apud nostros autem non ignoras quae sit et quanta subtilitas.  
7 sive enim Zenonem sequare, magnum est efficere ut quis intellegat, quid sit illud verum et simplex bonum, quod non possit ab honestate seiungi — quod bonum quale sit negat omnino Epicurus *se* sine voluptatibus sensum moventibus ne suspicari *quidem* —: si vero Academiam veterem persequamur, quam nos, ut scis, probamus, quam erunt illa acute explicanda nobis! quam argute, quam obscure etiam contra Stoicos disserendum! totum igitur illud philosophiae studium mihi quidem ipse sumo et ad vitae constantiam quantum possum et ad delectationem animi, nec ullum arbitror, ut apud Platonem est,  
8 maius aut melius a dis datum munus homini. sed meos amicos, in quibus est studium, in Graeciam mitto [id est,

ad Graecos ire iubeo], ut ea a fontibus potius hauriant quam rivulos consectentur; quae autem nemo adhuc docuerat, nec erat unde studiosi scire possent, ea quantum potui — nihil enim magno opere meorum miror — feci ut essent nota nostris; a Graecis enim peti non poterant, ac post L. Aelii nostri occasum ne a Latinis quidem. et tamen in illis veteribus nostris, quae, Menippum imitati, non interpretati, quadam hilaritate conspersimus, quo facilius minus docti intellegerent, iucunditate quadam ad legendum invitati, multa admixta ex intima philosophia, multa dicta dialectice; in laudationibus, in his ipsis antiquitatum prooemiis philosophe scribere voluimus, si modo consecuti sumus.' tum ego 'sunt' inquam 'ista,'<sup>3</sup>  
 Varro; nam nos in nostra urbe peregrinantis errantisque<sup>9</sup> tamquam hospites tui libri quasi domum reduxerunt, ut possemus aliquando qui et ubi essemus agnoscere: tu aetatem patriae, tu descriptiones temporum, tu sacrorum iura, tu sacerdotum, tu domesticam, tu bellicam disciplinam, tu sedem regionum locorum, tu omnium divinarum humanarumque rerum nomina, genera, officia, causas aperuisti, plurimumque idem poëtis nostris omninoque Latinis et litteris luminis et verbis attulisti, atque ipse varium et elegans omni fere numero poëma fecisti philosophiamque multis locis inchoasti, ad impellendum satis, ad edocendum parum. causam autem probabilem tu<sup>10</sup> quidem adfers; aut enim Graeca legere malent qui erunt eruditi, aut ne haec quidem qui illa nescient: sed eam mihi non sane probas: immo vero haec et qui illa non poterunt et qui Graeca poterunt non contemnent sua. quid enim causae est cur poëtas Latinos Graecis litteris eruditi legant, philosophos non legant? an quia delectat Ennius, Pacuvius, Accius, multi alii, qui non verba, sed vim Graecorum expresserunt poëtarum? quanto magis philosophi delectabunt, si, ut illi Aeschylum, Sophoclem, Euripidem, sic hi Platonem imitentur, Aristotelem, Theophrastum? oratores quidem laudari video, si qui e nostris Hyperidem sunt aut Demosthenem imitati. ego autem<sup>11</sup>

- dicam enim, ut res est — dum me ambitio, dum honores, dum causae, dum rei publicae non solum cura, sed quaedam etiam procuratio multis officiis implicatum

- et constrictum tenebat, haec inclusa habebam et, ne obsolescerent, renovabam, cum licebat, legendo: nunc vero et fortunae gravissimo percussus vulnere et administratione rei publicae liberatus doloris medicinam a philosophia peto et otii oblectationem hanc honestissimam iudico; aut enim huic aetati hoc maxime aptum est, aut iis rebus, si quas dignas laude gessimus, hoc in primis consentaneum, aut etiam ad nostros civis erudiendos nihil utilius, aut, si haec ita non sunt, nihil aliud video
- <sup>12</sup> quod agere possimus. Brutus quidem noster, excellens omni genere laudis, sic philosophiam Latinis litteris persequitur, nihil ut isdem de rebus Graeca desideres, et eandem quidem sententiam sequitur quam tu; nam Aristum Athenis auditv aliquam diu, cuius tu fratrem Antiochum: quam ob rem da, quaeso, te huic etiam generi litterarum.
- <sup>4</sup> Tum ille: 'istuc quidem considerabo, nec vero sine  
<sup>13</sup> te. sed de te ipso quid est,' inquit 'quod audio?' 'quanam' inquam 'de re?' 'relictam a te veterem Academiam,' inquit 'tractari autem novam.' 'quid? ergo' inquam 'Antiocho id magis licuerit, nostro familiari, remigrare in domum veterem e nova quam nobis in novam e vetere? certe enim recentissima quaeque sunt correcta et emendata maxime: quamquam Antiochi magister Philo, magnus vir, ut tu existimas ipse, negat in libris, quod coram etiam ex ipso audiebamus, duas Academias esse erroremque eorum, qui ita putarunt, coarguit.' 'est,' inquit 'ut dicis; sed ignorare te non arbitror, quae contra Philoniam  
<sup>14</sup> Antiochus scripsit.' 'immo vero et ista et totam veterem Academiam, a qua absum iam diu, renovari a te, nisi molestum est, velim;' et simul 'adsidamus,' inquam 'si videtur.' 'sane istuc quidem;' inquit 'sum enim admodum infirmus; sed videamus, idemne Attico placeat fieri a me, quod te velle video.' 'mihi vero;' ille 'quid est enim quod malim quam ex Antiocho iam pridem audita recordari et simul videre satiusne ea commode dici possint Latine?' quae cum dicta, in conspectu consedimus omnes.
- <sup>15</sup> Tum Varro ita exorsus est: 'Socrates mihi videtur, id quod constat inter omnis, primus a rebus occultis et ab ipsa natura involutis, in quibus omnes ante eum philo-

sophi occupati fuerunt, avocavisse philosophiam et ad vitam communem adduxisse, ut de virtutibus et vitiis omninoque de bonis rebus et malis quaereret, caelestia autem vel procul esse a nostra cognitione censeret, vel, si maxime cognita essent, nihil tamen ad bene vivendum. hic in omnibus fere sermonibus, qui ab iis, qui <sup>16</sup> illum audierunt, perscripti varie copioseque sunt, ita disputat, ut nihil adfirmet ipse, refellat alios; nihil se scire dicat nisi id ipsum, eoque praestare ceteris, quod illi quae nesciant scire se putent, ipse, se nihil scire, id unum sciat; ob eamque rem se arbitrari ab Apolline omnium sapientissimum esse dictum, quod haec esset una hominis sapientia, non arbitrari se scire quod nesciat. quae cum diceret constanter et in ea sententia permaneret, omnis eius oratio tantum in virtute laudanda et in hominibus ad virtutis studium cohortandis consumebatur, ut e Socraticorum libris maximeque Platonis intellegi potest. Platonis autem auctoritate, qui varius et multi- <sup>17</sup> plex et copiosus fuit, una et consentiens duobus vocabulis philosophiae forma instituta est, Academicorum et Peripateticorum, qui rebus congruentes nominibus differebant; nam cum Speusippum, sororis filium, Plato philosophiae quasi heredem reliquisset, duo autem praestantissimos studio atque doctrina, Xenocratem Calchedonium et Aristotelem Stagiritem, qui erant cum Aristotele Peripatetici dicti sunt, quia disputabant inambulantes in Lycio, illi autem, qui Platonis instituto in Academia, quod est alterum gymnasium, coetus erant et sermones habere soliti, e loci vocabulo nomen habuerunt. sed utrique Platonis ubertate completi certam quandam disciplinae formulam composuerunt et eam quidem plenam ac refertam, illam autem Socraticam dubitanter de omnibus rebus et nulla adfirmatione adhibita consuetudinem disserendi reliquerunt; ita facta est, quod minime Socrates probabat, ars quaedam philosophiae et rerum ordo et descriptio disciplinae. quae quidem erat primo <sup>18</sup> duobus, ut dixi, nominibus una; nihil enim inter Peripateticos et illam veterem Academiam differebat: abundantia quadam ingenii praestabat, ut mihi quidem videtur, Aristoteles, sed idem fons erat utrisque et eadem rerum



5 expetendarum fugiendarumque partitio. Sed quid ago?' inquit 'aut sumne sanus, qui haec vos doceo? nam etsi non sus Minervam, ut aiunt, tamen inepte quisquis Minervam docet.' tum Atticus 'tu vero' inquit 'perge, Varro; valde enim amo nostra atque nostros, meque ista delectant, cum Latine dicuntur et isto modo.' 'quid me' inquam 'putas, qui philosophiam iam professus sim populo nostro me exhibiturum?' 'pergamus igitur,' inquit

<sup>19</sup> 'quoniam placet. Fuit ergo iam accepta a Platone philosophandi ratio triplex: una de vita et moribus, altera de natura et rebus occultis, tertia de disserendo et, quid verum quid falsum, quid rectum in oratione pravumve, quid consequens quid repugnans, iudicando. ac primum illam partem bene vivendi a natura petebant eique parendum esse dicebant, neque ulla alia in re nisi in natura quaerendum esse illud summum bonum, quo omnia referrentur; constituiebantque extremum esse rerum expetendarum et finem bonorum, adeptum esse omnia a natura et animo et corpore et vita. corporis autem alia ponebant esse in toto, alia in partibus: valetudinem, viris, pulchritudinem in toto, in partibus autem sensus integros et praestantiam aliquam partium singularum, ut in pedibus celeritatem, vim in manibus, claritatem in voce, in lingua

<sup>20</sup> etiam explanatam vocum impressionem; animi autem, quae essent ad comprehendendam virtutem idonea; eaque ab iis in naturam et in mores dividebantur. naturae celeritatem ad discendum et memoriam dabant, quorum utrumque mentis esset proprium et ingenii; morum autem putabant studia esse et quasi consuetudinem, quam partim exercitationis adsiduitate, partim ratione formabant, in quibus erat philosophia ipsa: in qua quod inchoatum est neque absolutum, progressio quaedam ad virtutem appellatur, quod autem absolutum, virtus, id est quasi perfectio naturae omniumque rerum, quas in animis ponunt,

<sup>21</sup> una res optima. ergo haec animorum: vitae autem — id enim erat tertium — adiuncta esse dicebant, quae ad virtutis usum valerent; nam virtus in animi bonis et in corporis cernitur et in quibusdam, quae non tam naturae quam beatæ vitae adiuncta sunt; hominem enim esse censebant quasi partem quandam civitatis et universi generis

humani, eumque esse coniunctum cum omnibus communi quadam societate. ac de summo quidem atque naturali bono sic agunt; cetera autem pertinere ad id putant aut adaugendum aut tenendum, ut divitias, ut opes, ut gloriam, ut gratiam. ita tripartita ab iis inducitur ratio bonorum. atque haec illa sunt tria genera, quae putant plerique Peripateticos dicere: id quidem non falso; est enim haec partitio illorum: illud imprudenter, si alios esse Academicos, qui tum appellabantur, alios Peripateticos arbitrantur. communis haec ratio et utrisque hic bonorum finis videbatur, adipisci, quae essent prima natura quaeque ipsa per sese expetenda, aut omnia aut maxima; ea sunt autem maxima, quae in ipso animo atque in ipsa virtute versantur. itaque omnis illa antiqua philosophia sensit in una virtute esse positam beatam vitam, nec tamen beatissimam, nisi adiungerentur et corporis et cetera, quae supra dicta sunt, ad virtutis usum idonea. ex hac descriptione agendi quoque aliquid in vita et officii ipsius initium reperiebatur, quod erat in conservatione earum rerum, quas natura praescriberet. hinc gignebatur fuga desidia voluptatumque contemptio, ex quo laborum dolorumque susceptio multorum magnorumque recti honestique causa et earum rerum, quae erant congruentes cum praescriptione naturae, unde et amicitia exsistebat et iustitia atque aequitas; eaeque et voluptatibus et multis vitae commodis anteponebantur. haec quidem fuit apud eos morum institutio et eius partis, quam primam posui, forma atque descriptio.

De natura autem — id enim sequebatur — ita dicebant, ut eam dividerent in res duas, ut altera esset efficiens, altera autem quasi huic se praebens, ea qua efficeretur aliquid. in eo, quod efficeret, vim esse censebant, in eo autem, quod efficeretur, materiam quandam; in utroque tamen utrumque: neque enim materiam ipsam cohaerere potuisse, si nulla vi contineretur, neque vim esse sine aliqua materia; nihil est enim quod non alicubi esse cogatur. sed quod ex utroque, id iam corpus et quasi qualitatem quandam nominabant; dabitur enim profecto, ut in rebus inusitatis, quod Graeci ipsi faciunt, a quibus haec iam diu tractantur, utamur verbis inter-

7 dum inauditis.' 'nos vero,' inquit Atticus 'quin etiam  
<sup>25</sup> Graecis licebit utare, cum voles, si te Latina forte deficient.' 'bene sane facis; sed enitar ut Latine loquar, nisi in huiusce modi verbis, ut philosophiam aut rhetoricam aut physicam aut dialecticam appellem, quibus, ut aliis multis, consuetudo iam utitur pro Latinis. qualitates igitur appellavi, quas *ποιότητες* Graeci vocant; quod ipsum apud Graecos non est volgi verbum, sed philosophorum, atque id in multis; dialecticorum vero verba nulla sunt publica; suis utuntur. et id quidem commune omnium fere est artium: aut enim nova sunt rerum novarum facienda nomina aut ex aliis transferenda. quod si Graeci faciunt, qui in his rebus tot iam saecula versantur, quanto id nobis magis concedendum est, qui haec  
<sup>26</sup> nunc primum tractare conamur?' 'tu vero,' inquam 'Varro, bene etiam meriturus mihi videris de tuis civibus, si eos non modo copia rerum auxeris, uti fecisti, sed etiam verborum.' 'audebimus ergo' inquit 'novis verbis uti te auctore, si necesse erit. earum igitur qualitatum sunt aliae principes, aliae ex iis ortae: principes sunt unius modi et simplices, ex iis autem ortae variae sunt et quasi multiformes. itaque aër — hoc quoque utimur iam pro Latino — et ignis et aqua et terra primae sunt, ex iis autem ortae animantium formae earumque rerum, quae gignuntur e terra. ergo illa initia et, ut e Graeco vertam, elementa dicuntur: e quibus aër et ignis movendi vim habent et efficiendi, reliqua partis accipiendi et quasi patiendi, aquam dico et terram. quintum genus, e quo essent astra mentesque, singulare eorumque quattuor, quae supra dixi, dissimile Aristoteles quoddam esse re-  
<sup>27</sup> batur. sed subiectam putant omnibus sine ulla specie atque carentem omni illa qualitate — faciamus enim tractando usitatus hoc verbum et tritius — materiam quandam, e qua omnia expressa atque efficta sint: quae formas omnis accipere possit omnibusque modis mutari atque ex omni parte; eoque etiam interire, non in nihilum, sed in suas partis, quae infinite secari ac dividi possint, cum sit nihil omnino in rerum natura minimum, quod dividi nequeat; quae autem moveantur, omnia intervallis  
<sup>28</sup> moveri, quae intervalla item infinite dividi possint. et

cum ita moveatur illa vis, quam qualitatem esse diximus, et cum sic ultro citroque versetur, et materiam ipsam totam penitus commutari putant et illa effici, quae appellant qualia; e quibus, omni natura cohaerente et continuata, cum omnibus suis partibus unum effectum esse mundum, extra quem nulla pars materiae sit nullumque corpus; partis autem esse mundi omnia, quae insint in eo, quae natura sentiente teneantur, in qua ratio perfecta insit, quae sit eadem sempiterna; nihil enim valentius esse, a quo intreat; quam vim animum esse dicunt <sup>29</sup> mundi eandemque esse mentem sapientiamque perfectam, quem deum appellant omniumque rerum, quae sunt ei subiectae, quasi prudentiam quandam, procurantem caelestia maxime, deinde in terris ea, quae pertineant ad homines; quam interdum eandem necessitatem appellant, quia nihil aliter possit atque ab ea constitutum sit evenire, quasi fatalem et immutabilem continuationem ordinis sempiterni; non numquam eandem fortunam, quod efficiat multa improvisa et necopinata nobis propter obscuritatem ignorationemque causarum.

Tertia deinde philosophiae pars, quae erat in ratione <sup>8</sup><sub>30</sub> et in disserendo, sic tractabatur ab utrisque: quamquam oreretur a sensibus, tamen non esse iudicium veritatis in sensibus; mentem volebant esse rerum iudicem; solam censebant idoneam cui crederetur, quia sola cerneret id, quod semper esset simplex et unius modi et tale quale esset. hanc illi *ιδέα* appellant, iam a Platone ita nominatam, nos recte speciem possumus dicere. sensus <sup>31</sup> autem omnis hebetes et tardos esse arbitrabantur, nec percipi ullo modo res ullas, quae subiectae sensibus viderentur, quod aut ita essent parvae, ut sub sensum cadere non possent, aut ita mobiles et concitatae, ut nihil umquam unum esset *et* constans, ne idem quidem, quia continenter laberentur et fluerent omnia. itaque hanc omnem partem rerum opinabilem appellabant. scien- <sup>32</sup> tiam autem nusquam esse censebant nisi in animi notionibus atque rationibus; qua de causa definitiones rerum probabant et has ad omnia, de quibus disceptabatur, adhibebant. verborum etiam explicatio probabatur, id est, qua de causa quaeque essent ita nominata, quam *ἔννο-*

*λογιστῶν* appellabant; post argumentis quibusdam et rerum notis quasi ducibus utebantur ad probandum et ad concludendum id, quod explanari volebant: in quo tradebatur omnis dialecticae disciplina, id est orationis ratione conclusae: huic quasi ex altera parte oratoria vis dicendi adhibebatur, explicatrix orationis perpetuae ad persuadendum accommodatae.

- 33 Haec erat illis forma a Platone tradita, cuius quas acceperim dissipationes, si voltis, exponam.' 'nos vero volumus' inquam 'ut pro Attico etiam respondeam.' 'et recte,' inquit 'respondes; praeclare enim explicatur Peripateticorum et Academiae veteris auctoritas.' 'Aristoteles 9 igitur primus species, quas paulo ante dixi, labefactavit, quas mirifice Plato erat amplexatus, ut in iis quiddam divinum esse diceret. Theophrastus autem, vir et oratione suavis et ita moratus, ut probitatem quandam praese et ingenuitatem ferret, vehementius etiam fregit quodam modo auctoritatem veteris disciplinae; spoliavit enim virtutem suo decore inbecillamque reddidit, quod negavit 34 in ea sola positum esse beate vivere; nam Strato, eius auditor, quamquam fuit acri ingenio, tamen ab ea disciplina omnino semovendus est: qui cum maxime necessariam partem philosophiae, quae posita est in virtute et moribus, reliquisset totumque se ad investigationem naturae contulisset, in ea ipsa plurimum dissedit a suis; Speusippus autem et Xenocrates, qui primi Platonis rationem auctoritatemque susceperant, et post eos Polemo et Crates unaque Crantor, in Academia congregati, diligenter ea, quae a superioribus acceperant, tuebantur. iam Polemonem audiverant adsidue Zeno et Arcesilas; 35 sed Zeno, cum Arcesilam anteiret aetate valdeque subtiliter dissereret et peracute † moveretur, corrigere conatus est disciplinam.

Eam quoque, si videtur, correctionem explicabo, sicut solebat Antiochus.' 'mihi vero' inquam 'videtur; quod 10 vides idem significare Pomponium.' 'Zeno igitur nullo modo is erat, qui, ut Theophrastus, nervos virtutis incideret, sed contra qui omnia, quae ad beatam vitam pertinerent, in una virtute poneret nec quicquam aliud numeraret in bonis, idque appellaret honestum, quod esset

simplex quoddam et solum et unum bonum. cetera autem etsi nec bona nec mala essent, tamen alia secundum naturam dicebat, alia naturae esse contraria; his ipsis alia interiecta et media numerabat. quae autem secundum naturam essent, ea sumenda et quadam aestimatione dignanda docebat contraque contraria; neutra autem in mediis relinquebat, in quibus ponebat nihil omnino [esse] momenti. sed quae essent sumenda, ex iis alia pluris esse aestimanda, alia minoris: quae pluris, ea praeposita appellabat, reiecta autem, quae minoris; atque ut haec non tam rebus quam vocabulis commutaverat, sic inter recte factum atque peccatum officium et contra officium media locabat quaedam, recte facta sola in bonis actionibus ponens, prave, id est peccata, in malis; officia autem [et] servata praetermissaque media putabat, ut dixi. cumque superiores non omnem virtutem in ratione esse dicerent, sed quasdam virtutes natura aut more perfectas, hic omnis in ratione ponebat; cumque illi ea genera virtutum, quae supra dixi, seiungi posse arbitrarentur, hic nec id ullo modo fieri posse disserebat, nec virtutis usum modo, ut superiores, sed ipsum habitum per se esse praeclarum; nec tamen virtutem cuiquam adesse, quin ea semper uteretur; cumque perturbationes animi illi ex homine non tollerent naturaque et condolescere et concupiscere et extimescere et efferri laetitia dicerent, sed eas contraherent in angustumque deducerent, hic omnibus his quasi morbis voluit carere sapientem; cumque eas perturbationes antiqui naturalis esse dicerent et rationis expertis, aliaque in parte animi cupiditatem, in alia rationem conlocarent, ne his quidem adsentiebatur; nam et perturbationes voluntarias esse putabat opinionisque iudicio suscipi, et omnium perturbationum matrem esse arbitrabatur immoderatam quandam intemperantiam. haec fere de moribus.

De naturis autem sic sentiebat, primum uti quattuor initiis rerum illis quintam hanc naturam, ex qua superiores sensus et mentem effici rebantur, non adhiberet; statuebat enim ignem esse ipsam naturam, quae cuique gigneret mentem atque sensus. discrepabat etiam ab isdem, quod nullo modo arbitrabatur quicquam effici posse ab ea, quae expers esset corporis,

cuius generis Xenocrates et superiores etiam animum esse dixerant; nec vero aut quod efficeret aliquid aut quod  
 40 efficeretur posse esse non corpus. Plurima etiam in illa tertia philosophiae parte mutavit: in qua primum de sensibus ipsis quaedam dixit nova, quos iunctos esse censuit e quadam quasi impulsione oblata extrinsecus — quam ille *φαντασταν*, nos visum appellemus licet; et teneamus hoc quidem verbum; erit enim utendum in reliquo sermone saepius —; sed ad haec, quae visa sunt et quasi accepta sensibus, adsensionem adiungit animorum, quam  
 41 esse volt in nobis positam et voluntariam. visis non omnibus adiungebat fidem, sed iis solum, quae propriam quandam haberent declarationem earum rerum, quae viderentur; id autem visum, cum ipsum per se cerneretur, comprehendibile, — feretis hoc? ‘nos vero,’ inquam ‘quonam enim alio modo *καταληπτόν* diceres?’ — sed, cum acceptum iam et adprobatum esset, comprehensionem appellabat, similem iis rebus, quae manu prederentur; ex quo etiam nomen hoc duxerat, cum eo verbo antea nemo tali in re usus esset; plurimisque idem novis verbis — nova enim dicebat — usus est. quod autem erat sensu comprehensum, id ipsum sensum appellabat et, si ita erat comprehensum, ut convelli ratione non posset, scientiam, sin aliter, inscientiam nominabat; ex qua existeret etiam opinio, quae esset inbecilla et cum  
 42 falso incognitoque communis. sed inter scientiam et inscientiam comprehensionem illam, quam dixi, conlocabat eamque neque in rectis neque in pravis numerabat, sed soli credendum esse dicebat. e quo sensibus etiam fidem tribuebat, quod, ut supra dixi, comprehensio facta sensibus et vera esse illi et fidelis videbatur, non quod omnia, quae essent in re, comprehenderet, sed quia nihil, quod cadere in eam posset, relinqueret, quodque natura quasi normam scientiae et principium sui dedisset, unde postea notiones rerum in animis inprimerentur, e quibus non principia solum, sed latiores quaedam ad rationem inveniendam viae aperirentur; errorem autem et temeritatem et ignorantiam et opinionem et suspensionem et uno nomine omnia, quae essent aliena firmæ et constantis adsensionis, a virtute sapientiaque removebat. atque in

his fere commutatio constitit omnis dissensioque Zenonis a superioribus.'

Quae cum dixisset, 'breviter sane minimeque obscure exposita est' inquam 'a te, Varro, et veteris Academiae ratio et Stoicorum: † verum esse autem arbitror, ut Antiocho, nostro familiari, placebat, correctionem veteris Academiae potius quam novam aliquam disciplinam putandam.' tunc Varro ' tuae sunt nunc partes,' inquit 'qui ab antiquorum ratione desciscis et ea, quae ab Arcesila novata sunt, probas, docere, quod et qua de causa discidium factum sit, ut videamus satisne ista sit iusta defectio.' tum ego 'cum Zenone,' inquam 'ut accepimus, 44 Arcesilas sibi omne certamen instituit, non pertinacia aut studio vincendi, ut mihi quidem videtur, sed earum rerum obscuritate, quae ad confessionem ignorationis adduxerant Socratem et iam ante Socratem Democritum, Anaxagoram, Empedoclem, omnis paene veteres, qui nihil cognosci, nihil percipi, nihil sciri posse dixerunt: angustos sensus, inbecillos animos, brevita curricula vitae, et, ut Democritus, in profundo veritatem esse demersam, opinionibus et institutis omnia teneri, nihil veritati relinqui, denique omnia tenebris circumfusa esse [dixerunt]. ita- 45 que Arcesilas negabat esse quicquam quod sciri posset, ne illud quidem ipsum, quod Socrates sibi reliquisset; sic omnia latere censebat in occulto, neque esse quicquam, quod cerni aut intellegi posset; quibus de causis nihil oportere neque profiteri neque adfirmare quemquam neque adsensione adprobare, cohibereque semper et ab omni lapsu continere temeritatem, quae tum esset insignis, cum aut falsa aut incognita res adprobaretur; neque hoc quicquam esse turpius quam cognitioni et perceptioni adsensionem adprobationemque praecurrere. huic rationi quod erat consentaneum faciebat, ut contra omnium sententias disserens de sua plerosque deduceret, ut, cum in eadem re paria contrariis in partibus momenta rationum invenirentur, facilius ab utraque parte adsensio sustineretur. hanc Academiam novam appell- 46 lant, quae mihi vetus videtur, si quidem Platonem ex illa vetere numeramus, cuius in libris nihil adfirmatur et in utramque partem multa disseruntur, de omnibus quaeritur,



nihil certi dicitur: sed tamen illa, quam exposuisti, vetus, haec nova nominetur, quae usque ad Carneadem perducta, qui quartus ab Arcesila fuit, in eadem Arcesilae ratione permansit. Carneades autem nullius philosophiae partis ignarus et, ut cognovi ex iis, qui illum audierant, maximeque ex Epicureo Zenone, qui cum ab eo plurimum dissentiret, unum tamen praeter ceteros mirabatur, incredibili quadam fuit facultate et copia dicendi \*\*\*

---

M. TULLII CICERONIS  
ACADEMICORUM PRIORUM  
LIBER SECUNDUS  
QUI INSCRIBITUR LUCULLUS.

ARGUMENTUM.

In hoc libro post prooemium de laudibus Luculli, de instituto suo, de occasione ineundae huius disputationis, Lucullus c. 4 sq. ingreditur disputationem contra Academicos et Philonem ab Antiocho acceptam, quocum saepe fuerat. Eius summa haec est: esse *καταληπτά*, quae comprehendere possint, hoc est, e definitione Zenonis, quam reiciebat Philo, talia visa (*φαντασίαι*) impressa et effecta ex eo, unde sint, qualia esse non possint ex eo, unde non sint, c. 6 extr., in quo tota controversia agitur. Initio facto a sensibus ostendit sensuum iudicia vera et certa esse, si sani sint et valentes et omnia removeantur, quae obstant et impediunt, imprimis si exercitatio et ars adhibeatur; ex his igitur visis oriri *ἐννοίας*, notitias, quae si falsae aut incertae sint, omnem rerum et cognitionem et memoriam tolli; maxime vero virtutum cognitionem documento esse, multa et comprehendere posse et percipi. Ergo si qui comprehendere quicquam posse negent, eos ipsam virtutem tollere, immo vitam evertere funditus et animal animo orbare, c. 7—10. Deinde cum horum reicit sententiam, qui certum esse quicquam negant, veri simile concedunt, quod sublata veri et falsi notione et constituta communitate veri cum falso similitudo veri iudicari non possit, tum eorum rationem, qui, percepta cum negent, perspicua largiuntur: neque enim perspicuum esse quicquam posse, v. c. avem albam esse, quando accidere possit, ut eadem sit nigra, c. 10. 11. Quoniam autem perceptio cum adensione coniuncta sit, hanc docet esse certissimam c. 12. His disputatis et expositis c. 13 totius Academicorum rationis fundamentis, ostendit aut eorum ratiocinationes, quibus nihil comprehendere contendunt, incertas esse aut falsum id, quod disputent, c. 14. Sed ut pares esse Academicis possimus neque a veritate desciscamus, necesse esse primo quae pro perspicuitate responderi possint teneamus, deinde captiosis eorum interrogationibus occurrere possimus, c. 15. Itaque explicatis c. 15 tribus Academicorum argumentis, quorum primum et ultimum est genus illud interrogandi, quod soriten veteres vocabant, quibus contendunt nihil inter visa falsa et vera interesse, iis c. 16, 17, 18 respondet et totum illud genus interrogandi tamquam vitiosum reicit. His singulis deinde respondet Cicero, postea quam primo se Lucullo excusavit de philosophiae Academicae studio,

magnum se opinatorem esse confessus, c. 20, 21; deinde de Antiochi in deserenda Philonis disciplina levitate pauca dixit c. 22. Commemoratis ergo summorum hominum auctoritatibus, qui nihil certi esse contenderint, c. 23, 24 sensuum veritatem impugnat. Aut cum Epicuro dicendum esse sensus numquam fallere hominem et, si semel mentiti sint, numquam iis credendum, aut cum Lucullo alia sensuum visa esse vera, alia falsa: quo sumpto nullam verorum a falsis discernendorum notam relinqui, c. 25, 26. Male autem illud obici, artificiiis adhibitis et cogitatione effici posse ut intellegamus aliter res esse ac videantur, somnia, ubi evigilaverimus, falsa putari et visa vinolentorum et furiosorum, ubi se receperint. Nam de hoc non disputari, sed qualia haec videantur, cum videantur, id quaeri. Non enim esse dubium quin, cum videantur, probentur, ex quo efficiatur inter visa vera et falsa ad animi adsensum nihil interesse, c. 27, 28. Neque rationem magis quicquam ac sensus percipere. Nam quod dialecticae multum Stoici tribuant, primum non posse dialecticum v. c. de rebus geometricis iudicare, nisi geometriam didicerit, deinde non posse solvere soritas, propterea quod natura nobis eam cognitionem negarit, ut ullius rei fines statuere possimus, idque magno argumento esse falsam esse illam definitionem, effectum esse id, quod aut verum aut falsum sit, c. 28—30. Quod sublata perceptione, quamvis relicta probabilitate, vitam omnem, sensum, memoriam, artem etc. tolli putet, in eo valde errare. Nam in plerisque actionibus, vel Stoicis consentientibus, tanquam in navigando probabilitate homines duci eamque ad actiones sufficere; eadem sentire Academicum quae Stoicum, nihil mutari, iudicio tantum utrumque discrepare, quod ad ipsos sensus nullam vim habeat: memoria etiam errores, non tantum comprehensa, teneri, in artibus autem plerisque nos probabilitate duci, nihil dialectica opus esse, c. 30—34. Neque vero ex Antiochi mente eum repugnantia dicere, qui visa concedat aut vera esse aut falsa, nihil tamen inter se differre contendat. Neque enim verum ab Academicis omnino tolli, sed tantum percipiendi signum, c. 34. A cap. 35 deinceps usque ad c. 47 copiosam addit disputationem de summorum philosophorum dissensionibus in omnibus philosophiae partibus: ex quo pateat nihil exploratum esse, sed in omnibus probabilitatem esse sequendam, atque etiam, id quod omnes praeter Stoicos concedant, sapientem posse opinari.

- <sup>1</sup> Magnum ingenium L. Luculli magnumque optimarum artium studium, tum omnis liberalis et digna homine nobili ab eo percepta doctrina, quibus temporibus florere in foro maxime potuit, caruit omnino rebus urbanis. ut enim admodum adulescens cum fratre pari pietate et industria praedito paternas inimicitias magna cum gloria est persecutus, in Asiam quaestor profectus, ibi per mul-

tos annos admirabili quadam laude provinciae praefuit; deinde absens factus aedilis, continuo praetor — licebat enim celerius legis praemio —, post in Africam, inde ad consulatum; quem ita gessit, ut diligentiam admirarentur omnes, ingenium agnoscerent. post ad Mithridaticum bellum missus a senatu non modo opinionem vicit omnium, quae de virtute eius erat, sed etiam gloriam superiorum. idque eo fuit mirabilius, quod ab eo laus imperatoria non admodum exspectabatur, qui adulescentiam in forensi opera, quaesturae diuturnum tempus, Murena bellum in Ponto gerente, in [Asia] pace consumpserat. sed incredibilis quaedam ingenii magnitudo non desideravit indocilem usus disciplinam. itaque cum totum iter et navigationem consumpsisset partim in percontando a peritis, partim in rebus gestis legendis, in Asiam factus imperator venit, cum esset Roma profectus rei militaris rudis. habuit enim divinam quandam memoriam rerum, verborum maiorem Hortensius — sed, quo plus in negotiis gerendis res quam verba prosunt, hoc erat memoria illa praestantior; quam fuisse in Themistocle, quem facile Graeciae principem ponimus, singularem ferunt: qui quidem etiam pollicenti cuidam se artem ei memoriae, quae tum primum proferebatur, traditurum respondisse dicitur oblivisci se malle discere: credo, quod haerebant in memoria quaecumque audierat et viderat. tali ingenio praeditus Lucullus adiunxerat etiam illam, quam Themistocles spreverat, disciplinam; itaque, ut litteris consignamus quae monumentis mandare volumus, sic ille in animo res insculptas habebat. tantus ergo imperator in omni genere belli fuit, proeliis, oppugnationibus, navalibus pugnis totiusque belli instrumento et adparatu, ut ille rex post Alexandrum maximus hunc a se maiorem ducem cognitum quam quemquam eorum, quos legisset, fateretur. in eodem tanta prudentia fuit in constituendis temperandisque civitatibus, tanta aequitas, ut hodie stet Asia Luculli institutis servandis et quasi vestigiis persequendis. sed etsi magna cum utilitate rei publicae, tamen diutius quam vellem tanta vis virtutis atque ingenii peregrinata afuit ab oculis et fori et curiae. quin etiam, cum victor a Mithridatico

- bello revertisset, inimicorum calumnia triennio tardius quam debuerat triumphavit; nos enim consules introduximus paene in urbem currum clarissimi viri, cuius mihi consilium et auctoritas quid tum in maximis rebus profuisset dicerem, nisi de me ipso dicendum esset, quod hoc tempore non est necesse. ita privabo potius illum debito testimonio quam id cum mea laude communicem.
- <sup>2</sup> sed quae populari gloria decorari in Lucullo debuerunt,  
<sup>4</sup> ea fere sunt et Graecis litteris celebrata et Latinis; nos autem illa externa cum multis, haec interiora cum paucis ex ipso saepe cognovimus: maiore enim studio Lucullus cum omni litterarum generi, tum philosophiae deditus fuit, quam qui illum ignorabant arbitrabantur, nec vero ineunte aetate solum, sed et pro quaestore aliquot annos et in ipso bello, in quo ita magna rei militaris esse occupatio solet, ut non multum imperatori sub ipsis pelli-  
bus otii relinquatur. cum autem e philosophis ingenio scientiaeque putaretur Antiochus, Philonis auditor, excellere, eum secum et quaestor habuit et post aliquot annos imperator, quique esset ea memoria, qua ante dixi, ea saepe audiendo facile cognovit, quae vel semel audita meminisse potuisset. delectabatur autem mirifice lectione librorum, de quibus audiebat.
- <sup>5</sup> At vereor interdum ne talium personarum, cum amplificare velim, minuam etiam gloriam. sunt enim multi, qui omnino Graecas non ament litteras, plures, qui philosophiam, reliqui, qui etiam si haec non inproben, tamen earum rerum disputationem principibus civitatis non ita decoram putent. ego autem, cum Graecas litteras M. Catonem in senectute didicisse acceperim, P. autem A. Africani historiae loquantur in legatione illa nobili, quam ante censuram obiit, Panaetium unum omnino comitem fuisse, nec litterarum Graecarum nec philosophiae iam  
<sup>6</sup> ullum auctorem requiro. restat ut iis respondeam, qui sermonibus eius modi nolint personas tam gravis inligari: quasi vero clarorum virorum aut tacitos congressus esse oporteat aut ludicros sermones aut rerum conloquia leviorum! etenim, si quodam in libro vere est a nobis philosophia laudata, profecto eius tractatio optimo atque amplissimo quoque dignissima est, nec quicquam aliud

videndum est nobis, quos populus Romanus hoc in gradu conlocavit, nisi ne quid privatis studiis de opera publica detrahamus. quod si, cum fungi munere debebamus, non modo operam nostram numquam a populari coetu removimus, sed ne litteram quidem ullam fecimus nisi forensem, quis reprehendet otium nostrum, qui in eo non modo nosmet ipsos hebescere et languere nolumus, sed etiam ut plurimis prosimus enitimur? gloriam vero non modo non minui, sed etiam augeri arbitramur eorum, quorum ad popularis inlustrisque laudes has etiam minus notas minusque pervolgatas adiungimus. sunt etiam qui negent in his, qui in nostris libris disputent, fuisse earum rerum, de quibus disputatur, scientiam: qui mihi videntur non solum vivis, sed etiam mortuis invidere. restat <sup>3</sup> unum genus reprehensorum, quibus Academiae ratio non probatur; quod gravius ferremus, si quisquam ullam disciplinam philosophiae probaret praeter eam, quam ipse sequeretur. nos autem, quoniam contra omnis, qui *se scire arbitrantur*, dicere quae videntur solemus, non possumus, quin alii a nobis dissentiant, recusare: quamquam nostra quidem causa facilis est, qui verum invenire sine ulla contentione volumus, idque summa cura studioque conquirimus. etsi enim omnis cognitio multis est obstructa difficultatibus eaque est et in ipsis rebus obscuritas et in iudiciis nostris infirmitas, ut non sine causa antiquissimi et doctissimi invenire se posse quod cuperent diffisi sint, tamen nec illi defecerunt neque nos studium exquirendi defatigati relinquemus; neque nostrae disputationes quicquam aliud agunt nisi ut in utramque partem dicendo eliciant et tamquam exprimant aliquid, quod aut verum sit aut ad id quam proxime accedat. nec inter nos et eos, qui *se scire arbitrantur*, quicquam <sup>8</sup> interest, nisi quod illi non dubitant quin ea vera sint quae defendunt, nos probabilia multa habemus, quae sequi facile, adfirmare vix possumus. hoc autem liberiores et solutiores sumus, quod integra nobis est iudicandi potestas, nec ut omnia, quae praescripta et quasi imperata sint, defendamus necessitate ulla cogimur. nam ceteri primum ante tenentur adstricti, quam quid esset optimum iudicare potuerunt; deinde infirmissimo tempore

aetatis aut obsecuti amico cuidam aut una alicuius, quem primum audierunt, oratione capti de rebus incognitis iudicant et, ad quamcumque sunt disciplinam quasi tempestate delati, ad eam tamquam ad saxum adhaerescunt. nam quod dicunt omnia se credere ei, quem iudicent fuisse sapientem, probarem, si id ipsum rudes et indocti iudicare potuissent — statuere enim, qui sit sapiens, vel maxime videtur esse sapientis —, sed, ut *potuerint*, potuerunt omnibus rebus auditis, cognitis etiam reliquorum sententiis, iudicaverunt autem re semel audita *atque* ad unius se auctoritatem contulerunt. sed nescio quo modo plerique errare malunt eamque sententiam, quam adamarunt, pugnacissime defendere quam sine pertinacia, quid constantissime dicatur, exquirere.

Quibus de rebus et alias saepe nobis multa quaesita et disputata sunt et quondam in Hortensii villa, quae est ad Baulos, cum eo Catulus et Lucullus nosque ipsi postridie venissemus quam apud Catulum fuissemus; quo quidem etiam maturius venimus, quod erat constitutum, si ventus esset, Lucullo in Neapolitanum, mihi in Pompeianum navigare. cum igitur pauca in xysto locuti essemus, tum eodem in spatio consedimus. hic Catulus<sup>4</sup>  
<sup>10</sup> ‘etsi heri’ inquit ‘id quod quaerebatur paene explicatum est, ut tota fere quaestio tractata videatur, tamen exspecto ea, quae te pollicitus es, Luculle, ab Antiocho audita dicturum.’ ‘equidem’ inquit Hortensius ‘feci plus quam vellem; totam enim rem Lucullo integram servatam oportuit. et tamen fortasse servata est; a me enim ea, quae in promptu erant, dicta sunt, a Lucullo autem reconditiora desidero.’ tum ille ‘non sane,’ inquit ‘Hortensi, conturbat me exspectatio tua, etsi nihil est iis, qui placere volunt, tam adversarium; sed quia non laboro, quam valde ea, quae dico, probaturus sim, eo minus conturbor; dicam enim nec mea et ea, in quibus, si non fuerint, vinci me malim quam vincere. sed me hercule, ut quidem nunc se causa habet, etsi hesterno sermone labefactata est, mihi tamen videtur esse verissima. agam igitur, sicut Antiochus agebat; nota enim mihi res est: nam et vacuo animo illum audiebam et magno studio, eadem de re etiam saepius, ut etiam maiorem exspecta-

tionem mei faciam quam modo fecit Hortensius.' cum ita esset exorsus, ad audiendum animos ereximus. at ille 'cum Alexandriae pro quaestore' inquit 'essem, fuit Antiochus mecum, et erat iam antea Alexandriae familiaris Antiochi Heraclitus Tyrius, qui et Clitomachum multos annos et Philonem audierat, homo sane in ista philosophia, quae nunc prope dimissa revocatur, probatus et nobilis, cum quo Antiochum saepe disputantem audiebam, sed utrumque leniter; et quidem isti libri duo Philonis, de quibus heri dictum a Catulo est, tum erant adlati Alexandriam tumque primum in Antiochi manus venerant; et homo natura lenissimus — nihil enim poterat fieri illo mitius — stomachari tamen coepit. mirabar; nec enim umquam ante videram. at ille, Heracliti memoriam inplorans, quaerere ex eo, viderenturne illa Philonis aut ea num vel e Philone vel ex ullo Academico audivisset aliquando? negabat: Philonis tamen scriptum agnoscebat; nec id quidem dubitari poterat; nam aderant mei familiares, docti homines, P. et C. Seli et Tetrilius Rogus, qui se illa audivisse Romae de Philone et ab eo ipso illos duo libros dicerent descripsisse. tum et illa dixit Antiochus, quae heri Catulus commemoravit a patre suo dicta Philoni, et alia plura; nec se tenuit quin contra suum doctorem librum etiam ederet, qui Sosus inscribitur. tum igitur et cum Heraclitum studiose audirem contra Antiochum disserentem et item Antiochum contra Academicos, dedi Antiocho operam diligentius, ut causam ex eo totam cognoscerem. itaque compluris dies adhibito Heraclito doctisque compluribus et in iis Antiochi fratre, Aristo, et praeterea Aristone et Dione, quibus ille secundum fratrem plurimum tribuebat, multum temporis in ista una disputatione consumpsimus. sed ea pars, quae contra Philonem erat, praetermittenda est; minus enim acer est adversarius is, qui ista, quae sunt heri defensa, negat Academicos omnino dicere: etsi enim mentitur, tamen est adversarius lenior. ad Arcesilan Carneademque veniamus.' quae cum dixisset, sic rursus exorsus est: 'primum mihi videmini — me autem nomine appellabat —, cum veteres physicos nominatis, facere idem, quod seditiosi cives solent, cum



aliquos ex antiquis claros viros proferunt, quos dicant fuisse popularis, ut eorum ipsi similes esse videantur. repetunt iam a P. Valerio, qui exactis regibus primo anno consul fuit, commemorant reliquos, qui leges popularis de provocationibus tulerint, cum consules essent; tum ad hos notiores, C. Flaminium, qui legem agrariam aliquot annis ante secundum Punicum bellum tribunus pl. tulerit invito senatu et postea bis consul factus sit, L. Cassium, Q. Pompeium: illi quidem etiam P. Africanum referre in eundem numerum solent; duo vero sapientissimos et clarissimos fratres, P. Crassum et P. Scaevolam, aiunt Ti. Graccho legum auctores fuisse, alterum quidem [ut videmus] palam, alterum [ut suspicantur] obscurius. addunt etiam C. Marium; et de hoc quidem nihil mentiuntur. horum nominibus tot virorum atque tantorum expositis, eorum se institutum sequi dicunt: similiter vos, cum perturbare, ut illi rem publicam, sic vos philosophiam bene iam constitutam velitis, Empedoclen, Anaxagoran, Democritum, Parmeniden, Xenophanem, Platonem etiam et Socratem profertis; sed neque Saturninus, ut nostrum inimicum potissimum nominem, simile quicquam habuit veterum illorum, nec Arcesilae calumnia conferenda est cum Democriti verecundia. et tamen isti physici raro admodum, cum haerent aliquo loco, exclamant quasi mente incitati, Empedocles quidem, ut interdum mihi furere videatur, abstrusa esse omnia, nihil nos sentire, nihil cernere, nihil omnino quale sit posse reperire: maiorem autem partem mihi quidem omnes isti videntur nimis etiam quaedam adfirmare plusque  
<sup>14</sup> profiteri se scire quam sciant. quod si illi tum in novis rebus, quasi modo nascentes, haesitaverunt, nihilne tot saeculis, summis ingeniis, maxumis studiis explicatum putamus? nonne, cum iam philosophorum disciplinae gravissimae constitissent, tum exortus est, ut in optuma re publica Ti. Gracchus, qui otium perturbaret, sic Arcesilas, qui constitutam philosophiam everteret et in eorum auctoritate delitisceret, qui negavissent quicquam sciri aut percipi posse? quorum e numero tollendus est et Plato et Socrates: alter, quia reliquit perfectissimam disciplinam, Peripateticos et Academicos, nominibus diffe-

rentis, re congruentis, a quibus Stoici ipsi verbis magis quam sententiis dissenserunt; Socrates autem de se ipse detrahens in disputatione plus tribuebat iis, quos volebat refellere; ita cum aliud diceret atque sentiret, libenter uti solitus est ea dissimulatione, quam Graeci *εἰσρωσται* vocant; quam ait etiam in Africano fuisse Fannius, idque propterea vitiosum in illo non putandum, quod idem fuerit in Socrate. sed fuerint illa veteribus, si voltis, incognita: 6  
nihilne est igitur actum, quod investigata sunt, postea<sup>16</sup> quam Arcesilas Zenoni, ut putatur, obtrectans, nihil novi reperienti, sed emendanti superiores inmutatione verborum, dum huius definitiones labefactare volt, conatus est clarissimis rebus tenebras obducere? cuius primo non admodum probata ratio, quamquam floruit cum acumine ingenii tum admirabili quodam lepore dicendi, proxime a Lacyde solo retenta est, post autem confecta a Carneade, qui est quartus ab Arcesila; audivit enim Hegesinum, qui Euandrum audierat, Lacydi discipulum, cum Arcesilae Lacydes fuisset. sed ipse Carneades diu tenuit — nam nonaginta vixit annos —, et qui illum audierant admodum floruerunt: e quibus industriae plurimum in Clitomacho fuit — declarat multitudo librorum —, ingenii non minus in Hagnone, in Charmada eloquentiae, in Melanthio Rhodio suavitatis. bene autem nosse Carneaden Stratoniceus Metrodorus putabatur. iam Clito-<sup>17</sup> macho Philo vester operam multos annos dedit; Philone autem vivo patrocinium Academiae non defuit. sed quod nos facere nunc ingredimur, ut contra Academicos disseramus, id quidam e philosophis, et ii quidem non mediocres, faciundum omnino non putabant; nec vero esse ullam rationem disputare cum iis, qui nihil probarent; Antipatrumque Stoicum, qui multus in eo fuisset, reprehendebant, nec definiri aiebant necesse esse, quid esset cognitio aut perceptio aut, si verbum e verbo volumus, comprehensio, quam *κατάληψις* illi vocant; eosque, qui persuadere vellent, esse aliquid quod comprehendere et percipi posset, inscianter facere dicebant, propterea quod nihil esset clarius *ἐναργεστά*, ut Graeci, perspicuitatem aut evidentiam nos, si placet, nominemus fabricemurque, si opus erit, verba, ne hic sibi — me appellabat iocans —

hoc licere soli putet: sed tamen orationem nullam putabant inlustriorem ipsa evidentia reperiri posse, nec ea, quae tam clara essent, definienda censebant. alii autem negabant se pro hac evidentia quicquam priores fuisse dicturos, sed ad ea, quae contra dicerentur, dici oportere  
 18 putabant, ne qui fallerentur. plerique tamen et definitiones ipsarum etiam evidentium rerum non improbant, et rem idoneam, de qua quaeratur, et homines dignos, quibuscum disseratur, putant. Philo autem, dum nova quaedam commovet, quod ea sustinere vix poterat, quae contra Academicorum pertinaciam dicebantur, et aperte mentitur, ut est reprehensus a patre Catulo, et, ut docuit Antiochus, in id ipsum se induit, quod timebat. cum enim ita negaret quicquam esse, quod comprehendi posset — id enim volumus esse *καταληπτόν* —, si illud esset, sicut Zeno definiret, tale visum — iam enim hoc pro *φαντασίᾳ* verbum satis hesterno sermone trivimus —, visum igitur inpressum effectumque ex eo, unde esset, quale esse non posset ex eo, unde non esset: — id nos a Zenone definitum rectissime dicimus; qui enim potest quicquam comprehendi, ut plane confidas perceptum id cognitumque esse, quod est tale, quale vel falsum esse possit? — hoc cum infirmat tollitque Philo, iudicium tollit incogniti et cogniti; ex quo efficitur nihil posse comprehendi: ita inprudens eo, quo minime volt, revolvitur. quare omnis oratio contra Academiam suscipitur a nobis, ut retineamus eam definitionem, quam Philo voluit evertere; quam nisi obtinemus, percipi nihil posse concedimus.

7  
 19 Ordiamur igitur a sensibus, quorum ita clara iudicia et certa sunt, ut, si optio naturae nostrae detur et ab ea deus aliqui requirat, contentane sit suis integris incorruptisque sensibus, an postulet melius aliquid, non videam quid quaerat amplius. nec vero hoc loco expectandum est, dum de remo inflexo aut de collo columbae respondeam; non enim is sum, qui quicquid videtur tale dicam esse quale videatur: Epicurus hoc viderit et alia multa. meo autem iudicio ita est maxima in sensibus veritas, si et sani sunt ac valentes et omnia removentur, quae obstant et impediunt. itaque et lumen mutari saepe volumus et situs earum rerum, quas intuemur, et intervalla

aut contrahimus aut diducimus, multaue facimus usque eo, dum aspectus ipse fidem faciat sui iudicii. quod idem fit in vocibus, in odore, in sapore, ut nemo sit nostrum, qui in sensibus sui cuiusque generis iudicium requirat acrius. adhibita vero exercitatione et arte [ut oculi p<sup>20</sup> ctura teneantur, aures cantibus,] quis est quin cernat, quanta vis sit in sensibus? quam multa vident pictores in umbris et in eminentia, quae nos non videmus! quam multa, quae nos fugiunt in cantu, exaudiunt in eo genere exercitati! qui primo inflatu tibicinis Antiopam esse aiunt aut Andromacham, cum id nos ne suspicemur quidem. nihil necesse est de gustatu et odoratu loqui, in quibus intelligentia, etsi vilior, est quaedam tamen. quid de tactu, et eo quidem, quem philosophi interiorem vocant, aut doloris aut voluptatis? in quo Cyrenaici solo putant veri esse iudicium, cui adsentiantur: — potestne igitur quisquam dicere inter eum, qui doleat, et inter eum, qui in voluptate sit, nihil interesse? aut, ita qui sentiet, non apertissime insaniat? atqui qualia sunt haec, <sup>21</sup> quae sensibus percipi dicimus, talia sequuntur ea, quae non sensibus ipsis percipi dicuntur, sed quodam modo sensibus, ut haec: ‘illud est album, hoc dulce, canorum illud, hoc bene olens, hoc asperum.’ animo iam haec tenemus comprehensa, non sensibus. ‘ille’ deinceps ‘equus est, ille canis.’ cetera series deinde sequitur, maiora nectens, ut haec, quae quasi expletam rerum comprehensionem amplectuntur: ‘si homo est, animal est mortale, rationis particeps.’ quo e genere nobis notitiae rerum inprimuntur, sine quibus nec intellegi quicquam nec quaeri disputarive potest. quod si essent falsae no- <sup>22</sup> titiae — *ἔννοιας* enim notitias appellare tu videbare —, si igitur essent eae falsae aut eius modi visis inpressae, qualia visa a falsis discerni non possent, quo tandem iis modo uteremur? quo modo autem, quid cuique rei consentaneum esset, quid repugnaret, videremus? memoriae quidem certe, quae non modo philosophiam, sed omnis vitae usus omnisque artis una maxime continet, nihil omnino loci relinquitur. quae potest enim esse memoria falsorum? aut quid quisquam meminit, quod non animo comprehendit et tenet? ars vero quae potest esse nisi

quae non ex una et duabus, sed ex multis animi perceptionibus constat? quas si subtraxeris, qui distingues artificem ab inscio? non enim fortuito hunc artificem dicemus esse, illum negabimus, sed cum alterum percepta et comprehensa tenere videmus, alterum non item. cumque artium aliud eius modi genus sit, ut tantum modo animo rem cernat, aliud, ut moliatur aliquid et faciat, quo modo aut geometres cernere ea potest, quae aut nulla sunt aut internosci a falsis non possunt, aut is, qui fidibus utitur, explere numeros et conficere versus? quod idem in similibus quoque artibus continget, quarum omne opus est in faciendo atque agendo. quid enim est quod arte effici possit, nisi is, qui artem tractabit, multa perceperit?

<sup>8</sup>  
<sup>23</sup> Maxime vero virtutum cognitio confirmat percipi et comprehendere multa posse. in quibus solis inesse etiam scientiam dicimus, quam nos non comprehensionem modo rerum, sed eam stabilem quoque et immutabilem esse censemus, itemque sapientiam, artem vivendi, quae ipsa ex sese habeat constantiam; ea autem constantia si nihil habeat percepti et cogniti, quaero unde nata sit aut quo modo? quaero etiam, ille vir bonus, qui statuit omnem cruciatum perferre, intolerabili dolore lacerari potius quam aut officium prodat aut fidem, cur has sibi tam gravis leges inposuerit, cum, quam ob rem ita oporteret, nihil haberet comprehensi, percepti, cogniti, constituti? nullo igitur modo fieri potest ut quisquam tanti aestimet aequitatem et fidem, ut eius conservandae causa nullum supplicium recuset, nisi iis rebus adsensus sit, quae falsae  
<sup>24</sup> esse non possint. ipsa vero sapientia, si se ignorabit sapientia sit necne, quo modo primum obtinebit nomen sapientiae? deinde quo modo suscipere aliquam rem aut agere fidenter audebit, cum certi nihil erit quod sequatur? cum vero dubitabit, quid sit extremum et ultimum bonorum, ignorans quo omnia referantur, qui poterit esse sapientia? atque etiam illud perspicuum est, constitui necesse esse initium, quod sapientia, cum quid agere incipiat, sequatur, idque initium esse naturae accommodatum. nam aliter adpetitio — eam enim volumus esse *ἀρχήν* —, quae ad agendum inpellimur et id adpetimus,  
<sup>25</sup> quod est visum, moveri non potest. illud autem, quod

movet, prius oportet videri eique credi: quod fieri non potest, si id, quod visum erit, discerni non poterit a falso, quo modo autem moveri animus ad adpetendum potest, si id, quod videtur, non percipitur, accommodatumne naturae sit an alienum? itemque, si quid officii sui sit non occurrit animo, nihil umquam omnino aget, ad nullam rem umquam impelletur, numquam movebitur. quod si aliquid aliquando acturus est, necesse est id ei verum, quod occurrit, videri. Quid quod, si ista vera sunt, <sup>26</sup> ratio omnis tollitur, quasi quaedam lux lumenque vitae, tamenne in ista pravitate perstabitis? nam quaerendi initium ratio attulit, quae perfecit virtutem, cum esset ipsa ratio confirmata quaerendo; quaestio autem est adpetitio cognitionis quaestionisque finis inventio. at nemo invenit falsa, nec ea, quae incerta permanent, inventa esse possunt, sed, cum ea, quae quasi involuta fuerunt, aperta sunt, tum inventa dicuntur: sic et initium quaerendi et exitus percipiendi et comprehendendi tenetur. argumenti conclusio, quae est Graece ἀπόδειξις, ita definitur: ratio, quae ex rebus perceptis ad id, quod non percipiebatur, adducit. quod si omnia visa eius modi essent, qualia <sup>9</sup> isti dicunt, ut ea vel falsa esse possent, neque ea posset <sup>27</sup> ulla notio discernere, quo modo quemquam aut conclusisse aliquid aut invenisse diceremus? aut quae esset conclusi argumenti fides? ipsa autem philosophia, quae rationibus progredi debet, quem habebit exitum? sapientiae vero quid futurum est? quae neque de se ipsa dubitare debet neque de suis decretis, quae philosophi vocant δόγματα, quorum nullum sine scelere prodi poterit: cum enim decretum proditur, lex veri rectique proditur; quo e vitio et amicitiarum proditioes et rerum publicarum nasci solent. non potest igitur dubitari quin decretum nullum falsum possit esse sapientis, neque satis sit non esse falsum, sed etiam stabile, fixum, ratum esse debeat, quod movere nulla ratio queat. talia autem neque esse neque videri possunt eorum ratione, qui illa visa, e quibus omnia decreta sunt nata, negant quicquam a falsis interesse. ex hoc illud est natum, quod postulabat Hor- <sup>28</sup> tensius, ut id ipsum saltem perceptum a sapiente decretis, nihil posse percipi. sed Antipatro hoc idem postu-

lanti, cum diceret, ei, qui adfirmaret nihil posse percipi, unum tamen illud dicere percipi posse consentaneum esse, ut alia non possent, Carneades acutius resistebat; nam tantum abesse dicebat, ut id consentaneum esset, ut maxime etiam repugnaret. qui enim negaret quicquam esse quod perciperetur, eum nihil excipere: ita necesse esse ne id ipsum quidem, quod exceptum non esset, comprehendendi et percipi ullo modo posse. Antiochus ad istum locum pressius videbatur accedere: quoniam enim id haberent Academici decretum — sentitis enim iam hoc me *δόγμα* dicere —, nihil posse percipi, non debere eos in suo decreto, sicut in ceteris rebus, fluctuari, praesertim cum in eo summa consisteret; hanc enim esse regulam totius philosophiae, constitutionem veri falsi, cogniti incogniti: quam rationem quoniam susciperent docereque vellent, quae visa accipi oporteret, quae repudiari, certe hoc ipsum, ex quo omne veri falsique iudicium esset, percipere eos debuisse: etenim duo esse haec maxima in philosophia, iudicium veri et finem bonorum, nec sapientem posse esse, qui aut cognoscendi initium ignoret aut extremum expetendi, ut aut unde profisciscatur aut quo perveniendum sit nesciat: haec autem habere dubia nec iis ita confidere, ut moveri non possint, abhorrrere a sapientia plurimum. hoc igitur modo potius erat ab his postulandum, ut hoc unum saltem, percipi nihil posse, perceptum esse dicerent. sed de inconstantia totius illorum sententiae, si ulla sententia cuiusquam esse potest nihil adprobantis, est, ut opinor, dictum satis. Sequitur disputatio copiosa illa quidem, sed paulo abstrusior — habet enim aliquantum a physicis —, ut verear ne maiorem largiar ei, qui contra dicturus est, libertatem et licentiam. nam quid eum facturum putem de abditis rebus et obscuris, qui lucem eripere conetur? sed disputari poterat subtiliter, quanto quasi artificio natura fabricata esset primum animal omne, deinde hominem maxime, quae vis esset in sensibus, quem ad modum primum visa nos pellerent, deinde adpetitio ab his pulsa sequeretur, tum ut sensus ad res percipiendas intenderemus. mens enim ipsa, quae sensuum fons est atque etiam ipsa sensus est, naturalem vim habet, quam intendit ad ea, quibus

movetur. itaque alia visa sic arripit, ut iis statim utatur, alia quasi recondit, e quibus memoria oritur. cetera autem similitudinibus construit, ex quibus efficiuntur notitiae rerum, quas Graeci tum *ἐννοίας*, tum *προλήψεις* vocant. eo cum accessit ratio argumentique conclusio rerumque innumerabilium multitudo, tum et perceptio eorum omnium adparet, et eadem ratio perfecta his gradibus ad sapientiam pervenit. ad rerum igitur scientiam <sup>31</sup> vitaeque constantiam aptissima cum sit mens hominis, amplectitur maxime cognitionem, et istam *κατάληψιν*, quam, ut dixi, verbum e verbo exprimentes, comprehensionem dicemus, cum ipsam per se amat — nihil enim est ei veritatis luce dulcius — tum etiam propter usum. quocirca et sensibus utitur et artis efficit, quasi sensus alteros, et usque eo philosophiam ipsam corroborat, ut virtutem efficiat, ex qua re una vita omnis apta est. ergo ii, qui negant quicquam posse comprehendere, haec ipsa eripiunt vel instrumenta vel ornamenta vitae, vel potius etiam totam vitam evertunt funditus ipsumque animal orbant animo, ut difficile sit de temeritate eorum perinde ut causa postulat dicere.

Nec vero satis constituere possum, quod sit eorum <sup>32</sup> consilium aut quid velint. interdum enim cum adhibemus ad eos orationem eius modi, si ea, quae disputent, vera sint, tum omnia fore incerta, respondent: quid ergo istud ad nos? num nostra culpa est? naturam accusa, quae in profundo veritatem, ut ait Democritus, penitus abstruserit. alii autem elegantius, qui etiam queruntur, quod eos insimulemus omnia incerta dicere, quantumque intersit inter incertum et id, quod percipi non possit, docere conantur eaque distinguere. cum his igitur agamus, qui haec distinguunt: illos, qui omnia sic incerta dicunt, ut stellarum numerus par an impar sit, quasi desperatos aliquos relinquamus. volunt enim — et hoc quidem vel maxime vos animadvertendam moveri — probabile aliquid esse et quasi veri simile, eaque se uti regula et in agenda vita et in quaerendo ac disserendo. quae ista regula est [veri et falsi], si notionem veri et <sup>11</sup> falsi, propterea quod ea non possunt internosci, nullam <sup>33</sup> habemus? nam si habemus, interesse oportet, ut inter



rectum et pravum, sic inter verum et falsum: si nihil interest, nulla regula est, nec potest is, cui est visio veri falsique communis, ullum habere iudicium aut ullam omnino veritatis notam. nam cum dicunt hoc se unum tollere, ut quicquam possit ita *verum* videri, ut non eodem modo falsum etiam possit videri, cetera autem concedere, faciunt pueriliter; quo enim omnia iudicantur sublato reliqua se negant tollere; ut si quis quem oculis privaverit, dicat ea, quae cerni possent, se ei non ademisse. ut enim illa oculis modo agnoscuntur, sic reliqua visis, sed propria veri, non communi veri et falsi nota. quam ob rem, sive tu probabilem visionem, sive probabilem et quae non inpediatur, ut Carneades volebat, sive aliud quid proferes quod sequare, ad visum illud, de quo agimus, tibi erit revertendum. in eo autem si erit communitas cum falso, nullum erit iudicium, quia proprium [in] communi signo notari non potest; sin autem commune nihil erit, habeo quod volo: id enim quaero, quod ita mihi videatur verum, ut non possit item falsum videri. simili in errore versantur, cum convitio veritatis coacti perspicua a perceptis volunt distinguere et conantur ostendere esse aliquid perspicui, verum illud quidem *et* inpressum in animo atque mente, neque tamen id percipi ac comprehendere possē. quo enim modo perspicue dixeris album esse aliquid, cum possit accidere ut id, quod nigrum sit, album esse videatur? aut quo modo ista aut perspicua dicemus aut *menti* inpressa subtiliter, cum sit incertum, vere inaniterne moveatur? ita neque color neque corpus nec veritas nec argumentum nec sensus

<sup>34</sup> neque perspicuum ullum relinquitur. ex hoc illud iis usu venire solet, ut, quicquid dixerint, a quibusdam interrogentur: 'ergo istuc quidem percipis?' sed qui ita interrogant, ab iis inridentur. non enim urgunt, ut coarguant, neminem ulla de re posse contendere nec adseverare sine aliqua eius rei, quam sibi quisque placere dicit, certa et propria nota. quod est igitur istuc vestrum probabile? nam si, quod cuique occurrit et primo quasi aspectu probabile videtur, id confirmatur, quid eo levius?

<sup>35</sup> sin, ex circumspectione aliqua et accurata consideratione quod visum sit, id se dicent sequi, tamen exitum non

habebunt, primum quia iis visis, inter quae nihil interest, aequaliter omnibus abrogatur fides; deinde, cum dicant posse accidere sapienti ut, cum omnia fecerit diligentissimeque circumspexerit, exsistat aliquid, quod et veri simile videatur et absit longissime a vero, *ne* si magnam partem quidem, ut solent dicere, ad verum ipsum aut quam proxime accedant, confidere sibi poterunt; ut enim confidant, notum iis esse debet insigne veri: quo obscuro et oppresso quod tandem verum sibi videbuntur attingere? quid autem tam absurde dici potest quam cum ita loquuntur: est hoc quidem illius rei signum aut argumentum, et ea re id sequor, sed fieri potest ut id, quod significatur, aut falsum sit aut nihil [sit] omnino. sed de perceptione hactenus. si quis enim ea, quae dicta sunt, labefactare volet, facile etiam absentibus nobis veritas se ipsa defendet.

His satis cognitis, quae iam explicata sunt, nunc de <sup>12</sup>  
adsensione atque adprobatione, quam Graeci *συγκατάθε-<sup>37</sup>*  
*σιν* vocant, pauca dicemus, non quo non latus locus sit, sed paulo ante iacta sunt fundamenta. nam cum vim, quae esset in sensibus, explicabamus, simul illud aperiebatur, comprehendere multa et percipi sensibus, quod fieri sine adsensione non potest. deinde cum inter inanimum et animal hoc maxime intersit, quod animal agit aliquid — nihil enim agens ne cogitari quidem potest quale sit —, aut ei sensus adimendus est aut ea, quae est in nostra potestate sita, reddenda adsensio. at vero animus quo- <sup>38</sup>  
dam modo eripitur iis, quos neque sentire neque adsentiri volunt. ut enim necesse est lancem in libra ponderibus inpositis deprimi, sic animum perspicuis cedere. nam quo modo non potest animal ullum non adpetere id, quod accommodatum ad naturam adpareat — Graeci id *οἰκεῖον* appellant —, sic non potest obiectam rem perspicuam non adprobare. quamquam, si illa, de quibus disputatum est, vera sunt, nihil attinet de adsensione omnino loqui; qui enim quid percipit, adsentitur statim. sed haec etiam sequuntur, nec memoriam sine adsensione posse constare nec notitias rerum nec artis, idque, quod maximum est, ut sit aliquid in nostra potestate, in eo, qui rei nulli adsentietur, non erit. ubi igitur virtus, si <sup>39</sup>

nihil situm est in ipsis nobis? maxime autem absurdum, vitia in ipsorum esse potestate neque peccare quemquam nisi adensione, hoc idem in virtute non esse, cuius omnis constantia et firmitas ex iis rebus constat, quibus ad-sensa est et quas adprobavit; omninoque ante videri aliquid quam agamus necesse est, eique, quod visum sit, adsentiat. qua re qui aut visum aut adsensum tollit, is omnem actionem tollit e vita.

- 13 Nunc ea videamus, quae contra ab his disputari so-  
40 lent. sed prius † potestis totius eorum rationis quasi fundamenta cognoscere. componunt igitur primum artem quandam de iis, quae visa dicimus, eorumque et vim et genera definiunt; in his, quale sit id, quod percipi et comprehendere possit, totidem verbis quot Stoici. deinde illa exponunt duo, quae quasi contineant omnem hanc quaestionem: quae ita videantur, ut etiam alia eodem modo videri possint nec in iis quicquam intersit, non posse eorum alia percipi, alia non percipi; nihil interesse autem, non modo si omni ex parte eiusdem modi sint, sed etiam si discerni non possint. quibus positus unius argumenti conclusio tota ab his causa comprehenditur. composita autem ea conclusio sic est: 'eorum, quae videntur, alia vera sunt, alia falsa;' et 'quod falsum est, id percipi non potest; quod autem verum visum est, id omne tale est, ut eiusdem modi falsum etiam possit videri;' et 'quae visa sunt eius modi, ut in iis nihil intersit, non potest accidere ut eorum alia percipi possint, alia non possint: nullum igitur est visum, quod percipi possit.'  
41 quae autem sumunt, ut concludant id, quod volunt, ex his duo sibi putant concedi; neque enim quisquam repugnat. ea sunt haec: 'quae visa falsa sint, ea percipi non posse;' et alterum: 'inter quae visa nihil intersit, ex iis non posse alia talia esse, ut percipi possint, alia, ut non possint;' reliqua vero multa et varia oratione defendunt, quae sunt item duo, unum: 'quae videantur, eorum alia vera esse, alia falsa;' alterum: 'omne visum, quod sit a vero, tale esse, quale etiam a falso possit esse.'  
42 haec duo proposita non praetervolant, sed ita dilatant, ut non mediocrem curam adhibeant et diligentiam. dividunt enim in partis, et eas quidem magnas: primum in

sensus, deinde in ea, quae ducuntur a sensibus et ab omni consuetudine, quae obscurare volunt. tum perveniunt ad eam partem, ut ne ratione quidem et coniectura ulla res percipi possit. haec autem universa concidunt etiam minutius: ut enim de sensibus hesterno sermone vidistis, item faciunt de reliquis, in singulisque rebus, quas in minima dispertiunt, volunt efficere iis omnibus, quae visa sint, veris adiuncta esse falsa, quae a veris nihil differant: ea cum talia sint, non posse comprehendendi. hanc ego subtilitatem philosophia quidem dignissimam iudico, sed ab eorum causa, qui ita disserunt, remotissimam. definitiones enim et partitiones et horum luminibus utens oratio, tum similitudines dissimilitudinesque et earum tenuis et acuta distinctio fidentium est hominum, illa vera et firma et certa esse, quae tutentur, non eorum, qui clament nihilo magis vera illa esse quam falsa. quid enim agant, si, cum aliquid definierint, roget eos quispiam, num illa definitio possit in aliam rem transferri quam lubet? si posse dixerint, quid dicere habeant, cur illa vera definitio sit? si negaverint, fatendum sit, quoniam [vel illa] vera definitio transferri non possit in falsum, quod ea definitione explicetur, id percipi posse: quod minime illi volunt. eadem dici poterunt in omnibus partibus. si enim dicent ea, de quibus disserant, se dilucide perspicere nec ulla communione visorum impediri, comprehendere ea se fatebuntur; sin autem negabunt vera visa a falsis posse distingui, qui poterunt longius progredi? occurreret enim, sicut occursum est. nam concludi argumentum non potest nisi iis, quae ad concludendum sumpta erunt, ita probatis, ut falsa eiusdem modi nulla possint esse. ergo si rebus comprehensis et perceptis nisa et progressa ratio hoc efficiet, nihil posse comprehendendi, quid potest reperiri, quod ipsum sibi repugnet magis? cumque ipsa natura accuratae orationis hoc profiteatur, se aliquid patefacturam quod non adpareat et, quo id facilius adsequatur, adhibituram et sensus et ea quae perspicua sint, qualis est istorum oratio, qui omnia non tam esse quam videri volunt? maxime autem convincuntur, cum haec duo pro congruentibus sumunt, tam vehementer repugnantia: primum, esse quaedam falsa

visa; quod cum volunt, declarant quaedam esse vera; deinde ibidem, inter falsa visa et vera nihil interesse. at primum sumpseras, tamquam interesset: ita priori posterius, posteriori superius non iungitur.

- 45 Sed progrediamur longius et ita agamus, ut nihil nobis adsentati esse videamur, quaeque ab iis dicuntur, sic persequamur, ut nihil in praeteritis relinquamus. primum igitur perspicuitas illa, quam diximus, satis magnam habet vim, ut ipsa per sese ea, quae sint, nobis, ita ut sint, indicet; sed tamen, ut maneamus in perspicuis firmitus et constantius, maiore quadam opus est vel arte vel diligentia, ne ab iis, quae clara sint ipsa per sese, quasi praestigiis quibusdam et captionibus depellamur. nam qui voluit subvenire erroribus [Epicurus] iis, qui videntur conturbare veri cognitionem, dixitque sapientis esse opinionem a perspicuitate seiungere, nihil fecit; ipsius  
15 enim opinionis errorem nullo modo sustulit. quam ob  
46 rem, cum duae causae perspicuis et evidentibus rebus adversentur, auxilia totidem sunt contra comparanda. adversatur enim primum, quod parum defigunt animos et intendunt in ea, quae perspicua sunt, ut, quanta luce ea circumfusa sint, possint agnoscere; alterum est, quod fallacibus et captiosis interrogationibus circumscripti atque decepti quidam, cum eas dissolvere non possunt, desciscunt a veritate. oportet igitur et ea, quae pro perspicuitate responderi possunt, in promptu habere, de quibus iam diximus, et esse armatos, ut occurrere possimus interrogationibus eorum captionesque discutere, quod  
47 deinceps facere constitui. exponam igitur generatim argumenta eorum, quoniam ipsi etiam illi solent non confuse loqui. Primum conantur ostendere multa posse videri esse, quae omnino nulla sint, cum animi inaniter moveantur eodem modo rebus iis, quae nullae sint, ut iis, quae sint. nam cum dicatis, inquiunt, visa quaedam mitti a deo, velut ea, quae in somnis videantur quaeque oraculis, auspiciis, extis declarentur — haec enim aiunt probari Stoicis, quos contra disputant —, quaerunt, quoniam modo, falsa visa quae sint, ea deus efficere possit probabilia, quae autem plane proxume ad verum accedant, efficere non possit? aut, si ea quoque possit, cur

illa non possit, quae perdifficiliter, internoscantur tamen? et, si haec, cur non inter quae nihil sit omnino? deinde, <sup>48</sup> cum mens moveatur ipsa per sese, ut et ea declarant, quae cogitatione depingimus, et ea, quae vel dormientibus vel furiosis videntur non numquam, veri simile est sic etiam mentem moveri, ut non modo non internoscat, vera illa visa sint anne falsa, sed ut in iis nihil intersit omnino; ut si qui tremerent et exalbescerent, vel ipsi per se motu mentis aliquo, vel obiecta terribili re extrinsecus, nihil ut esset, qui distingueretur tremor ille et pallor, neque ut quicquam interesset inter intestinum et oblatum. postremo, si nulla visa sunt probabilia, quae falsa sint, alia ratio est; sin autem sunt, cur non etiam quae non facile internoscantur? cur non ut plane nihil intersit? praesertim cum ipsi dicatis sapientem in furore sustinere se ab omni adsensu, quia nulla in visis distinctio adpareat. ad has omnis visiones inanis Antiochus <sup>16</sup> quidem et permulta dicebat et erat de hac una re unius <sup>49</sup> diei disputatio: mihi autem non idem faciendum puto, sed ipsa capita dicenda. et primum quidem hoc reprehendendum; quod captiosissimo genere interrogationis utuntur, quod genus minime in philosophia probari solet, cum aliquid minutatim et gradatim additur aut demitur. soritas hoc vocant, quia acervum efficiunt uno addito grano. vitiosum sane et captiosum genus! sic enim adscenditis: si tale visum obiectum est a deo dormienti, ut probabile sit, cur non etiam ut valde veri simile? cur deinde non ut difficiliter a vero internoscatur? deinde ut ne internoscatur quidem? postremo ut nihil inter hoc et illud intersit? huc si perveneris, me tibi primum quidque concedente, meum vitium fuerit; sin ipse tua sponte processeris, tuum. quis enim tibi dederit aut omnia deum <sup>50</sup> posse aut ita facturum esse, si possit? quo modo autem sumis, ut, si quid cui simile esse possit, sequatur ut etiam difficiliter internosci possint? deinde ut ne internosci quidem? postremo ut eadem sint? ut, si lupi canibus similes sunt, eosdem dices ad extremum. et quidem honestis similia sunt quaedam non honesta et bonis non bona et artificiosis minime artificiosa: quid dubitamus igitur adfirmare nihil inter haec interesse? ne repugnantia qui-

dem videmus? nihil est enim, quod de suo genere in aliud genus transferri possit. at si efficeretur, ut inter visa differentium generum nihil interesset, reperirentur quae et in suo genere essent et in alieno. quod fieri qui potest? omnium deinde inanium visorum una depulsio est, sive illa cogitatione informantur, quod fieri solere concedimus, sive in quiete sive per vinum sive per insaniam; nam ab omnibus eiusdem modi visis perspicuitatem, quam mordicus tenere debemus, abesse dicemus. quis enim, cum sibi fingit aliquid et cogitatione depingit, non, simul ac se ipse commovit atque ad se revocavit, sentit quid intersit inter perspicua et inania? eadem ratio est somniorum. num censes Ennium, cum in hortis cum Servio Galba, vicino suo, ambulavisset, dixisse: 'visus sum mihi cum Galba ambulare'? at, cum somniavit, ita narravit:

. . . . visus Homerus adesse poëta.

idemque in Epicharmo:

nam videbar somniare me esse mortuum.

itaque, simul ut experrecti sumus, visa illa contemnimus neque ita habemus, ut ea, quae in foro gessimus. 'at enim dum videntur, eadem est in somnis species eorumque, quae vigilantes videmus.' primum interest, sed id omittamus: illud enim dicimus, non eandem esse vim neque integritatem dormientium et vigilantium nec mente nec sensu. ne vinulenti quidem quae faciunt, eadem adprobatione faciunt qua sobrii: dubitant, haesitant, revocant se interdum iisque, quae videntur, inbecillius adsentiantur; cumque edormiverunt, illa visa quam levia fuerint intellegunt. quod idem contingit insanis, ut et incipientes furere sentiant et dicant aliquid, quod non sit, id videri sibi, et, cum relaxentur, sentiant atque illa dicant Alcmaeonis:

sed mihi ne utiquam cor consentit cum oculorum aspectu.

53 'at enim ipse sapiens sustinet se in furore, ne adprobet falsa pro veris.' et alias quidem saepe, si aut in sensibus ipsius est aliqua forte gravitas aut tarditas, aut obscuriora sunt quae videntur, aut a perspicendo temporis brevitate excluditur. quamquam totum hoc, sapientem aliquando sustinere adsensionem, contra vos est: si enim

inter visa nihil interesset, aut semper sustineret aut numquam. sed ex hoc genere toto perspicui potest levitas orationis eorum, qui omnia cupiunt confundere. quaerimus gravitatis, constantiae, firmitatis, sapientiae iudicium: utimur exemplis somniantium, furiosorum, ebriosorum. illud attendimus, in hoc omni genere quam inconstanter loquamur? non enim proferremus vino aut somno oppressos aut mente captos tam absurde, ut tum diceremus interesse inter vigilantium visa et sobriorum et sanorum et eorum, qui essent aliter adfecti, tum nihil interesse. ne hoc quidem cernunt, omnia se reddere incerta, quod nolunt; ea dico incerta, quae ἄδηλα Graeci. si enim res se ita habeant, ut nihil intersit, utrum ita cui videatur, ut insano an ut sano, cui possit exploratum esse de sua sanitate? quod velle efficere non mediocris insaniae est.

Similitudines vero aut geminorum aut signorum anulis inpressorum pueriliter consecretantur. quis enim nostrum similitudines negat esse, cum eae plurimis in rebus adpareant? sed, si satis est ad tollendam cognitionem similia esse multa multorum, cur eo non estis contenti, praesertim concedentibus nobis? et cur id potius contenditis, quod rerum natura non patitur, ut non suo quidque genere sit tale, quale est, nec sit in duobus aut pluribus nulla re differens nulla communitas? ut si sint et ova ovorum et apes apium simillimae. quid pugnas gitur? aut quid tibi vis in geminis? conceditur enim similis esse, quo contentus esse potueras: tu autem vis eisdem plane esse, non similis; quod fieri nullo modo potest. dein confugis ad physicos eos, qui maxime in Academia inridentur, a quibus ne tu quidem iam te abstinebis: et ais Democritum dicere, innumerabilis esse mundos, et quidem sic quosdam inter sese non solum similes, sed undique perfecte et absolute ita par, ut inter eos nihil prorsus intersit, [et eos quidem innumerabilia,] itemque homines. deinde postulas ut, si mundus sit par alteri mundo, ut inter eos ne minimum quidem intersit, concedatur tibi, ut in hoc quoque nostro mundo liquid alicui sic sit par, ut nihil differat, nihil intersit. ut enim, inquires, ex illis individuis, unde omnia Democritus gigni affirmat, in reliquis mundis et in iis quidem



innumerabilibus innumerabiles Quinti Lutatii Catuli non modo possint esse, sed etiam sint, in hoc tanto mundo Catulus alter non possit effici?

- 18  
56 Primum quidem me ad Democritum vocas, cui non adsentior potiusque refello propter id, quod dilucide docetur a politioribus physicis singularum rerum singulas proprietates esse. fac enim antiquos illos Servilios, qui gemini fuerunt, tam similis quam dicuntur, num censes etiam eosdem fuisse? non cognoscebantur foris, at domi; non ab alienis, at a suis. an non videmus hoc usu venire, ut, quos numquam putassemus a nobis internosci posse, eos consuetudine adhibita tam facile internoscere-  
57 mus, uti ne minimum quidem similes viderentur? hic pugnes licet, non repugnabo: quin etiam concedam illum ipsum sapientem, de quo omnis hic sermo est, cum ei res similes occurrant, quas non habeat dinotatas, retenturum adsensum nec umquam ulli viso adsensurum, nisi quod tale fuerit, quale falsum esse non possit. sed et ad ceteras res habet quandam artem, qua vera a falsis possit distinguere, et ad similitudines istas usus adhibendus est. ut mater geminos internoscit consuetudine oculorum, sic tu internosces, si adsueveris. videsne ut in proverbio sit ovorum inter se similitudo? tamen hoc accepimus, Deli fuisse conpluris, salvis rebus illis, qui gallinas alere permultas quaestus causa solerent: ii cum ovum inspexerant, quae id gallina peperisset dicere sole-  
58 bant. neque id est contra nos; nam nobis satis est ova illa non internoscere: nihil enim magis adsentiri par est, hoc illud esse, quasi inter illa omnino nihil interesset: habeo enim regulam, ut talia visa vera iudicem, qualia falsa esse non possint; ab hac mihi non licet transversum, ut aiunt, digitum discedere, ne confundam omnia. veri enim et falsi non modo cognitio, sed etiam natura tollitur, si nihil erit quod intersit; ut etiam illud absurdum sit, quod interdum soletis dicere, cum visa in animos inprimantur, non vos id dicere, inter ipsas impressiones nihil interesse. sed inter species et quasdam formas eorum. quasi vero non specie visa iudicentur! quae fidem nullam habebunt  
59 sublata veri et falsi nota. Illud vero perabsurdum, quod dicitis, probabilia vos sequi, si re nulla inpediamini.

primum qui potestis non inpediri, cum a veris falsa non distent? deinde quod iudicium est veri, cum sit commune falsi? ex his illa necessario nata est *ἐποχή*, id est adsensionis retentio, in qua melius sibi constitit Arcesilas, si vera sunt quae de Carneade non nulli existimant: si enim percipi nihil potest, quod utrique visum est, tollendus adsensus est. quid enim est tam futile quam quicquam adprobare non cognitum? Carneadem autem etiam heri audiebamur solitum esse eo delabi interdum, ut diceret opinaturum, id est, peccaturum esse sapientem. mihi porro non tam certum est esse aliquid, quod comprehendi possit, de quo iam nimium etiam diu disputo, quam sapientem nihil opinari, id est numquam adsentiri rei vel falsae vel incognitae. Restat illud, quod dicunt, veri <sup>60</sup> inveniendi causa contra omnia dici oportere et pro omnibus. volo igitur videre quid invenerint. ‘non solemus’ inquit ‘ostendere.’ quae sunt tandem ista mysteria? aut cur celatis, quasi turpe aliquid, sententiam vestram? ‘ut, qui audient,’ inquit ‘ratione potius quam auctoritate ducantur.’ quid, si utroque, num peius est? unum tamen illud non celant, nihil esse quod percipi possit. an in eo auctoritas nihil obest? mihi quidem videtur vel plurimum: quis enim ista tam aperte perspicueque et per-versa et falsa secutus esset, nisi tanta in Arcesila, multo etiam maior in Carneade, et copia rerum et dicendi vis fuisset?

Haec Antiochus fere et Alexandreae tum et multis <sup>19</sup>  
annis post multo etiam adseverantius, in Syria cum esset <sup>61</sup>  
mecum, paulo ante quam est mortuus. sed iam confirmata causa te, hominem amicissimum — me autem appellabat — et aliquot annis minorem natu, non dubitabo monere: tune, cum tantis laudibus philosophiam extuleris Hortensiumque nostrum dissentientem commoveris, eam philosophiam sequere, quae confundit vera cum falsis, spoliat nos iudicio, privat adprobatione omni, orbat sensibus? et Cimmeriis quidem, quibus aspectum solis sive deus aliquis sive natura ademerat sive eius loci, quem incolebant, situs, ignes tamen aderant, quorum illis uti lumine licebat: isti autem, quos tu probas, tantis offusis tenebris ne scintillam quidem ullam nobis

ad dispiciendum reliquerunt; quos si sequamur, iis vinculis simus astricti, ut nos commovere nequeamus. sublata enim adsensio omnem et motum animorum et actionem rerum sustulerunt; quod non modo recte fieri, sed omnino fieri non potest. provide etiam ne uni tibi istam sententiam minime liceat defendere: an tu, cum res occultissimas aperueris in lucemque protuleris iratusque dixeris ea te conperisse — quod mihi quoque licebat, qui ex te illa cognoveram —, negabis esse rem ullam, quae cognosci, comprehendendi, percipi possit? vide, quaeso, etiam atque etiam ne illarum quoque rerum pulcherrimarum a te ipso minuatur auctoritas.' quae cum dixisset ille, <sup>63</sup> finem fecit.

Hortensius autem vehementer admirans — quod quidem perpetuo Lucullo loquente fecerat, ut etiam manus saepe tolleret; nec mirum: nam numquam arbitror contra Academiam dictum esse subtilius — me quoque, iocansne an ita sentiens — non enim satis intellegebam —, coepit hortari ut sententia desisterem.

Tum mihi Catulus 'si te' inquit 'Luculli oratio flexit, quae est habita memoriter, accurate, copiose, taceo neque te quo minus, si tibi ita videatur, sententiam mutēs deterrendum puto: illud vero non censuerim, ut eius auctoritate moveare; tantum enim te modo monuit,' inquit adridens 'ut caveres ne quis improbus tribunus pl., quorum vides quanta copia semper futura sit, arriperet te et in contione quaereret, qui tibi constares, cum idem negares quicquam certi posse reperiri, idem te conperisse dixisses. hoc, quaeso, cave ne te terreat. de causa autem ipsa malim quidem te ab hoc dissentire; sin cesseris, non magno opere mirabor. memini enim Antiochum ipsum, cum annos multos alia sensisset, simul ac visum est, sententia destituisse.' haec cum dixisset Catulus, me omnes intueri.

<sup>20</sup>  
<sup>64</sup> Tum ego non minus commotus, quam soleo in causis maioribus, huius modi quadam oratione sum exorsus: 'me, Catule, oratio Luculli de ipsa re ita movit, ut docti hominis et copiosi et parati et nihil praetereuntis eorum, quae pro illa causa dici possent, non tamen, ut ei responderi posse diffiderem; auctoritas autem tanta plane me movebat, nisi tu opposuisses non minorem tuam. adgre-

diar igitur, si pauca ante quasi de fama mea dixero. ego enim si aut ostentatione aliqua adductus aut studio 65 certandi ad hanc potissimum philosophiam me adplicavi, non modo stultitiam meam, sed etiam mores et naturam condemnandam puto. nam si in minimis rebus pertinacia reprehenditur, calumnia etiam coërcetur, ego de omni statu consilioque totius vitae aut certare cum aliis pugnaciter aut frustrari cum alios tum etiam me ipsum velim? itaque, nisi ineptum putarem in tali disputatione id facere, quod, cum de re publica disceptatur, fieri interdum solet, iurarem per Iovem deosque penatis me et ardere studio veri reperiendi et ea sentire, quae dicerem. qui enim possum non cupere verum invenire, cum gaudeam, si simile veri quid invenerim? sed, ut hoc pulcherrimum esse iudico, vera videre, sic pro veris probare falsa turpissimum est. nec tamen ego is sum, qui nihil umquam falsi adprobem, qui numquam adsentiar, qui nihil opiner: sed quaerimus de sapiente. ego vero ipse et magnus quidem sum opinator — non enim sum sapiens — et meas cogitationes sic dirigo, non ad illam parvulam Cynosuram,

qua fidunt duce nocturna Phoenixes in alto,  
ut ait Aratus, eoque directius gubernant, quod eam tenent,

quae cursu interiore brevi convertitur orbe, sed Helicen et clarissimos Septentriones, id est rationes has latiore specie, non ad tenue elimatas: eo fit ut errem et vager latius. sed non de me, ut dixi, sed de sapiente quaeritur; visa enim ista cum acriter mentem sensumve pepulerunt, accipio iisque interdum etiam adsentior, nec percipio tamen; nihil enim arbitror posse percipi. non sum sapiens: itaque visis cedo nec possum resistere. sapientis autem hanc censet Arcesilas vim esse maximam, Zenoni adsentiens, cavere ne capiatur ne fallatur videre; nihil est enim ab ea cogitatione, quam habemus de gravitate sapientis, errore, levitate, temeritate diiunctius. quid igitur loquar de firmitate sapientis? quem quidem nihil opinari tu quoque, Luculle, concedis. quod quoniam a te probatur — ut praepostere tecum agam; mox referam me ad ordinem —, haec primum conclusio

21 quam habeat vim considera. si ulli rei sapiens adsen-  
 67 tietur umquam, aliquando etiam opinabitur; numquam  
 autem opinabitur: nulli igitur rei adsentietur. hanc con-  
 clusionem Arcesilas probabat; confirmabat enim et pri-  
 mum et secundum; Carneades non numquam [secundum]  
 illud dabat, adsentiri aliquando: ita sequebatur etiam  
 opinari; quod tu non vis et recte, ut mihi videris. sed  
 illud primum, sapientem, si adsensurus esset, etiam opi-  
 naturum, falsum esse Stoici dicunt et eorum adstipulator  
 Antiochus; posse enim eum falsa a veris et quae non  
 68 possint percipi ab iis, quae possint, distinguere. nobis  
 autem primum, etiam si quid percipi possit, tamen ipsa  
 consuetudo adsentiendi periculosa esse videtur et lubrica.  
 quam ob rem cum tam vitiosum esse constet adsentiri  
 quicquam aut falsum aut incognitum, sustinenda est po-  
 tius omnis adsensio, ne praecipitet, si temere processerit.  
 ita enim finitima sunt falsa veris eaque, quae percipi non  
 possunt, *iis, quae possunt* — si modo ea sunt quaedam;  
 iam enim videbimus —, ut tam in praecipitem locum  
 non debeat se sapiens committere. sin autem omnino  
 nihil esse, quod percipi possit, a me sumpsero et, quod  
 tu mihi das, accepero, sapientem nihil opinari, effectum  
 illud erit, sapientem adsensus omnis cohibiturum, ut vi-  
 dendum tibi sit, idne malis an aliquid opinaturum esse  
 sapientem. neutrum, inquires, illorum. nitamur igitur,  
 nihil posse percipi; etenim de eo omnis est controversia.

22 Sed prius pauca cum Antiocho, qui haec ipsa,  
 69 quae a me defenduntur, et didicit apud Philonem tam  
 diu, ut constaret diutius didicisse neminem, et scripsit  
 de his rebus acutissime; et idem haec non acrius accu-  
 savit in senectute quam antea defensitaverat. quamvis  
 igitur fuerit acutus, ut fuit, tamen inconstantia levatur  
 auctoritas; quis enim iste dies inluxerit, quaero, qui illi  
 ostenderit eam, quam multos annos esse negitavisset,  
 veri et falsi notam. excogitavit aliquid? eadem dicit  
 quae Stoici. paenituit illa sensisse? cur non se trans-  
 tulit ad alios et maxime ad Stoicos? eorum enim erat  
 propria ista dissensio. quid? eum Mnesarchi paenitebat?  
 quid? Dardani? qui erant Athenis tum principes Stoico-  
 rum. numquam a Philone discessit, nisi postea quam

ipse coepit qui se audirent habere. unde autem subito 70  
 vetus Academia revocata est? nominis dignitatem vide-  
 tur, cum a re ipsa descisceret, retinere voluisse, quod  
 erant qui illum gloriae causa facere dicerent, *cum* speraret  
 etiam fore ut ii, qui se sequerentur, Antiochii vocaren-  
 tur. mihi autem magis videtur non potuisse sustinere  
 concursum omnium philosophorum. etenim de ceteris  
 sunt inter illos non nulla communia: haec Academicorum  
 est una sententia, quam reliquorum philosophorum nemo  
 probet. itaque cessit; et ut ii, qui sub Novis solem non  
 ferunt, item ille, cum aestuaret, veterum, ut Maeniano-  
 rum, sic Academicorum umbram secutus est; quoque 71  
 solebat uti argumento tum, cum ei placebat nihil posse  
 percipi, cum quaereret, Dionysius ille Heracleotes utrum  
 comprehendisset certa illa nota, qua adsentiri dicitis  
 oportere, illudne, quod multos annos tenuisset Zenonique  
 magistro credidisset, honestum quod esset, id bonum so-  
 lum esse, an quod postea defensitavisset, honesti inane  
 nomen esse, voluptatem esse summum bonum, — qui ex  
 illius commutata sententia docere vellet nihil ita signari  
 in animis nostris a vero posse, quod non eodem modo  
 possit a falso, is curavit *ut*, quod argumentum ex Dio-  
 nysio ipse sumpsisset, ex eo ceteri sumerent.

Sed cum hoc alio loco plura, nunc ad ea, quae a te,  
 Luculle, dicta sunt; et primum quod initio dixisti videam-  
 us quale sit: similiter a nobis de antiquis philosophis 23  
 commemorari atque seditiosi solerent claros viros, sed 72  
 tamen popularis aliquos nominare. illi, cum res non bonas  
 tractent, similes bonorum videri volunt: nos autem ea  
 dicimus nobis videri, quae vosmet ipsi nobilissimis philo-  
 sophis placuisse conceditis. Anaxagoras nivem nigram  
 dixit esse. ferres me, si ego idem dicerem? tu, ne si  
 dubitarem quidem. at quis est? num hic sophistes? —  
 sic enim appellabantur ii, qui ostentationis aut quaestus  
 causa philosophabantur —: maxima fuit et gravitatis et  
 ingenii gloria. quid loquar de Democrito? quem cum 73  
 eo conferre possumus non modo ingenii magnitudine, sed  
 etiam animi? qui ita sit ausus ordiri: 'haec loquor de  
 universis.' nihil excipit de quo non profiteatur; quid  
 enim esse potest extra universa? quis hunc philosophum

non anteposit Cleanthi, Chrysippo, reliquis inferioris aetatis? qui mihi cum illo collati quintae classis videntur. atque is non hoc dicit, quod nos, qui veri esse aliquid non negamus, percipi posse negamus: ille esse verum plane negat, sensusque idem non obscuros dicit, sed tenebricosos; sic enim appellat [eos]. is, qui hunc maxime est admiratus, Chius Metrodorus, initio libri, qui est de natura, 'nego' inquit 'scire nos sciamusne aliquid an nihil sciamus, ne id ipsum quidem, nescire aut scire, <sup>74</sup> scire nos, nec omnino, sitne aliquid an nihil sit.' furere tibi Empedocles videtur, at mihi dignissimum rebus iis, de quibus loquitur, sonum fundere. num ergo is excaecat nos aut orbat sensibus, si parum magnam vim censet in iis esse ad ea, quae sub eos subiecta sunt, iudicanda? Parmenides, Xenophanes, minus bonis quamquam versibus, sed tamen illi versibus increpant eorum adrogantiam quasi irati, qui, cum sciri nihil possit, audeant se scire dicere. et ab iis aiebas removendum Socraten et Platonem. cur? an de ullis certius possum dicere? vixisse cum iis equidem videor: ita multi sermones perscripti sunt, e quibus dubitari non possit quin Socrati nihil sit visum sciri posse; excepit unum tantum 'scire se nihil se scire,' nihil amplius. quid dicam de Platone? qui certe tam multis libris haec persecutus non esset, nisi probavisset. ironiam enim alterius, perpetuam praesertim, nulla fuit ratio persequi. videorne tibi, non, ut <sup>24</sup> <sup>75</sup> Saturninus, nominare modo inlustris homines, sed etiam imitari? num quem nisi clarum, nisi nobilem? atqui habebam molestos vobis, sed minutos, Stilponem, Diodorum, Alexinum, quorum sunt contorta et aculeata quaedam sophismata; sic enim appellantur fallaces conclusiunculae. sed quid eos colligam, cum habeam Chrysippum, qui fulcire putatur porticum Stoicorum? quam multa ille contra sensus, quam multa contra omnia, quae in consuetudine probantur! at dissolvit idem. mihi quidem non videtur: sed dissolverit sane. certe tam multa non collegisset, quae nos fallerent probabilitate magna, nisi <sup>76</sup> videret iis resisti non facile posse. quid Cyrenaici tibi videntur, minime contempti philosophi? qui negant esse quicquam quod percipi possit extrinsecus: ea se sola

percipere, quae tactu intumo sentiant, ut dolorem, ut voluptatem; neque se quo quid colore aut quo sono sit scire, sed tantum sentire adfici se quodam modo. satis multa de auctoribus. quamquam ex me quaesieras, nonne putarem post illos veteres tot saeculis inveniri verum potuisse, tot ingeniiis tantisque studiis quaerentibus. quid inventum sit paulo post videro, te ipso quidem iudice. Arcesilan vero non obtrectandi causa cum Zenone pugnavisse, sed verum invenire voluisse, sic intellegitur: nemo <sup>77</sup> umquam superiorum non modo expresserat, sed ne dixerat quidem posse hominem nihil opinari, nec solum posse, sed ita necesse esse sapienti: visa est Arcesilae cum vera sententia, tum honesta et digna sapiente; quae-sivit de Zenone fortasse, quid futurum esset, si nec percipere quicquam posset sapiens nec opinari sapientis esset. ille, credo, nihil opinaturum, quoniam esset, quod percipi posset. quid ergo id esset? visum, credo. quale igitur visum? tum illum ita definisse, ex eo, quod esset, sicut esset, inpressum et signatum et effectum. post requisitum, etiamne, si eiusdem modi esset visum verum, quale vel falsum: hic Zenonem vidisse acute nullum esse visum quod percipi posset, si id tale esset ab eo, quod est, ut eiusdem modi ab eo, quod non est, posset esse. recte consensit Arcesilas; ad definitionem additum: neque enim falsum percipi posse, neque verum, si esset tale, quale vel falsum. incubuit autem in eas disputationes, ut doceret nullum tale esse visum a vero, ut non eiusdem modi etiam a falso posset esse. haec est una contentio, quae adhuc permanserit; nam illud, nulli rei ad-sensurum esse sapientem, nihil ad hanc controversiam pertinebat. licebat enim nihil percipere et tamen opinari, quod a Carneade dicitur probatum; equidem, Clitomacho plus quam Philoni aut Metrodoro credens, hoc magis ab eo disputatum quam probatum puto. sed id omittamus: illud certe opinatione et perceptione sublata sequitur, omnium adsensionum retentio, ut, si ostendero nihil posse percipi, tu concedas numquam adsensurum esse.

Quid ergo est quod percipi possit, si ne sensus qui- <sup>25</sup>  
dem vera nuntiant? quos tu, Luculle, communi loco de- <sup>79</sup>



fendis: quod ne [id] facere posses, idcirco heri non necessario loco contra sensus tam multa dixeram. tu autem te negas infracto remo neque columbae collo commoveri. primum cur? nam et in remo sentio non esse id, quod videatur, et in columba pluris videri colores nec esse plus uno. deinde nihilne praeterea diximus? maneat illa omnia; laceratur ista causa; veracis vos esse sensus dicitis. igitur semper auctorem habetis eum, qui magno suo periculo causam agat. eo enim rem dimittit Epicurus, si unus sensus semel in vita mentitus sit, nulli umquam esse credendum. hoc est verum esse, confidere  
80 suis testibus † et inportata insistere! itaque Timagoras Epicureus negat sibi umquam, cum oculum torsisset, duas ex lucerna flammulas esse visas; opinionis enim esse mendacium, non oculorum: quasi quaeratur, quid sit, non quid videatur. sit hic quidem maiorum similis: tu vero, qui visa sensibus alia vera dicas esse, alia falsa, qui ea distinguis? sed desine, quaeso, communibus locis; domi nobis ista nascuntur. si, inquis, deus te interroget, sanis modo et integris sensibus, num amplius quid desideres, quid respondeas? utinam quidem roget! audiet, quam nobiscum male egerit. ut enim vera videamus, quam longe videmus? ego Catuli Cumanum ex hoc loco cerno, [regionem video,] Pompeianum non cerno, neque quicquam interiectum est, quod obstet, sed intendi acies longius non potest. o praeclarum prospectum! Puteolos videmus: at familiarem nostrum C. Avianium, fortasse  
81 in porticu Neptuni ambulantiem, non videmus. at ille nescio qui, qui in scholis nominari solet, mille et octingenta stadia quod abesset videbat; quaedam volucres longius: responderem igitur audacter isti vestro deo me plane his oculis non esse contentum. dicet me acrius videre quam illos piscis fortasse, qui neque videntur a nobis, et nunc quidem sub oculis sunt, neque ipsi nos suspicere possunt: ergo ut illis aqua, sic nobis aër crassus offunditur. 'at amplius non desideramus.' quid? talpam num desiderare lumen putas? neque tam quererem cum deo quod parum longe quam quod falsum viderem. videsne navem illam? stare nobis videtur, at iis, qui in nave sunt, moveri haec villa. quare rationem cur ita videatur; quam ut ma-

xime inveneris, quod haud scio an non possis, non tu verum testem habere, sed eum non sine causa falsum testimonium dicere ostenderis. *sed* quid ego de nave? vidi enim a te remum contemni. maiora fortasse quaeris. quid potest esse sole maius? quem mathematici amplius duodeviginti partibus confirmant maiorem esse quam terram. quantulus nobis videtur! mihi quidem quasi pedalis. Epicurus autem posse putat etiam minorem esse eum quam videatur, sed non multo; ne maiorem quidem multo putat esse vel tantum esse, quantus videatur: ut oculi aut nihil mentiantur aut non multum mentiantur. ubi igitur illud est semel? sed ab hoc credulo, qui numquam sensus mentiri putat, discedamus: quin ne nunc quidem, cum ille sol, qui tanta incitatione fertur, ut celeritas eius quanta sit ne cogitari quidem possit, tamen nobis stare videatur! sed, ut minuam controversiam, vide, quaeso, quam in parvo lis sit. quattuor sunt capita, quae concludant nihil esse, quod nosci, percipi, comprehendere possit, de quo haec tota quaestio est; e quibus primum est esse aliquod visum falsum, secundum non posse id percipi, tertium, inter quae visa nihil intersit, fieri non posse ut eorum alia percipi possint, alia non possint, quantum nullum esse visum verum a sensu profectum, cui non adpositum sit visum aliud, quod ab eo nihil intersit quodque percipi non possit: horum quattuor capitum secundum et tertium omnes concedunt; primum Epicurus non dat; vos, quibuscum res est, id quoque conceditis: omnis pugna de quarto est. qui igitur P. Servilium Geminum videbat, si Quintum se videre putabat, incidebat in eius modi visum, quod percipi non posset, quia nulla nota verum distinguebatur a falso; qua distinctione sublata quam haberet in C. Cotta, qui bis cum Geminio consul fuit, agnoscendo eius modi notam, quae falsa esse non posset? negas tantam similitudinem in rerum natura esse. pugnas omnino, sed cum adversario facili. ne sit sane: videri certe potest: fallit igitur sensum, et si una fefellerit similitudo, dubia omnia reddiderit. sublato enim iudicio illo, quo oportet agnoscere, etiam si ipse erit, quem videris, qui tibi videbitur, tamen non ea nota iudicabis, qua dicis oportere, ut non possit

85 esse eiusdem modi falsa. quando igitur potest tibi Publius Geminus Quintus videri, quid habes explorati, cur non possit tibi Cotta videri, qui non sit, quoniam aliquid videtur esse, quod non est? omnia dicis sui generis esse, nihil esse idem, quod sit aliud. Stoicum est quidem nec admodum credibile 'nullum esse pilum omnibus rebus talem, qualis sit pilus alius, nullum granum.' haec refelli possunt, sed pugnare nolo. ad id enim, quod agitur, nihil interest, omnibusne partibus visa res nihil differat, an internosci non possit, etiam si differat. sed, si hominum similitudo tanta esse non potest, ne signorum quidem? dic mihi, Lysippus eodem aere, eadem temperatione, eodem caelo, † aqua, ceteris omnibus, centum Alexandros eiusdem modi facere non posset? qua igitur  
86 notione discerneres? quid? si in eiusdem modi cera centum sigilla hoc anulo inpressero, ecquae poterit in agnoscendo esse distinctio? an tibi erit quaerendus anularius aliqui, quoniam gallinarium invenisti Deliacum illum,  
27 qui ova cognosceret? Sed adhibes artem advocatam etiam sensibus. pictor videt quae nos non videmus, et, simul inflavit tibicen, a perito carmen agnoscitur. quid? hoc nonne videtur contra te valere, si sine magnis artificijs, ad quae pauci accedunt, nostri quidem generis admodum, nec videre nec audire possimus? Iam illa praeclara quanto artificio esset sensus nostros mentemque et totam constructionem hominis fabricata natura!  
87 cur non extimescam opinandi temeritatem? etiamne hoc adfirmare potes, Luculle, esse aliquam vim, cum prudentia et consilio scilicet, quae finxerit vel, ut tuo verbo utar, quae fabricata sit hominem? qualis ista fabrica est? ubi adhibita? quando? cur? quo modo? tractantur ista ingeffiose, disputantur etiam eleganter; denique videantur sane, ne adfirmentur modo. sed de physicis mox, et quidem ob eam causam, ne tu, qui id me facturum paulo ante dixeris, videre mentitus.

Sed ut ad ea, quae clariora sunt, veniam, res iam universas profundam, de quibus volumina inpleta sunt non a nostris solum, sed etiam a Chrysippo: de quo queri solent Stoici, dum studiose omnia conquiesierit contra sensus et perspicuitatem contraque omnem consuetu-

dinem contraque rationem, ipsum sibi respondentem inferiore fuisse, itaque ab eo armatum esse Carneadem. ea sunt eius modi, quae a te diligentissime tractata sunt: <sup>88</sup> dormientium et vinulentorum et furiosorum visa inbecilliora esse dicebas quam vigilantium, siccorum, sanorum. quo modo? quia, cum expectatus esset Ennius, non diceret 'se vidisse Homerum,' sed 'visum esse.' Alcmaeo autem,

sed mihi ne utiquam cor consentit . . .

similia de vinulentis. quasi quisquam neget et qui expectatus sit, eum somnia sua visa putare, et, cuius furor consederit, putare non fuisse ea vera, quae essent sibi visa in furore. sed non id agitur: tum, cum videbantur, quo modo viderentur, id quaeritur. nisi vero Ennium non putamus ita totum illud audivisse,

o pietas animi . . .,

si modo id somniavit, ut si vigilans audiret. expectatus enim potuit illa visa putare, ut erant, somnia: dormienti vero aequae ac vigilanti probabantur. quid? Iliona somno illo

mater, te appello —

nonne ita credidit filium locutum, ut expectata etiam crederet? unde enim illa:

.. age asta: mane, audi: itera dum eadem istaec mihi: num videtur minorem habere visis quam vigilantes fidem?

Quid loquar de insanis? qualis tandem fuit adfinis <sup>28</sup> <sub>89</sub> tuus, Catule, Tuditanus? quisquam sanissimus tam certa putat quae videt quam is putabat quae videbantur? quid ille, qui

video, video te: vive, Ulixes, dum licet, nonne etiam bis exclamavit se videre, cum omnino non videret? quid? apud Euripidem Hercules, cum, ut Eurysthei filios, ita suos configebat sagittis, cum uxorem interemebat, cum conabatur etiam patrem, non perinde movebatur falsis, ut veris moveretur? quid? ipse Alcmaeo tuus, qui negat cor sibi cum oculis consentire, nonne ibidem incitato furore:

.. unde haec flamma oritur?

et illa deinceps,

incedunt, incedunt: adsunt, me expetunt.

quid? cum virginis fidem inplorat:

fer mi auxilium: pestem abige a me, flammiferam  
hanc vim, quae me excruciat!

caerulea incinctae angui incedunt: circumstant cum  
ardentibus taedis:

num dubitas quin sibi haec videre videatur? itemque  
cetera:

intendit crinitus Apollo

arcum auratum luna innixus;

Diana facem iacit a laeva.

90 qui magis haec crederet, si essent, quam credebat, quia videbantur? adparet enim iam 'cor cum oculis consentire.' omnia autem haec proferuntur, ut illud efficiatur, quo certius nihil potest esse, inter visa vera et falsa ad animi adsensum nihil interesse; vos autem nihil agitis, cum illa falsa vel furiosorum vel somniantium recordatione ipsorum refellitis; non enim id quaeritur, qualis recordatio fieri soleat eorum, qui experrecti sint, aut eorum, qui furere destiterint, sed qualis visio fuerit aut furentium aut somniantium tum, cum movebantur. sed abeo a sensibus.

91 Quid est quod ratione percipi possit? dialecticam inventam esse dicitis, veri et falsi quasi disceptatricem et iudicem. cuius veri et falsi? et in qua re? in geometricae quid sit verum aut falsum iudicabit an in litteris an in musicis? at ea non novit. in philosophia igitur? sol quantus sit, quid ad illam? quod sit summum bonum quid habet ut queat iudicare? quid igitur iudicabit? quae coniunctio, quae diiunctio vera sit, quid ambigue dictum sit, quid sequatur quamque rem, quid repugnet. si haec et horum similia iudicat, de se ipsa iudicat; plus autem pollicebatur: nam haec quidem iudicare ad ceteras res, quae sunt in philosophia multae atque magnae, non est  
92 satis. sed quoniam tantum in ea arte ponitis, videte ne contra vos tota nata sit: quae primo progressu festive tradit elementa loquendi et ambiguum intelligentiam concludendique rationem, tum paucis additis venit ad soritas, lubricum sane et periculosum locum, quod tu  
29 modo dicebas esse vitiosum interrogandi genus. quid ergo? istius vitii num nostra culpa est? rerum natura

nullam nobis dedit cognitionem finium, ut ulla in re statuere possimus, quatenus; nec hoc in acervo tritici solum, unde nomen est, sed nulla omnino in re minutatim interrogati ‘dives pauper, clarus obscurus sit, multa pauca, magna parva, longa brevia, lata angusta,’ quanto aut addito aut dempto certum respondeamus [non] habemus. ‘at vitiosi sunt soritae.’ frangite igitur eos, si potestis, <sup>93</sup> ne molesti sint; erunt enim, nisi cavetis. ‘cautum est’ inquit. ‘placet enim Chrysippo, cum gradatim interrogetur, verbi causa ‘tria pauca sint anne multa,’ aliquanto prius quam ad multa perveniat quiescere, id est, quod ab his dicitur, ἡσυχάζειν.’ ‘per me vel stertas licet,’ inquit Carneades ‘non modo quiescas.’ sed quid proficit? sequitur enim, qui te ex somno excitet et eodem modo interroget: quo in numero conticuisti, si ad eum numerum unum addidero, multane erunt? progrediare rursus, quoad videbitur. quid plura? hoc enim fateris, neque ultimum te paucorum neque primum multorum respondere posse. cuius generis error ita manat, ut non videam quo non possit accedere. ‘nihil me laedit,’ inquit ‘ego <sup>94</sup> enim, ut agitator callidus, prius quam ad finem veniam, equos sustinebo, eoque magis, si locus is, quo ferentur equi, praeceps erit. sic me’ inquit ‘ante sustineo nec diutius captiose interroganti respondeo.’ si habes quod liqueat neque respondes, superbe; si non habes, ne tu quidem percipis: si, quia obscura, concedo; sed negas te usque ad obscura progredi: in inlustribus igitur rebus insistis. si id tantum modo, ut taceas, nihil adsequeris; quid enim ad illum, qui te captare volt, utrum tacentem inretiat te an loquentem? sin autem usque ad novem, verbi gratia, sine dubitatione respondes pauca esse, in decumo insistis, etiam a certis et inlustrioribus cohibes adsensum: hoc idem me in obscuris facere non sinis; nihil igitur te contra soritas ars ista adiuvat, quae nec augendi nec minuendi quid aut primum sit aut postremum, docet.

Quid? quod eadem illa ars, quasi Penelope <sup>95</sup> telam retexens, tollit ad extremum superiora, utrum ea nostra an vestra culpa est? nempe fundamentum dialecticae est, quicquid enuntietur — id autem appellant ἀξίωμα, quod est quasi effatum — aut verum esse aut

falsum. quid igitur? haec vera an falsa sunt? 'si te mentiri dicis idque verum dicis, mentiris an verum dicis?' haec scilicet inexplicabilia esse dicitis. quod est odiosius quam illa, quae nos non comprehensa et non percepta  
 80 dicimus. sed hoc omitto: illud quaero, si ista explicari non possunt, nec eorum ullum iudicium invenitur, ut respondere possitis verane an falsa sint, ubi est illa definitio, effatum esse id, quod aut verum aut falsum sit? rebus sumptis adiungam ex iis sequendas esse alias, alias  
 96 inprobandas, quae sint in genere contraxio: quo modo igitur hoc conclusum esse iudicas? 'si dicis nunc lucere et verum dicis, *lucet*; dicis autem nunc lucere et verum dicis: *lucet* igitur.' probatis certe genus et rectissime conclusum dicitis; itaque in docendo eum primum concludendi modum traditis: aut quicquid igitur eodem modo concluditur probabitis, aut ars ista nulla est. vide ergo hanc conclusionem probaturusne sis: 'si dicis te mentiri verumque dicis, mentiris; dicis autem te mentiri verumque dicis: mentiris igitur.' qui potes hanc non probare, cum probaveris eiusdem generis superiorem? haec Chrysippea sunt, ne ab ipso quidem dissoluta; quid enim faceret huic conclusioni 'si lucet, lucet; lucet autem: lucet igitur'? cederet scilicet; ipsa enim ratio conexi, cum concesseris superius, cogit inferius concedere. quid ergo haec ab illa conclusione differt 'si mentiris, mentiris; mentiris autem: mentiris igitur'? hoc negas te posse nec adprobare nec inprobare. qui igitur magis illud? si ars, si ratio, si via, si vis denique conclusionis valet,  
 97 eadem est in utroque. sed hoc extremum eorum est: postulant ut excipiantur haec inexplicabilia. tribunum aliquem censeo videant: a me istam exceptionem numquam inpetrabunt. etenim cum ab Epicuro, qui totam dialecticam et contemnit et inridet, non inpetrent ut verum esse concedat, quod ita effabimur 'aut vivet cras Hermarchus aut non vivet,' cum dialectici sic statuant, omne, quod ita disiunctum sit, quasi 'aut etiam aut non' non modo verum esse, sed etiam necessarium: — vide quam sit catus is, quem isti tardum putant; si enim, inquit, alterutrum concessero necessarium esse, necesse erit cras Hermarchum aut vivere aut non vivere; nulla

autem est in natura rerum talis necessitas —: cum hoc igitur dialectici pugnent, id est Antiochus et Stoici; totam enim evertit dialecticam; nam si e contrariis disiunctio — contraria autem ea dico, cum alterum aiat, alterum neget —, si talis disiunctio falsa potest esse, nulla vera est; mecum vero quid habent litium, qui ipsorum <sup>98</sup> disciplinam sequor? cum aliquid huius modi inciderat, sic ludere Carneades solebat: 'si recte conclusi, teneo; sin vitiose, minam Diogenes mihi reddet:' ab eo enim Stoico dialecticam didicerat; haec autem merces erat dialecticorum. sequor igitur eas vias, quas didici ab Antiocho, nec reperio, quo modo iudicem 'si lucet, lucet' verum esse, ob eam causam, quod ita didici, omne, quod ipsum ex se conexum sit, verum esse, non iudicem 'si mentiris, mentiris,' eodem modo [esse] conexum. aut igitur hoc et illud, aut, nisi hoc, ne illud quidem iudicabo.

Sed ut omnis istos aculeos et totum tortuosum genus <sup>31</sup> disputandi relinquamus ostendamusque qui simus, iam explicata tota Carneadis sententia Antiochea ista congruent universa. nec vero quicquam ita dicam, ut quisquam id fingi suspicetur: a Clitomacho sumam, qui usque ad senectutem cum Carneade fuit, homo et acutus, ut Poenus, et valde studiosus ac diligens; et quattuor eius libri sunt de sustinendis adsensionibus; haec autem, quae iam dicam, sunt sumpta de primo. duo placet esse Car- <sup>99</sup> neadi genera visorum: in uno hanc divisionem: 'alia visa esse quae percipi possint, alia quae non possint,' in altero autem: 'alia visa esse probabilia, alia non probabilia.' itaque, quae contra sensus contraque perspicuitatem dicantur, ea pertinere ad superiorem divisionem; contra posteriorem nihil dici oportere; qua re ita placere: tale visum nullum esse, ut perceptio consequatur, ut autem probatio, multa. etenim contra naturam est, probabile nihil esse, et sequitur omnis vitae ea, quam tu, Luculle, commemorabas, eversio. itaque et sensibus probanda multa sunt, teneatur modo illud, non inesse in iis quicquam tale, quale non etiam falsum nihil ab eo differens esse possit. sic, quicquid acciderit specie probabile, si nihil se offeret quod sit probabilitati illi con-



trarium, utetur eo sapiens, ac sic omnis ratio vitae gubernabitur. etenim is quoque, qui a vobis sapiens inducitur, multa sequitur probabilia, non comprehensa neque percepta neque adsensa, sed similia veri; quae nisi probet,

100 omnis vita tollatur. quid enim? conscendens navem sapiens num comprehensum animo habet atque perceptum se ex sententia navigaturum? qui potest? sed si iam ex hoc loco proficiscatur Puteolos stadia triginta, proba navigio, bono gubernatore, hac tranquillitate, probabile ei videatur se illuc venturum esse salvum. huius modi igitur visis consilia capiet et agendi et non agendi, faciliorque erit, ut albam esse nivem probet, quam erat Anaxagoras, qui id non modo ita esse negabat, sed sibi, quia sciret aquam nigram esse, unde illa concreta esset, albam

101 ipsam esse ne videri quidem; et quaecumque res eum sic attinget, ut sit visum illud probabile neque ulla re ineditum, movebitur; non enim est e saxo sculptus aut e robore dolatus: habet corpus, habet animum, movetur mente, movetur sensibus, ut ei vera multa videantur; neque tamen habere insignem illam et propriam percipiendi notam; eoque sapientem non adsentiri, quia possit eiusdem modi exsistere falsum aliquod, cuius modi hoc verum. neque nos contra sensus aliter dicimus ac Stoici, qui multa falsa esse dicunt longeque aliter se habere ac

32 sensibus videantur. hoc autem si ita sit, ut unum modo sensibus falsum videatur, praesto est qui neget rem ullam percipi posse aensibus: ita nobis tacentibus ex uno Epicuri capite, altero vestro perceptio et comprehensio tollitur. quod est caput Epicuri? 'si ullum sensus visum falsum est, nihil potest percipi.' quod vestrum? 'sunt falsa sensus visa.' quid sequitur? ut taceam, conclusio ipsa loquitur: 'nihil posse percipi.' 'non concedo' inquit 'Epicuro.' certa igitur cum illo, qui a te totus diversus est: noli mecum, qui hoc quidem certe, falsi

102 esse aliquid in sensibus, tibi adsentior. quamquam nihil mihi tam mirum videtur quam ita dici, ab Antiocho quidem maxime, cui erant ea, quae paulo ante dixi, notissima. licet enim hoc quivis arbitrato suo reprehendat, quod negemus rem ullam percipi posse, certe levior reprehensio est, quod tamen dicimus esse quaedam proba-

bilis. non videtur hoc satis esse vobis. ne sit: illa certe debemus effugere, quae a te vel maxime agitata sunt: 'nihil igitur cernis? nihil audis? nihil tibi est perspicuum?' explicavi paulo ante Clitomacho auctore, quo modo ista Carneades diceret. accipe, quem ad modum eadem dicantur a Clitomacho in eo libro, quem ad C. Lucilium scripsit [poëtam], cum scripsisset isdem de rebus ad L. Censorinum, eum, qui consul cum M'. Manilio fuit. scripsit igitur his fere verbis — sunt enim mihi nota, propterea quod earum ipsarum rerum, de quibus agimus, prima institutio et quasi disciplina illo libro continetur —: sed scriptum est ita: Academicis placere 103 esse rerum eius modi dissimilitudines, ut aliae probabiles videantur, aliae contra: id autem non esse satis, cur alia posse percipi dicas, alia non posse, propterea quod multa falsa probabilia sint, nihil autem falsi perceptum et cognitum possit esse. itaque ait vehementer errare eos, qui dicant ab Academia sensus eripi, a quibus numquam dictum sit aut colorem aut saporem aut sonum nullum esse, illud sit disputatum, non inesse in iis propriam, quae nusquam alibi esset, veri et certi notam. quae 104 cum exposuisset, adiungit dupliciter dici adsensus sustinere sapientem: uno modo, cum hoc intellegatur, omnino eum rei nulli adsentiri; altero, cum se a respondendo [ut aut adprobet quid aut improbet] sustineat, ut neque neget aliquid neque aiat. id cum ita sit, alterum placere, ut numquam adsentiatur, alterum tenere, ut sequens probabilitatem, ubicumque haec aut occurrat aut deficiat, aut 'etiam' aut 'non' respondere possit; et cum placeat, eum, qui de omnibus rebus contineat se ab adsentiendo, moveri tamen et agere aliquid, relinqui eius modi visa, quibus ad actionem excitemur; item ea, quae interrogati in utramque partem respondere possimus, sequentes tantum modo, quod ita visum sit, dum sine adsensu; neque tamen omnia eius modi visa adprobari, sed ea, quae nulla re impediuntur. haec si vobis non probamus, sint falsa 105 sane, invidiosa certe non sunt; non enim lucem eripimus, sed ea, quae vos percipi comprehendique, eadem nos, si modo probabilia sint, videri dicimus. sic igitur inducto 33 et constituto probabili, et eo quidem expedito, soluto,

libero, nulla re implicato, vides profecto, Luculle, iacere iam illud tuum perspicuitatis patrocinium; isdem enim hic sapiens, de quo loquor, oculis, quibus iste vester, caelum, terram, mare intuebitur, isdem sensibus reliqua, quae sub quemque sensum cadunt, sentiet. mare illud, quod nunc Favonio nascente purpureum videtur, idem huic nostro videbitur, nec tamen adsentietur, quia nobismet ipsis modo caeruleum videbatur, mane raurum, quodque nunc, qua a sole conlucet, albescit et vibrat, dissimile est proximo et continenti; ut, etiam si possis rationem reddere, cur id eveniat, tamen non possis id verum esse, 106 quod videbatur oculis, defendere. unde memoria, si nihil percipimus? sic enim quaerebas. quid? meminisse visa nisi comprehensa non possumus? quid? Polyaenus, qui magnus mathematicus fuisse dicitur, is postea quam Epicuro adsentiens totam geometriam falsam esse credidit, num illa etiam, quae sciebat, oblitus est? atqui, falsum quod est, id percipi non potest, ut vobismet ipsis placet. si igitur memoria perceptarum comprehensarumque rerum est, omnia, quae quisque meminit, habet ea comprehensa atque percepta; falsi autem comprehendi nihil potest, et omnia meminit Sciron Epicuri dogmata: vera igitur illa sunt nunc omnia. hoc per me licet: sed tibi aut concedendum est ita esse, quod minime vis, aut memoriam mihi remittas oportet et fateare esse ei locum, etiam si comprehensio perceptioque nulla sit.

107 Quid fiet artibus? quibus? iisne, quae ipsae fatentur coniectura se plus uti quam scientia, an iis, quae tantum id, quod videtur, sequuntur nec habent istam artem vestram, qua vera et falsa diiudicent? Sed illa sunt lumina duo, quae maxime causam istam continent: primum enim negatis fieri posse ut quisquam nulli rei adsentiatur. at id quidem perspicuum est: cum Panaetius, princeps prope meo quidem iudicio Stoicorum, ea de re dubitare se dicat, quam omnes praeter eum Stoici certissimam putant, vera esse haruspicum *responsa*, auspicia, oracula, somnia, vaticinationes, seque ab adsensu sustineat, quod is potest facere vel de iis rebus, quas illi, a quibus ipse didicit, certas habuerunt, cur id sapiens de reliquis rebus facere non possit? an est aliquid, quod positum vel in-

probare vel adprobare possit, dubitare non possit? an tu in soritis poteris hoc, cum voles, ille in reliquis rebus non poterit eodem modo insistere? praesertim cum possit sine adsensione ipsam veri similitudinem non ineditam sequi. alterum est, quod negatis, actionem ullius rei posse in 108 eo esse, qui nullam rem adsensu suo conprobet: primum enim videri oportere, in quo sit etiam adsensus; dicunt enim Stoici sensus ipsos adsensus esse, quos quoniam adpetitio consequatur, actionem sequi; tolli autem omnia, si visa tollantur. hac de re in utramque partem et dicta 34 sunt et scripta multa, sed brevi res potest tota confici; ego enim etsi maximam actionem puto, repugnare visis, obsistere opinionibus, adsensus lubricos sustinere, credo-que Clitomacho, ita scribenti, Herculi quendam laborem exanclatum a Carneade, quod, ut feram et inmanem beluam, sic ex animis nostris adsensionem, id est opinionem et temeritatem, extraxisset, tamen, ut ea pars defensionis relinquatur, quid impedit actionem eius, qui probabilia sequitur, nulla re impediante? 'hoc' inquit 109 'ipsum impedit, quod statuet ne id quidem, quod probet, posse percipi.' iam istuc te quoque impedit in navigando, in conserendo, in uxore ducenda, in liberis procreandis plurimisque in rebus, in quibus nihil sequere praeter probabile. Et tamen illud usitatum et saepe repudiatum refers, non ut Antipater, sed, ut ais, 'pressius:' nam Antipatrum reprehensum, quod diceret consentaneum esse ei, qui adfirmaret nihil posse comprehendendi, id ipsum saltem dicere posse comprehendendi, quod ipsi Antiocho pingue videbatur et sibi ipsum contrarium; non enim potest convenienter dici nihil comprehendendi posse, si quicquam comprehendendi posse dicatur. illo modo potius putat urgendum fuisse Carneadem: cum sapientis nullum decretum esse posset nisi comprehensum, perceptum, cognitum, ut hoc ipsum decretum, quo sapientis esset nihil posse percipi, fateretur esse perceptum: proinde quasi sapiens nullum aliud decretum habeat et sine decretis vitam agere possit! sed ut illa habet probabilia 110 non percepta, sic hoc ipsum, nihil posse percipi; nam si in hoc haberet cognitionis notam, eadem uteretur in ceteris: quam quoniam non habet, utitur probabilibus.

itaque non metuit ne confundere omnia videatur et incerta reddere; non enim, quem ad modum, si quaesitum ex eo sit, stellarum numerus par an impar sit, item, si de officio multisque aliis de rebus, in quibus versatus exercitatusque sit, nescire se dicat. in incertis enim nihil est probabile; in quibus autem est, in iis non deerit sapienti nec quid faciat nec quid respondeat. Ne illam quidem praetermisisti, Luculle, reprehensionem Antiochi — nec mirum; in primis enim est nobilis —, qua solebat dicere [Antiochus] Philonem maxime perturbatum: cum enim sumeretur unum, esse quaedam falsa visa, alterum, nihil ea differre a veris, non attendere superius illud ea re a se esse concessum, quod videretur esse quaedam in visis differentia; eam tolli altero, quo neget visa a falsis vera differre: nihil tam repugnare. id ita esset, si nos verum omnino tolleremus: non facimus; nam tam vera quam falsa cernimus: sed probandi species est; percipiendi signum nullum habemus.

35 Ac mihi videor nimis etiam nunc agere ieiune; cum  
112 sit enim campus in quo exsultare possit oratio, cur eam tantas in angustias et Stoicorum in dumeta compellimus? si enim mihi cum Peripatetico res esset, qui id percipi posse diceret, 'quod inpressum esset e vero,' neque adderet illam magnam accessionem, 'quo modo inprimi non posset a falso,' cum simplici homine simpliciter agerem nec magno opere contenderem, atque etiam, si, cum ego nihil dicerem posse comprehendere, diceret ille sapientem interdum opinari, non repugnarem, praesertim ne Carneade quidem huic loco valde repugnante: nunc quid  
113 facere possum? quaero enim quid sit, quod comprehendere possit. respondet mihi non Aristoteles aut Theophrastus, ne Xenocrates quidem aut Polemo, sed his minores: tale verum, quale falsum esse non possit. nihil eius modi invenio; itaque incognito nimirum adsentiar, id est, opinabor. hoc mihi et Peripatetici et vetus Academia concedit: vos negatis, Antiochus in primis, qui me valde movet, vel quod amavi hominem, sicut ille me, vel quod ita iudico, politissimum esse et acutissimum omnium nostrae memoriae philosophorum. a quo primum quaero, quo tandem modo sit eius Academiae, cuius esse se pro-

fiteatur? ut omittam alia, haec duo, de quibus agitur, quis umquam dixit aut veteris Academiae aut Peripateticorum, vel id solum percipi posse, quod esset verum tale, quale falsum esse non posset, vel sapientem nihil opinari? certe nemo. horum neutrum ante Zenonem magno opere defensum est; ego tamen utrumque verum puto, nec dico temporis causa, sed ita plane probō: illud <sup>36</sup> ferre non possum: tu, cum me incognito adsentiri vetes <sup>114</sup> idque turpissimum esse dicas et plenissimum temeritatis, tantum tibi adroges, ut exponas disciplinam sapientiae, naturam rerum omnium evolvas, mores fingas, finis bonorum malorumque constituas, officia describas, quam vitam ingrediar definias, idemque etiam disputandi et intellegendi iudicium dicas te et artificium traditurum, perficies ut ego ista innumerabilia complectens nusquam labar, nihil opiner? quae tandem ea est disciplina, ad quam me deducas, si ab hac abstraxeris? vereor ne subadroganter facias, si dixeris tuam. atqui ita dicas necesse est; neque vero tu solus, sed ad suam quisque rapiet. age, restitero Peripateticis, qui sibi cum oratoribus <sup>115</sup> cognitionem esse, qui claros viros a se instructos dicant rem publicam saepe rexisse; sustinero Epicurcos, tot meos familiares, tam bonos, tam inter se amantes viros: Diodoto quid faciam, Stoico, quem a puero audiui? qui mecum vivit tot annos? qui habitat apud me? quem et admiror et diligo? qui ista Antiochea contemnit. ‘nostra’ inquires ‘sola vera sunt.’ certe sola, si vera; plura enim vera discrepantia esse non possunt: utrum igitur nos inpudentes, qui labi nolumus, an illi adrogantes, qui sibi persuaserint scire se solos omnia? ‘non me quidem,’ inquit ‘sed sapientem dico scire.’ optime: nempe ista scire, quae sunt in tua disciplina. hoc primum quale est, a non sapiente explicari sapientiam? sed discedamus a nobismet ipsis: de sapiente loquamur, de quo, ut saepe iam dixi, omnis haec quaestio est.

In tris igitur partis et a plerisque et a vobismet ipsis <sup>116</sup> distributa sapientia est. primum ergo, si placet, quae de natura rerum sint quaesita, videamus, vel illud ante: estne quisquam tanto inflatus errore, ut sibi se illa scire persuaserit? non quaero rationes eas, quae ex coniectura

pendent, quae disputationibus huc et illuc trahuntur, nullam adhibent persuadendi necessitatem: geometrae provideant, qui se profitentur non persuadere, sed cogere, et qui omnia vobis, quae describunt, probant. non quaero ex his illa initia mathematicorum, quibus non concessis digitum progredi non possunt: punctum esse, quod magnitudinem nullam habeat; extremitatem et quasi libramentum, in quo nulla omnino crassitudo sit; liniamentum longitudinem latitudine carentem. haec cum vera esse concessero, si adigam ius iurandum sapientem, nec prius, quam Archimedes eo inspectante rationes omnis descripserit eas, quibus efficitur multis partibus solem maiorem esse quam terram, iuraturum putas? si fecerit, solem ipsum, quem deum censet esse, contem-  
117 pserit. quod si geometricis rationibus non est crediturus, quae vim adferunt in docendo, vos ipsi ut dicitis, ne ille longe aberit ut argumentis credat philosophorum, aut, si est crediturus, quorum potissimum? omnia enim physicorum licet explicare; sed longum est: quaero tamen quem sequatur. finge aliquem nunc fieri sapientem, nondum esse: quam potissimum sententiam eliget et disciplinam? etsi quamcumque eliget, insipiens eliget. sed sit ingenio divino, quem unum e physicis potissimum probabit? nec plus uno poterit. non persequor quaestiones infinitas: tantum de principiis rerum, e quibus omnia constant, videamus quem probet; est enim inter magnos  
37 homines summa dissensio. princeps Thales, unus e  
118 septem, cui sex reliquos concessisse primas ferunt, ex aqua dixit constare omnia. at hoc Anaximandro, populari et sodali suo, non persuasit; is enim infinitatem naturae dixit esse, e qua omnia gignerentur. post eius auditor Anaximenes infinitum aëra, sed ea, quae ex eo orerentur, definita; gigni autem terram, aquam, ignem, tum ex his omnia; Anaxagoras materiam infinitam, sed ex ea particulas, similis inter se, minutas; eas primum confusas, postea in ordinem adductas mente divina; Xenophanes, paulo etiam antiquior, unum esse omnia neque id esse mutabile, et id esse deum, neque natum umquam et sempiternum, conglobata figura; Parmenides ignem, qui moveat terram, quae ab eo formetur;

Leucippus plenum et inane; Democritus huic in hoc similis, uberior in ceteris; Empedocles haec pervulgata et nota quattuor; Heraclitus ignem; Melissus hoc, quod esset infinitum et inmutabile, et fuisse semper et fore; Plato ex materia in se omnia recipiente mundum factum esse censet a deo sempiternum; Pythagorei ex numeris et mathematicorum initiis proficisci volunt omnia. ex his eliget vester sapiens unum aliquem, credo, quem sequatur; ceteri tot viri et tanti repudiati ab eo condemnatique discedent. quamcumque vero sententiam probaverit, eam sic animo comprehensam habebit, ut ea, quae sensibus; nec magis adprobabit nunc lucere, quam, quoniam Stoicus est, hunc mundum esse sapientem, habere mentem, quae et se et ipsum fabricata sit et omnia moderetur, moveat, regat. erit ei persuasum etiam solem, lunam, stellas omnis, terram, mare deos esse, quod quaedam animalis intellegentia per omnia ea permeet et transeat; fore tamen aliquando ut omnis hic mundus ardore deflagret. sint ista vera — vides enim iam me 38 fateri aliquid esse veri —, comprehendi ea tamen et percipi nego. cum enim tuus iste Stoicus sapiens syllabatim tibi ista dixerit, veniet flumen orationis aureum fundens Aristoteles, qui illum desipere dicat: neque enim ortum esse umquam mundum, quod nulla fuerit novo consilio inito tam praeclari operis inceptio, et ita esse eum undique aptum, ut nulla vis tantos queat motus mutationemque moliri, nulla senectus diuturnitate temporum efficere ut hic ornatus umquam dilapsus occidat. tibi hoc repudiare, illud autem superius, sicut caput et famam tuam, defendere necesse erit: mihi ne ut dubitem quidem relinquatur? ut omittam levitatem temere 120 adsentientium, quanti libertas ipsa aestimanda est, non mihi necesse esse, quod tibi est, *respondere*, cur deus, omnia nostra causa cum faceret — sic enim voltis —, tantam vim natricum viperarumque fecerit? cur tam multa pestifera terra marique disperserit? negatis haec tam polite tamque subtiliter effici potuisse sine divina aliqua sollertia, cuius quidem vos maiestatem deducitis usque ad apium formicarumque perfectionem, ut etiam inter deos Myrmecides aliqui, minutorum opusculorum



121 fabricator, fuisse videatur. negas sine deo posse quicquam *esse*: ecce tibi e transverso Lampsacenus Strato, qui det isti deo immunitatem magni quidem muneris — et cum sacerdotes deorum vacationem habeant, quanto est aequius habere ipsos deos! — negat opera deorum se uti ad fabricandum mundum; quaecumque sint, docet omnia effecta esse natura, nec, ut ille, qui asperis et levibus et hamatis uncinatisque corporibus concreta haec esse dicat interiecto inani; — somnia censet haec esse Democriti, non docentis, sed optantis; — ipse autem singulas mundi partis persequens, quicquid aut sit aut fiat, naturalibus fieri aut factum esse docet ponderibus et motibus. ne ille et deum opere magno liberat et me timore; quis enim potest, cum existimet curari se a deo, non et dies et noctis divinum numen horrere? et, si quid adversi acciderit — quod cui non accidit? — extimescere ne id iure evenerit? nec Stratoni tamen adsentior, nec vero tibi: modo hoc, modo illud probabilius videtur.

89  
122 latent ista omnia, Luculle, crassis occultata et circumfusa tenebris, ut nulla acies humani ingenii tanta sit, quae penetrare in caelum, terram intrare possit: corpora nostra non novimus; qui sint situs partium, quam vim quaeque pars habeat ignoramus; itaque medici ipsi, quorum intererat ea nosse, aperuerunt, ut viderentur; nec eo tamen aiunt empirici notiora esse illa, quia possit fieri ut patefacta et detecta mutantur. sed ecquid nos eodem modo rerum naturas persecare, aperire, dividere possumus, ut videamus, terra penitusne defixa sit et quasi radicibus

123 suis haereat an media pendeat? habitari ait Xenophanes in luna eamque esse terram multarum urbium et montium: portenta videntur, sed tamen nec ille, qui dixit, iurare posset ita se rem habere, neque ego non ita. vos etiam dicitis esse e regione nobis, in contraria parte terrae, qui adversis vestigiis stent contra nostra vestigia, quos *ἀντίποδες* vocatis: cur mihi magis suscensetis, qui ista non aspernor, quam eis, qui, cum audiunt, desipere vos arbitrantur? Hicetas Syracosius, ut ait Theophrastus, caelum, solem, lunam, stellas, supera denique omnia stare censet, neque praeter terram rem ullam in mundo moveri; quae cum circum axem se summa celeritate

convertat et torqueat, eadem effici omnia, quae, si stante terra caelum moveretur. atque hoc etiam Platonem in Timaeo dicere quidam arbitrantur, sed paulo obscurius. quid tu, Epicure? loquere. putas solem esse tantulum? 'egone? ne bis quidem tantum.' et vos ab illo inridemini et ipsi illum vicissim eluditis. liber igitur a tali inrisione Socrates, liber Aristo Chius, qui nihil istorum sciri putat posse. sed redeo ad animum et corpus. satisne tandem ea nota sunt nobis, quae nervorum natura sit, quae venarum? tenemusne, quid sit animus? ubi sit? denique sitne an, ut Dicaearchus visum est, ne sit quidem ullus? si est, trisne partis habeat, ut Platoni placuit, rationis, irae, cupiditatis, an simplex unusque sit? si simplex; utrum sit ignis an anima an sanguis? an, ut Xenocrates, numerus nullo corpore? — quod intellegi quale sit vix potest — et, quicquid est, mortale sit an aeternum? nam utramque in partem multa dicuntur. horum aliquid vestro sapienti certum videtur, nostro ne quid maxime quidem probabile sit occurrit: ita sunt in plerisque contrariarum rationum paria momenta.

Sin agis verecundius et me accusas, non quod tuis rationibus non adsentiar, sed quod nullis, vincam animum cuique adsentiar deligam: quem potissimum? quem? Democritum; semper enim, ut scitis, studiosus nobilitatis fui. urgebor iam omnium vestrum convitio: tunc aut inane quicquam putes esse, cum ita completa et conferta sint omnia, ut et, quo quid movebitur corporum, *corpus* cedat, et, qua quodque cesserit, aliud ilico subsequatur? aut atomos ullas, e quibus quicquid efficiatur, illarum sit dissimillimum? aut sine aliqua mente rem ullam effici posse praeclaram? et, cum in uno mundo ornatus hic tam sit mirabilis, innumerabilis supra infra, dextra sinistra, ante post, alios dissimilis, alios eiusdem modi mundos esse? et, ut nos nunc simus ad Baulos Puteolosque videamus, sic innumerabilis paribus in locis esse, eisdem nominibus, honoribus, rebus gestis, ingeniis, formis, aetatibus, isdem de rebus disputantis? et, si nunc aut si etiam dormientes aliquid animo videre videamur, imagines extrinsecus in animos nostros per corpus inrumpere? tu vero ista ne asciveris neve fueris commenticiis rebus ad-

sensus; nihil sentire est melius quam tam prava sentire.  
 126 non ergo id agitur, ut aliquid adsensu meo conprobem:  
 quae tu vide ne impudenter etiam postules, non solum  
 adroganter, praesertim cum ista tua mihi ne probabilia  
 quidem videantur; nec enim divinationem, quam probatis,  
 ullam esse arbitror, fatumque illud, quo omnia contineri  
 dicitis, contemno; ne exaedificatum quidem hunc mun-  
 dum divino consilio existimo, atque haud scio an ita sit.  
 41 sed cur rapior in invidiam? licetne per vos nescire quod  
 nescio? an Stoicis ipsis inter se disceptare, cum iis non  
 licebit? Zenoni et reliquis fere Stoicis aether videtur  
 summus deus, mente praeditus, qua omnia regantur;  
 Cleanthes, qui quasi maiorum est gentium Stoicus, Ze-  
 nonis auditor, solem dominari et rerum potiri putat: ita  
 cogimur dissensione sapientium dominum nostrum igno-  
 rare, quippe qui nesciamus, soli an aetheri serviamus.  
 solis autem magnitudinem — ipse enim hic radiatus me  
 intueri videtur admonens ut crebro faciam mentionem  
 sui —: vos ergo huius magnitudinem quasi decempeda  
 permensi refertis; ego me, quasi malis architectis, men-  
 surae vestrae nego credere: dubium est, uter nostrum  
 127 sit, leniter ut dicam, inverecundior? nec tamen istas  
 quaestiones physicorum exterminandas puto; est enim  
 animorum ingeniorumque naturale quoddam quasi pabu-  
 lum consideratio contemplatioque naturae: erigimur, alti-  
 ores fieri videmur, humana despiciamus cogitantesque  
 supera atque caelestia haec nostra, ut exigua et minuta,  
 contemnimus. indagatio ipsa rerum cum maximarum  
 tum etiam occultissimarum habet oblectationem; si vero  
 aliquid occurrit, quod veri simile videatur, humanissima  
 128 completur animus voluptate. quaeret igitur haec et ve-  
 ster sapiens et hic noster, sed vester, ut adsentiatur, cre-  
 dat, adfirmet, noster, ut vereatur temere opinari prae-  
 clareque agi secum putet, si in eius modi rebus veri  
 simile quod sit invenerit.

Veniamus nunc ad bonorum malorumque notionem.  
 sed paulum ante dicendum est: non mihi videntur con-  
 siderare, cum physica ista valde adfirmant, earum etiam  
 rerum auctoritatem se, quae inlustriores videantur, amit-  
 tere; non enim magis adsentiuntur nec adprobant lucere

nunc, quam, cum cornix cecinerit, tum aliquid eam aut iubere aut vetare; nec magis adfirmabunt signum illud, si erunt mensi, sex pedum esse, quam solem, quem metiri non possunt, plus quam duodeviginti partibus maiorem esse quam terram. ex quo illa conclusio nascitur: si sol quantus sit percipi non potest, qui ceteras res eodem modo, *quo modo* magnitudinem solis, adprobat, is eas res non percipit; magnitudo autem solis percipi non potest: qui igitur id adprobat, quasi percipiat, nullam rem percipit. responderint posse percipi quantus sol sit: non repugnabo, dum modo eodem pacto cetera percipi comprehendique dicant; nec enim possunt dicere aliud alio magis minusve comprehendendi, quoniam omnium rerum una est definitio comprehendendi. Sed quod 42  
coeperam: quid habemus in rebus bonis et malis explo- 129  
rati? nempe fines constituendi sunt, ad quos et bonorum et malorum summa referatur: qua de re igitur inter summos viros maior dissensio est? omitto illa, quae relicta iam videntur: Erillum, qui in cognitione et scientia summum bonum ponit; qui cum Zenonis auditor esset, vides quantum ab eo dissenserit et quam non multum a Platone. Megaricorum fuit nobilis disciplina, cuius, ut scriptum video, princeps Xenophanes, quem modo nominavi; deinde eum secuti Parmenides et Zeno, itaque ab iis Eleatici philosophi nominabantur; post Euclides, Socratis discipulus, Megareus, a quo idem illi Megarici dicti, qui id bonum solum esse dicebant, quod esset unum et simile et idem semper: hi quoque multa a Platone. a Menedemo autem, quod is Eretria fuit, Eretriaci appellati, quorum omne bonum in mente positum et mentis acie, qua verum cerneretur: Erilli similia, sed, opinor, explicata uberius et ornatus. hos si contemnimus et iam 130  
abiectos putamus, illos certe minus despicere debemus, Aristonem, qui, cum Zenonis fuisset auditor, re probavit ea quae ille verbis, nihil esse bonum nisi virtutem, nec malum nisi quod virtuti esset contrarium: in mediis ea momenta, quae Zeno voluit, nulla esse censuit. huic summum bonum est, in his rebus neutram in partem moveri, quae *ἀδιαφορία* ab ipso dicitur; Pyrrho autem ea ne sentire quidem sapientem, quae *ἀπάθεια* nomina-

tur. has igitur tot sententias ut omittamus, haec nunc  
 131 videamus, quae diu multumque defensa sunt. alii voluptatem finem esse voluerunt, quorum princeps Aristippus, qui Socratem audierat, unde Cyrenaici; post Epicurus, cuius est disciplina nunc notior nec tamen cum Cyrenaicis de ipsa voluptate consentiens; voluptatem autem et honestatem finis esse Callipho censuit; vacare omni molestia Hieronymus; hoc idem cum honestate Diodorus; ambo hi Peripatetici. honeste autem vivere fruentem rebus iis, quas primas homini natura conciliet, et vetus Academia censuit, ut indicant scripta Polemonis, quem Antiochus probat maxime, et Aristoteles eiusque amici huc proxime videntur accedere; introducebat etiam Carneades, non quo probaret, sed ut opponeret Stoicis, summum bonum esse frui rebus iis, quas primas natura conciliavisset. honeste autem vivere, quod ducatur a conciliatione naturae, Zeno statuit finem esse bonorum,  
 43  
 132 qui inventor et princeps Stoicorum fuit. iam illud perspicuum est, omnibus his finibus bonorum, quos exposui, malorum finis esse contrarios. ad vos nunc refero, quem sequar; modo ne quis illud tam ineruditum absurdumque respondeat: 'quemlibet, modo aliquem:' nihil potest dici inconsideratius. cupio sequi Stoicos. licetne — omitto per Aristotelem, meo iudicio in philosophia prope singularem — per ipsum Antiochum? qui appellabatur Academicus, erat quidem, si perpauca mutavisset, germanissimus Stoicus. erit igitur res iam in discrimine; nam aut Stoicus constituetur sapiens aut veteris Academiae. utrumque non potest; est enim inter eos non de terminis, sed de tota possessione contentio; nam omnis ratio vitae definitione summi boni continetur, de qua qui dissident, de omni vitae ratione dissident: non potest igitur uterque esse sapiens, quoniam tanto opere dissentiant, sed alter. si Polemoneus, peccat Stoicus, rei falsae adsentiens — nam vos quidem nihil dicitis a sapiente tam alienum esse —: sin vera sunt Zenonis, eadem in veteres Academicos Peripateticosque dicenda. hic igitur, neutri adsentiens, si numquam, uter *sit sapiens*,  
 133 *adparebit, nonne utroque* est prudentior? quid? cum ipse Antiochus dissentit quibusdam in rebus ab his, quos

amat, Stoicis, nonne indicat non esse illa probanda sapienti? placet Stoicis omnia peccata esse paria: at hoc Antiocho vehementissime displicet. liceat tandem mihi considerare utram sententiam sequar. 'praecide,' inquit 'statue aliquando quidlibet.' quid? si quae dicuntur in utramque partem et acuta mihi videntur et paria, nonne caveam ne scelus faciam? scelus enim dicebas esse, Luculle, dogma proderet: contineo igitur me, ne incognito adsentiar; quod mihi tecum est dogma commune. ecce <sup>134</sup> multo maior etiam dissensio: Zeno in una virtute positam beatam vitam putat. quid Antiochus? 'etiam' inquit 'beatam, sed non beatissimam.' deus ille, qui nihil censuit deesse virtuti, homuncio hic, qui multa putat praeter virtutem homini partim cara esse, partim etiam necessaria. sed ille vereor ne virtuti plus tribuat quam natura patiatur, praesertim Theophrasto multa diserte copioseque *contra* dicente; et hic metuo ne vix sibi constet, qui, cum dicat esse quaedam et corporis et fortunae mala, tamen eum, qui in his omnibus sit, beatum fore censeat, si sapiens sit. distrahor: tum hoc mihi probabilius, tum illud videtur, et tamen, nisi alterutrum sit, virtutem iacere plane puto. verum in his discrepant: quid? illa, in quibus consentiunt, num pro veris probare possumus? sapientis animum numquam nec cupiditate <sup>44</sup> moveri nec laetitia ecerri. <sup>135</sup> age, haec probabilia sane sint: num etiam illa, numquam timere, numquam dolere? sapiensne non timeat ne patria deleatur? non doleat, si deleta sit? durum, sed Zenoni necessarium, cui praeter honestum nihil est in bonis, tibi vero, Antioche, minime, cui praeter honestatem multa bona, praeter turpitudinem multa mala videntur, quae et venientia metuat sapiens necesse est et venisse doleat. sed quaero, quando ista fuerint *ab* Academia vetere decreta, ut animum sapientis commoveri et conturbari negarent? mediocritates illi probabant et in omni permotione naturalem volebant esse quendam modum. legimus omnes Crantoris, veteris Academici, de luctu; est enim non magnus, verum aureolus et, ut Tuberoni Panaetius praecipit, ad verbum ediscendus libellus. atque illi quidem etiam utiliter a natura dicebant permotiones istas animis nostris datas,

metum cavendi causa, misericordiam aegritudinemque clementiae; ipsam iracundiam fortitudinis quasi cotem  
 136 esse dicebant: recte secusne alias viderimus. atrocitas quidem ista tua quo modo in veterem Academiam intru-  
 perit, nescio: illa vero ferre non possum, non quo mihi displiceant — sunt enim Socratica pleraque mirabilia Stoicorum, quae παράδοξα nominantur —, sed ubi Xeno-  
 crates, ubi Aristoteles ista tetigit? hos enim quasi eos-  
 dem esse voltis. illi umquam dicerent sapientis solos reges, solos divites, solos formosos? omnia, quae ubique  
 essent, sapientis esse? neminem consulem, praetorem, imperatorem, nescio an ne quinquevirum quidem quem-  
 quam nisi sapientem? postremo solum civem, solum libe-  
 rum? insipientis omnis peregrinos, exsules, servos, furio-  
 sos? denique scripta Lycurgi, Solonis, duodecim tabulas  
 137 nostras non esse leges? ne urbis quidem aut civitates,  
 nisi quae essent sapientium? haec tibi, Luculle, si es  
 adsensus Antiocho, familiari tuo, tam sunt defendenda  
 quam moenia; mihi autem bono modo, tantum quantum  
 45 videbitur. legi apud Clitomachum, cum Carneades et  
 Stoicus Diogenes ad senatum in Capitolio starent, Au-  
 lum Albinum, qui tum P. Scipione [et] M. Marcello  
 consulibus praetor esset, eum, qui cum avo tuo, Luculle,  
 consul fuit, doctum sane hominem, ut indicat ipsius histo-  
 ria scripta Graece, iocantem dixisse Carneadi: ‘ego tibi,  
 Carneade, praetor esse non videor, quia sapiens non  
 sum; nec haec urbs nec in ea civitas.’ tum ille: ‘huic  
 [Stoico] non videris.’ Aristoteles aut Xenocrates, quos  
 Antiochus sequi volebat, non dubitavisset quin et prae-  
 tor ille esset et Roma urbs et eam civitas incoleret; sed  
 ille noster est plane, ut supra dixi, Stoicus perpauca  
 138 balbutiens. vos autem mihi verenti, ne labar ad opina-  
 tionem et aliquid adsciscam et conprobem incognitum,  
 quod minime voltis, quid consilii datis? testatur saepe  
 Chrysippus tris solas esse sententias, quae defendi pos-  
 sint, de finibus bonorum; circumcidit et amputat multi-  
 tudinem: aut enim honestatem esse finem aut voluptatem  
 aut utrumque; nam qui summum bonum dicant id esse,  
 si vacemus omni molestia, eos invidiosum nomen volu-  
 ptatis fugere, sed in vicinitate versari; quod facere eos

etiam, qui illud idem cum honestate coniungerent, nec multo secus eos, qui ad honestatem prima naturae com-  
moda adiungerent: ita tris relinquit sententias, quas putat probabiliter posse defendi. sit sane ita — quamquam a 139  
Polemonis et Peripateticorum et Antiochi finibus non facile divellor, nec quicquam habeo adhuc probabilius —, verum tamen video, quam suaviter voluptas sensibus nostris blandiatur; labor eo, ut adsentiar Epicuro aut Aristippo: revocat virtus vel potius reprehendit manu; pecudum illos motus esse dicit, hominem iungit deo. possum esse medius, ut, quoniam Aristippus, quasi animum nullum habeamus, corpus solum tuetur, Zeno, quasi corporis simus expertes, animum solum complectitur, [ut] Calliphontem sequar, cuius quidem sententiam Carneades ita studiose defensabat, ut eam probare etiam videretur — quamquam Clitomachus adfirmabat numquam se intellegere potuisse, quid Carneadi probaretur —: sed, si istum finem velim sequi, nonne ipsa veritas et gravis et recta ratio mihi adversetur? tun, cum honestas in voluptate contemnenda consistat, honestatem cum voluptate tamquam hominem cum belua copulabis? unum igitur 46  
par, quod depugnet, reliquum est, voluptas cum honestate; 140  
de quo Chrysippo fuit, quantum ego sentio, non magna contentio: alteram si sequare, multa ruunt et maxime communitas cum hominum genere, caritas, amicitia, iustitia, reliquae virtutes; quarum esse nulla potest, nisi erit gratuita; nam quae voluptate quasi mercede aliqua ad officium impellitur, ea non est virtus, sed fallax imitatio simulatioque virtutis. audi contra illos, qui nomen honestatis a se ne intellegi quidem dicant, nisi forte, quod gloriosum sit in vulgus, id honestum velimus dicere: fontem omnium bonorum in corpore esse, hanc normam, hanc regulam, hanc praescriptionem esse naturae, a qua qui aberravisset, eum numquam quid in vita sequeretur habiturum. nihil igitur me putatis, haec et alia innumera- 141  
bilia cum audiam, moveri? tam moveor quam tu, Luculle, nec me minus hominem quam te putaveris; tantum interest, quod tu, cum es commotus, adsciscis, adsentiris, adprobas, verum illud, certum, comprehensum, perceptum, ratum, firmum, fixum vis, deque eo



nulla ratione neque pelli neque moveri potes, ego nihil eius modi esse arbitror, cui si adsensus sim, non ad-sentiar saepe falso, quoniam vera a falsis nullo discrimine separantur, praesertim cum iudicia ista dialecticae nulla sint.

- 142 Venio enim iam ad tertiam partem philosophiae. aliud iudicium Protagorae est, qui putat id cuique verum esse, quod cuique videatur; aliud Cyrenaicorum, qui praeter permotiones intumas nihil putant esse iudicii; aliud Epicuri, qui omne iudicium in sensibus et in rerum notitiis et in voluptate constituit; Plato autem omne iudicium veritatis veritatemque ipsam, abductam ab opinionibus et a sensibus, cogitationis ipsius et mentis esse  
143 voluit. num quid horum probat noster Antiochus? ille vero ne maiorum quidem suorum: ubi enim aut Xenocraten sequitur, cuius libri sunt de ratione loquendi multi et multum probati, aut ipsum Aristotelem, quo profecto nihil est acutius, nihil politius? a Chrysippo pedem num-  
47 quam. quid ergo Academici appellamur? an abutimur gloria nominis? aut cur cogimur eos sequi, qui inter se dissident? in hoc ipso, quod in elementis dialectici docent, quo modo iudicare oporteat, verum falsumne sit, si quid ita conexum est, ut hoc 'si dies est, lucet,' quanta contentio est! aliter Diodoro, aliter Philoni, Chrysippo aliter placet. quid? cum Cleanthe, doctore suo, quam multis rebus Chrysippus dissidet! quid? duo vel principes dialecticorum, Antipater et Archidemus, † opinosissimi homines, nonne multis in rebus dissentiunt?  
144 quid me igitur, Luculle, in invidiam et tamquam in contionem vocas? et quidem, ut seditiosi tribuni solent, ocludi tabernas iubes? quo enim spectat illud, cum artificia tolli quereris a nobis, nisi ut opifices concitentur? qui si undique omnes convenerint, facile contra vos incitabantur: expromam primum illa invidiosa, quod eos omnis, qui in contione stabunt, exsules, servos, insanos esse dicatis; deinde ad illa veniam, quae iam non ad multitudinem, sed ad vosmet ipsos, qui adestis, pertinent: negat enim vos Zeno, negat Antiochus scire quicquam. 'quo modo?' inquires 'nos enim defendimus etiam insi-  
145 pientem multa comprehendere.' at scire negatis quem-

quam rem ullam nisi sapientem. et hoc quidem Zeno gestu conficiebat: nam, cum extensis digitis adversam manum ostenderat, visum, inquiebat, huius modi est; dein, cum paulum digitos contraxerat, adsensus huius modi; tum, cum plane compresserat pugnumque fecerat, comprehensionem illam esse dicebat, qua ex similitudine etiam nomen ei rei, quod ante non fuerat, *κατάληψιν* inposuit; cum autem laevam manum admoberat et illum pugnum arte vehementerque compresserat, scientiam talem esse dicebat, cuius compotem nisi sapientem esse neminem. sed qui sapiens sit aut fuerit, ne ipsi quidem solent dicere. ita tu nunc, Catule, lucere nescis, nec tu, Hortensi, in tua villa nos esse. num minus haec invideose dicuntur? nec tamen nimis eleganter: illa subtilius. sed quo modo tu, si comprehendi nihil posset, artificia concidere dicebas nec mihi dabas id, quod probabile esset, satis magnam vim habere ad artis, sic ego nunc tibi refero artem sine scientia esse non posse. an pateretur hoc Zeuxis aut Phidias aut Polyclitus, nihil se scire, cum in iis esset tanta sollertia? quod si eos docuisset aliquis, quam vim habere diceretur scientia, desinerent irasci; ne nobis quidem suscenserent, cum didicissent id tollere nos, quod nusquam esset, quod autem satis esset ipsis, relinquere. quam rationem maiorum etiam conprobat diligentia, qui primum iurare 'ex sui animi sententia' quemque voluerunt; deinde ita teneri, 'si sciens falleret,' quod inscientia multa versaretur in vita; tum, qui testimonium diceret, ut 'arbitrari' se diceret, etiam quod ipse videret; quaeque iurati iudices cognovissent, ut ea non esse facta, sed ut 'videri' pronuntiarentur.

Verum, quoniam non solum nauta significat, sed etiam Favonius ipse insusurrat navigandi nobis, Luculle, tempus esse, et quoniam satis multa dixi, est mihi perorandum. posthac tamen cum haec quaeremus, potius de dissensionibus tantis summorum virorum disseramus, de obscuritate naturae deque errore tot philosophorum, qui de bonis contrariisque rebus tanto opere discrepant, ut, cum plus uno verum esse non possit, iacere necesse sit tot tam nobilis disciplinas, quam de oculorum sen-

148 suumque reliquorum mendaciis et de sorite aut pseudo-  
meno, quas plagas ipsi contra se Stoici texuerunt.' tum  
Lucullus 'non moleste' inquit 'fero nos haec contulisse;  
saepius enim congregantes nos, et maxime in Tuscula-  
nis nostris, si quae videbuntur requiremus.' 'optume,'  
inquam 'sed quid Catulus sentit? quid Hortensius?' tum  
Catulus 'egone?' inquit 'ad patris revolvor sententiam,  
quam quidem ille Carneadeam esse dicebat, ut percipi  
nihil putem posse, adsensurum autem non percepto, id  
est opinaturum, sapientem existumem, sed ita, ut intel-  
legat se opinari sciatque nihil esse, quod comprehendi  
et percipi possit; qua re *ἐποχὴν* illam omnium rerum  
non probans illi alteri sententiae, nihil esse quod percipi  
possit, vehementer adsentior.' 'habeo' inquam 'senten-  
tiam tuam, nec eam admodum aspernor; sed tibi quid  
tandem videtur, Hortensi?' tum ille ridens: 'tollendum.'  
'teneo te;' inquam 'nam ista Academicae est propria  
sententia.' ita sermone confecto Catulus remansit; nos  
ad naviculas nostras descendimus.

---

## FRAGMENTA ACADEMICORUM POSTERIORUM.

### EX LIBRO I.

1. Nonius p. 65 Mero. *Digladiari dictum est dissentire et dissidere, dictum a gladiis. Cicero Academicorum lib. I: quid autem stomachatur Mnesarchus? quid Antipater digladiatur cum Carneade tot voluminibus?*

2. Nonius s. v. *concinnare* p. 43. *Idem in Academicis lib. I: qui cum similitudine verbi concinere maxime sibi videretur.*

### EX LIBRO II.

3. Nonius p. 65. *Aequor ab aequo et plano Cicero Academicorum lib. II vocabulum accepisse confirmat: quid tam planum videtur quam mare? e quo etiam aequor illud poëtae vocant.*

4. Nonius p. 69. *Adamare. Cicero Academicorum lib. II: qui enim serius honores adamaverunt, vix admittuntur ad eos nec satis commendati multitudini possunt esse.*

5. Nonius p. 104. *Exponere pro exempla boni ostentare. Cicero Academicis lib. II: frangere avaritiam, scelera ponere, vitam suam exponere ad imitandum iuventuti.*

6. Nonius p. 121: *Hebes positum pro obscuro aut obtuso. Cicero Academicorum lib. II: quid? lunae quae liniamenta sint, potesne dicere? cuius et nascentis et senescentis alias hebetiora, alias acutiora videntur cornua.*

7. Nonius p. 162. *Purpurascit. Cic. Academicorum lib. II: quid? mare nonne caeruleum? at eius unda, cum est pulsa remis, purpurascit: et quidem aquae tinctum quodam modo et infectum . .*

8. Nonius p. 162. *Perpendiculi et normae. Cic. Academicorum lib. II: atqui, si id crederemus, non egeremus perpendiculis, non normis, non regulis.*

9. Nonius p. 394. (cf. Sext. Empir. VII, 413.) *Siccum dicitur aridum et sine humore ... Siccum dicitur et sobrium, non madidum .. Cic. Academicorum lib. II: alius (color) adultis, alius adulescentibus, alius aegris, alius sanis, alius siccis, alius vinulentis . .*

10. Nonius p. 474. *Urinantur. Cic. in Academicis lib. II: si quando enim nos demersimus, ut qui urinantur, aut nihil superum aut obscure admodum cernimus.*

11. Nonius p. 545. *Alabaster. Cic. Academicorum lib. II: quibus etiam alabaster plenus unguenti puter esse videtur.*

### EX LIBRO III.

Cicero ad Att. XVI, 6, 4. *De gloria librum ad te misi: at in eo prooemium id est, quod in Academico tertio.*

12. Nonius p. 65. *Digladiari ... idem tertio: digladiari autem semper, depugnare cum facinorosis et audacibus, quis non cum miserrimum, tum etiam stultissimum dixerit?*

13. Nonius p. 65. *Exultare dictum est exilire. Cic. Academicorum lib. III: et ut nos nunc sedemus ad Lucrinum pisciculosque exultantes videmus . .*

14. Nonius p. 123. *Ingeneraretur ut innasceretur. Cic. Academicorum lib. III: in tanta animantium varietate, homini ut soli cupiditas ingeneraretur cognitionis et scientiae.*

15. Nonius p. 419. *Vindicare, trahere, liberare .. Cicero Academicorum lib. III: aliqua potestas sit, vindicet se in libertatem.*

16. Lactantius inst. div. VI, 24. *Nos tamen deficiat aliquis aut de se ipse desperet, si aut cupiditate victus aut libidine impulsus aut errore deceptus aut vi coactus ad iniustitiae viam lapsus est. potest enim reduci ac liberari, si eum paeniteat actorum et ad meliora conversus satis deo faciat. quod fieri posse Cicero non putavit, cuius haec in Academico tertio verba sunt: quod si liceret, ut iis, qui in itinere deerravissent, sic vitam deviam secutis corrigere errorem paenitendo, facilius esset emendatio temeritatis.*

17. Diomedes p. 377 ed. Keil. *Varro ad Ciceronem*

tertio fixum et Cicero Academicorum tertio (= Lucullus §. 27). \* malcho in opera adfixa.

18. Nonius p. 139. *Mordicibus et mordicus pro morsu, pro morsibus . . . Cic. Academicorum lib. III: perspicuitatem, quam mordicus tenere debemus, abesse dicemus.* = Lucullus §. 51.

19. Nonius p. 117. *Gallinas. Cic. Academicorum lib. III: qui gallinas alere permultas quaestus causa solverent: ii cum ovum inspexerant, quae gallina peperisset, dicere solebant.* = Lucullus §. 57.

### EX LIBRO III.

20. Nonius p. 69. *Adstipulari positum est adsentiri. Cic. in Academicis lib. IIII: falsum esse -- Antiochus.* = Lucullus §. 67.

21. Nonius p. 65: *Maeniana ab inventore eorum Maenio dicta sunt; unde et columna Maenia. Cic. Academicorum lib. IIII: item ille, cum aestuaret, veterum, ut Maenianorum, sic Academicorum viam secutus est.* = Lucullus §. 70.

22. Nonius p. 99. *Dolitum, quod dolatum usu dicitur, quod est percaesum vel abrasum vel effossum . . . Cicero dolatum Academicorum lib. IIII: non enim est e saxo sculptus aut e robore dolatus.* = Luc. §. 100.

23. Nonius p. 164. *Ravum fulvum. Cic. Acad. l. IIII: quia nobismet ipsis tum caeruleum, tum ravum videtur, quodque nunc a sole conlucet . . .* = Luc. §. 105.

24. Nonius p. 107. *Exanclare est perpeti vel superare. Cic. Acad. l. IIII: credoque Clitomacho ita scribenti ut Herculi quendam laborem exanclatum.* = Luc. §. 108.

25. Nonius p. 163. *Pingue positum pro impedito et inepto. Cic. Acad. l. IIII: quod ipsi -- contrarium.* = Luc. §. 109.

26. Nonius p. 122. *Infinitatem. Cic. Acad. l. IIII: at hoc Anaximandro -- infinitatem.* = Luc. §. 118.

27. Nonius p. 65. *Natrices dicuntur angues natantes. Cic. Acad. lib. IIII: sic enim voltis -- fecerit.* = Luc. §. 120.

28. Nonius p. 189. *Uncinatum ab unco. Cic. Acad.*

*lib. IIII*: nec, ut ille, qui asperis et levibus et hamatis uncinatisque corpusculis concreta haec esse dicat. = *Luc. §. 121.*

29. Martianus Capella V §. 517 p. 444 ed. Kopp. *Vitandum similiter ne in eodem loco tres aut quattuor longas brevesque continuo ponamus, neve in notissimos versus et maxime heroicos structura fundatur iambicosque versus, quamvis eos Cicero non evitet . . . et heroici versus finem vel initium non declinet, cum dicit: o miserum cui peccare licebat, et in Academicis: latent ista omnia, Varro, magnis obscurata et circumfusa tenebris.* = *Luc. 122.*

30. Nonius p. 102: *E regione positum est ex adverso. Cic. Acad. lib. IIII*: nec ego non ita. vos etiam dicitis esse e regione nobis in contraria parte terrae, qui adversis vestigiis stent contra nostra vestigia. = *Luc. §. 123.*

31. Nonius p. 80. *Balbuttire est cum quadam linguae haesitatione et confusione trepidare. Cic. Acad. lib. IIII*: plane, ut supra dictum est, Stoicus perpauca balbuttiens. = *Luc. §. 137.*

#### EX LIBRIS INCERTIS.

32. Lactantius inst. div. III, 14: *Cedo igitur quid didiceris aut in qua secta veritatem deprehenderis. in Academia scilicet, quam secutus es, quam probasti. at haec nihil docet nisi ut scias te nihil scire. tui ergo te libri arguunt, quam nihil a philosophia disci possit ad vitam. haec tua verba sunt: mihi autem non modo ad sapientiam caeci videmur, sed ad ea ipsa, quae aliqua ex parte cerni videantur, hebetes et obtusi.*

33. Augustinus contra Academicos II, 11, 26: *Audite ergo, inquam, quid sit, vos: id probabile vel veri simile Academici vocant, quod nos ad agendum sine adsensione potest invitare. sine adsensione autem dico, ut id quod agimus non opinemur verum esse aut non id scire arbitremur, agamus tamen. ut verbi causa, utrum hesternae nocte tam liquida ac pura hodie tam laetus sol exorturus esset, si nos quispiam rogaret, credo, quod nos id scire negaremus, diceremus tamen ita videri. talia, inquit Academicus, mihi videntur omnia, quae probabilia vel veri similia putavi nominanda: quae tu si alio nomine vis vocare, nihil*

repugno; satis enim mihi est te iam bene accepisse quid dicam, id est, quibus rebus haec nomina inponam; non enim vocabulorum opificem, sed rerum inquisitorem decet esse sapientem. *Satisne intellexistis, quo modo mihi ludicra illa, quibus vos agitabam, de manibus excussa sint? hic cum ambo se intellexisse respondissent vultuque ipso responsionem postularent meam, Quid putatis, inquam, Ciceronem, cuius haec verba sunt, inopem fuisse Latinae linguae, ut minus apta rebus, quas sentiebat, nomina inponeret?*

34. Augustinus c. Acad. III, 7, 15: *Sed primo illud videamus quale sit, unde amatores Academicorum gloriari nimium solent. nam est in libris Ciceronis, quos in huius causae patrocinium scripsit, locus quidam, ut mihi videtur, mira urbanitate conditus, ut nonnullis autem, etiam firmitate roboratus. difficile est prorsus ut quemquam non moveat quod ibi dictum est: Academico sapienti ab omnibus ceterarum sectarum, qui sibi sapientes videntur, secundas partis dari, cum primas sibi quemque vindicare necesse sit: ex quo posse probabiliter confici eum recte primum esse iudicio suo, qui omnium ceterorum iudicio sit secundus. fac enim, verbi causa, Stoicum adesse sapientem; nam contra eos potissimum Academicorum exarsit ingenium. ergo Zeno vel Chrysippus si interrogarentur, quis sit sapiens, responderit eum esse, quem ipse descripserit; contra Epicurus vel quis alius adversariorum negabit suumque potius peritissimum voluptatum aucupem sapientem esse contendet. inde ad iurgium: clamat Zeno et tota illa porticus tumultuatur, hominem natum ad nihil aliud esse quam ad honestatem; ipsam suo splendore ad se animos ducere, nullo prorsus commodo extrinsecus posito et quasi lenocinante mercede; voluptatemque illam Epicuri solis inter se pecoribus esse communem, in quorum societatem et hominem et sapientem trudere nefas esse. contra ille convocata de hortulis in auxilium quasi Liber turba temulentorum, quaerentium tamen, quem incomptis unguibus bacchantes asperoque ore discerpant, voluptatis nomen, suavitatem, quietem teste populo exaggerans instat acriter, ut nisi ea beatus nemo esse posse videatur. in quorum rixam si Academicus incurrerit, utrosque audiet trahentis*



se ad suas partis, sed si in illos aut in istos concesserit, ab eis, quos deseret, insanus, inperitus temerariusque clamabitur. itaque cum et hac et illac aurem diligenter admoverit, interrogatus, quid ei videatur, dubitare se dicet. roga nunc Stoicum, quis sit melior, Epicurusne, qui delirare illum clamat, an Academicus, qui sibi adhuc de re tanta deliberandum esse pronuntiat: nemo dubitat Academicum praelatum iri. rursus te ad illum converte et quaere, quem magis amet, Zenonem, a quo bestia vocatur, an Arcesilan, a quo audit: 'tu fortasse verum dicis, sed requiram diligentius.' nonne apertum est totam illam porticum insanam, Academicos autem prae illis modestos cautosque homines videri Epicuro? *Ita peraeque prope de omnibus sectis copiosissime Cicero iucundissimum legentibus quasi spectaculum praebet, velut ostendens nullum illorum esse, qui non, cum sibi primas partes dederit, quod necesse est, secundas ei dicat dare, quem non repugnare, sed dubitare conspexerit.*

35. Augustinus c. Acad. III, 20, 43. *Hoc mihi de Academicis interim probabiliter, ut potui, persuasi. quod si falsum est, nihil ad me, cui satis est iam non arbitrari non posse ab homine inveniri veritatem. quisquis autem putat hoc sensisse Academicos, ipsum Ciceronem audiat. ait enim illis morem fuisse occultandi sententiam suam nec eam cuiquam, nisi qui secum ad senectutem usque vixissent, aperire consuesse.*

36. Augustinus de Civit. Dei VI, 2. *Denique et ipse Tullius huic (M. Terentio Varroni) tale testimonium perhibet, ut in libris Academicis dicat eam, quae ibi versatur, disputationem se habuisse cum Marco Varrone, homine, inquit, omnium facile acutissimo et sine ulla dubitatione doctissimo. Non ait 'eloquentissimo' vel 'facundissimo,' quoniam re vera in hac facultate multum impar est, sed omnium, inquit, facile acutissimo. et in eis libris, id est Academicis, ubi cuncta dubitanda esse contendit, addidit sine ulla dubitatione doctissimo. profecto de hac re sic erat certus, ut auferret dubitationem, quam solet in omnibus adhibere, tamquam de hoc uno etiam pro Academicorum dubitatione disputaturus se Academicum fuisset oblitus.*

---

OCTOBER 1886.

**PLUTARCHI** vitae inter se comparatae. Edidit IMM. BEKKER.Octavausgabe. 5 Voll. *M* 8,40.Vol. 1. *M* 1,80. — Vol. 2. *M* 2,10.Vol. 3. *M* 1,50. — Vol. 4. *M* 1,50.Vol. 5. *M* 1,50.*Daraus einzeln:*1. Theseus et Romulus, Lycurgus et Numa, Solon et Poplicola. *M* 0,90.2. Themistocles et Camillus, Pericles et Fabius Maximus, Alcibiades et Coriolanus. *M* 0,90.3. Timoleon et Aemilius Paulus, Pelopidas et Marcellus, Aristides et Cato, Philopomen et Flaminius. *M* 1,20.4. Pyrrhus et Marius, Lysander et Sulla, Cimon et Lucullus. *M* 1,20.5. Nicias et Crassus, Sertorius et Eumenes, Agesilaus et Pompeius. *M* 1,20.6. Alexander et Caesar. *M* 0,75.7. Phocion et Cato minor, Agis et Cleomenes, Tib. et C. Gracchi. *M* 0,90.8. Demosthenes et Cicero, Demetrius et Antonius. *M* 0,90.9. Dio et Brutus, Artaxerxes et Aratus, Galba et Otho. *M* 0,90.Taschenausgabe. 5 Voll. *M* 7,80.Vol. 1. *M* 1,50. — Vol. 2. *M* 1,80.Vol. 3. *M* 1,50. — Vol. 4. *M* 1,50.Vol. 5. *M* 1,50.Prachtausgabe. 5 Voll. *M* 21,00.Vol. 1. *M* 4,50. — Vol. 2. *M* 5,25.Vol. 3. *M* 3,75. — Vol. 4. *M* 3,75.Vol. 5. *M* 3,75.**SOPHOCLIS** tragoediae Edidit

THEODORUS BERGK.

Octavausgabe. *M* 1,50.*Jede Tragoedia einzeln M* 0,30.Taschenausgabe. *M* 1,35.*Jede Tragoedia einzeln M* 0,30.Prachtausgabe. *M* 4,50.**THUCYDIDIS** historia belli peloponnesiaci. Edidit J. M. STAHL.Octavausgabe. 2 Voll. *M* 2,40.Vol. 1. *M* 1,20. — Vol. 2. *M* 1,20.Prachtausgabe. 2 Voll. *M* 6,00.Vol. 1. *M* 3,00. — Vol. 2. *M* 3,00.**XENOPHONTIS** opera. Edidit

GUSTAVUS SAUPPE.

Octavausgabe. 5 Voll. *M* 3,90.Vol. 1. Cyropaedia. *M* 0,90.Vol. 2. Anabasis. *M* 0,75.Vol. 3. Commentarii. Apologia Socratis. *M* 0,45.Vol. 4. Historia Graeca. *M* 0,90.Vol. 5. Scripta minora. *M* 0,90.Taschenausgabe. 5 Voll. *M* 3,75.Vol. 1. *M* 0,90. — Vol. 2. *M* 0,75.Vol. 3. *M* 0,45. — Vol. 4. *M* 0,75.Vol. 5. *M* 0,90.Prachtausgabe. 5 Voll. *M* 9,75.Vol. 1. *M* 2,25. — Vol. 2. *M* 1,80.Vol. 3. *M* 1,20. — Vol. 4. *M* 2,25.Vol. 5. *M* 2,25.**C. IULII CAESARIS** commentarii cum supplementis A. Hirtii et aliorum. Edidit F. KRANER.Octavausgabe. *M* 1,50.*Daraus einzeln:*De bello Gallico. *M* 0,75.De bello Civili. *M* 0,60.Taschenausgabe. *M* 1,35.*Daraus einzeln:*De bello Gallico. *M* 0,75.De bello civili. *M* 0,45.Prachtausgabe. *M* 4,50.**M. TULLII CICERONIS** opera quae supersunt omnia ediderunt J. G. BAITER et C. L. KAYSER.Octavausgabe. 11 Voll. *M* 21,75.Vol. 1. *M* 1,35. — Vol. 2. *M* 2,10.Vol. 3. *M* 2,10. — Vol. 4. *M* 2,10.Vol. 5. *M* 2,10. — Vol. 6. *M* 2,10.Vol. 7. *M* 1,80. — Vol. 8. *M* 1,80.Vol. 9. *M* 2,10. — Vol. 10. *M* 2,10.Vol. 11. *M* 2,10.*Daraus einzeln:*1. Rhetorica ad Herennium. *M* 0,75.2. De Inventione. *M* 0,75.3. De oratore. *M* 1,00.4. Brutus. *M* 0,60.5. Orator. *M* 0,45.6. De optimo genere oratorum. Partitiones oratoriae. Topica. *M* 0,45.7. Orationes pro P. Quinctio, pro Sex. Roscio Amerino, pro Q. Roscio Commodo. *M* 0,60.8. Divinatio in Q. Caecilium, actio in C. Verrem prima. *M* 0,45.9. Actionis in C. Verrem secundae sive accusationis libri I—V. *M* 1,35.10. Orationes pro M. Tullo, pro M. Fonteio, pro A. Caecina, de imperio Cn. Pompeii (pro lege Manilia). *M* 0,45.11. Orationes pro A. Cluentio Habito, de lege agraria tres, pro C. Rabirio perduellionis reo. *M* 0,75.12. Orationes in L. Catilinam quattuor, pro L. Murena, pro L. Flacco. *M* 0,60.13. Orationes pro P. Sulla, pro A. Licinio Archia poeta. *M* 0,45.14. Orationes post reditum in senatu et post reditum ad Quirites habitae, de domo sua, de haruspium responso. *M* 0,60.15. Orationes pro P. Sestio, in P. Vatinius, pro M. Caelio. *M* 0,60.16. Orationes de provinciis consularibus, pro L. Cornelio Balbo, in L. Calpurnium Pisonem, pro Cn. Plancio, pro M. Aemilio Scauro, pro C. Rabirio Postumo. *M* 0,60.17. Orationes pro T. Annio Milone, pro M. Marcello, pro Q. Ligario, pro rege Delotaro. *M* 0,45.18. Orationes in M. Antonium Philippicae XIV. *M* 0,90.19. Academica. *M* 0,60.20. De finibus bonorum et malorum. *M* 0,90.21. Tusculanae disputationes. *M* 0,75.22. De decorum natura ad M. Brutum libri tres. *M* 0,90.

23. De divinatione libri duo, de fato liber. *M* 0,60.  
 24. Cato major de senectute, Laelius de amicitia. *M* 0,45.  
 25. De officiis ad Marcum filium libri tres, paradoxa Stoicorum ad M. Brutum, Timaeus. *M* 0,60.  
 26. De re publica sex librorum reliquiae. *M* 0,60.  
 27. De legibus libri tres. *M* 0,60.  
 28. Epistolarum ad familiares libri I—IV. *M* 0,60.  
 29. Epist. ad familiares lib. V—VIII. *M* 0,60.  
 30. Epist. ad familiares lib. IX—XII. *M* 0,60.  
 31. Epist. ad familiares lib. XIII—XVI. *M* 0,60.  
 32. M. Tullii Ciceronis epistolae ad Q. fratrem; Q. Ciceronis de petitione consulatus ad M. fratrem liber. *M* 0,45.  
 33. Epist. ad Atticum libri I—IV. *M* 0,60.  
 34. Epist. ad Atticum libri V—VIII. *M* 0,60.  
 35. Epist. ad Atticum libri IX—XII. *M* 0,60.  
 36. Epist. ad Atticum lib. XIII—XVI. *M* 0,60.  
 37. Epist. ad Brutum libri duo et epistola ad Octavianum. *M* 0,60.  
 Prachtausgabe. 11 Voll. *M* 46,50.  
 Vol. 1. *M* 3,00. — Vol. 2. *M* 4,50.  
 Vol. 3. *M* 4,50. — Vol. 4. *M* 4,50.  
 Vol. 5. *M* 4,50. — Vol. 6. *M* 4,50.  
 Vol. 7. *M* 3,75. — Vol. 8. *M* 3,75.  
 Vol. 9. *M* 4,50. — Vol. 10. *M* 4,50.  
 Vol. 11. *M* 4,50.  
**CORNELII NEPOTIS** vitae et fragmenta. Edidit G. AEN. KOCH.  
 Octavausgabe. *M* 0,45.  
*Daraus einzeln:* Vitae. *M* 0,30.  
 Taschenausgabe. *M* 0,30.  
 Prachtausgabe. *M* 1,20.  
**Q. HORATII FLACCI** opera omnia.  
 Edidit GODOPREDUS STALLBAUM.  
 Octavausgabe. *M* 1,00.  
 Taschenausgabe. *M* 0,75.  
 Prachtausgabe. *M* 3,00.  
**D. IUNII IUVENALIS** saturae.  
 Edidit O. RIBBECK.  
 Octavausgabe. *M* 0,45.  
 Taschenausgabe. *M* 0,45.  
 Prachtausgabe. *M* 1,20.  
**TITI LIVI** ab urbe condita libri.  
 Edidit MARTINUS HERTZ.  
 Octavausgabe. 4 Voll. *M* 7,00.  
 Vol. 1. Pars 1. *M* 1,00. Pars 2. *M* 1,00.  
 Vol. 2. Pars 1. *M* 1,00. Pars 2. *M* 1,00.  
 Vol. 3. Pars 1. *M* 0,75. Pars 2. *M* 0,75.  
 Vol. 4. Pars 1. *M* 0,75. Pars 2. *M* 0,75.  
 Taschenausgabe. 4 Voll. *M* 5,70.  
 Vol. 1. Pars 1. *M* 0,90. Pars 2. *M* 0,75.  
 Vol. 2. Pars 1. *M* 0,75. Pars 2. *M* 0,75.  
 Vol. 3. Pars 1. *M* 0,60. Pars 2. *M* 0,75.  
 Vol. 4. Pars 1. *M* 0,60. Pars 2. *M* 0,60.  
 Prachtausgabe. 4 Voll. *M* 23,55.  
 Vol. 1. *M* 6,75. — Vol. 2. *M* 6,75.  
 Vol. 3. *M* 5,25. — Vol. 4. *M* 4,80.

- P. OVIDII NASONIS** carmina. Ed. ALEXANDER RIESE.  
 Octavausgabe. 3 Voll. *M* 2,90.  
 Vol. 1. *M* 1,00. — Vol. 2. *M* 0,90.  
 Vol. 3. *M* 1,00.  
 Prachtausgabe. 3 Voll. *M* 8,40.  
 Vol. 1. *M* 2,70. — Vol. 2. *M* 2,70.  
 Vol. 3. *M* 3,00.  
**PHAEDRI, AUGUSTI LIBERTI,** fabulae Aesopiae. Ed. A. RIESE.  
 Octavausgabe. *M* 0,45.  
**G. SALUSTI CRISPI** operum reliquiae. Edidit F. D. GERLACH.  
 Octavausgabe. *M* 0,75.  
*Daraus einzeln:*  
 Catilina et Iugurtha. *M* 0,45.  
 Taschenausgabe. *M* 0,60.  
*Daraus einzeln:*  
 Catilina et Iugurtha. *M* 0,45.  
 Prachtausgabe. *M* 2,25.  
**CORNELII TACITI** opera. Edidit FR. HAASE.  
 Octavausgabe. 2 Voll. *M* 2,40.  
 Vol. 1. *M* 1,20. — Vol. 2. *M* 1,20.  
*Daraus einzeln:*  
 Germania, Agricola, Dialogus de oratoribus. *M* 0,45.  
 Taschenausgabe. 2 Voll. *M* 2,10.  
 Vol. 1. *M* 1,5. — Vol. 2. *M* 1,5.  
 Prachtausgabe. 2 Voll. *M* 7,50.  
 Vol. 1. *M* 3,75. — Vol. 2. *M* 3,75.  
**P. TERENTI AFRI** comoediae Recensuit CAROLUS DZIATZKO.  
 Octavausgabe. *M* 1,20.  
**ALBII TIBULLI** elegiae cum carminibus Pseudotibullianis. Ed. EDUARDUS HILLER.  
 Octavausgabe. *M* 0,60.  
**P. VERGILI MARONIS** carmina.  
 Edidit GEORGIUS THILO.  
 Octavausgabe. *M* 1,50.  
*Daraus einzeln:*  
 Bucolica et Georgica. *M* 0,45.  
 Aeneis. *M* 0,90.  
**P. VERGILI MARONIS** opera.  
 Edidit HERM. PALDANUS.  
 Octavausgabe. *M* 1,35.  
*Daraus einzeln:*  
 Bucolica et Georgica. *M* 0,45.  
 Aeneis. *M* 0,90.  
 Taschenausgabe. *M* 1,20.  
*Daraus einzeln:*  
 Bucolica et Georgica. *M* 0,30.  
 Aeneis. *M* 0,75.  
 Prachtausgabe. *M* 4,50.

This book should be returned to  
the Library on or before the last date  
stamped below.

A fine of five cents a day is incurred  
by retaining it beyond the specified  
time.

Please return promptly.

~~31 JAN 2 1960~~  
31 JAN 2 1960  
JAN 8  
**CANCELLED**

Lc 38.422

Academicorum quae supersunt.

Widener Library

004894074



3 2044 085 191 161